





M Ex Bibliotheca
majori Coll. Rom.
Societ. Jesu

22-2-5

87.5

22





I A C O B I
B I D E R M A N I

e Societate I E S V

DELICIAE

S A C R A E.



A N T V E R P I A E,
Apud JOANNEM CNOBBARVM.

M. DC. XXXVII. †

*Superiorum permissu
Coll. Rom. Soc. Iesu. Cat. Insc.*

IN AMERICA

and the

DELICATE

ART



THE

LIBRARY

OF

THE

UNIVERSITY OF CHICAGO

H E N R I C O
R E V E R E N D I S S .

A N T I S T I T I ,

ILLVST^{mo} S. R. I. PRINCIPI,

Episcopo Augustano,

JACOBVS BIDERMANVS

è Societate J E S V .



OMAM profecturus, pedem è Germaniâ vixdum extuleram, cum illico sensi, quantum tui tu desiderium, HENRICE PRINCEPS, apud me reliquisses. Hæsit enim crevitque grata memoria, tantò acrius in dies, quantò longinquius à te recedebam. Et exigebant hunc animi sensum merita tua; quibus cum me privatim nec paucis nec parvis, tum Societatem univer-

sam plurimis , rem verò publicam
 propè immensis , arctissimè tibi de-
 vinxeras. Nam mihi quidem , annis
 ferè tredecim in urbe tuâ versanti,
 quoquò converterer , occurrebant
 semper monumenta tuæ liberalitatis.
 Templum ibi peramplum & elegans
 intruebar? Id omne tu Societati no-
 stræ sumptibus tuis magnificè copio-
 seque extruxerās. Ibi Collegium ego,
 situ locoque amænum , habitabam?
 Id æquè tu redditibus suis instruxeras
 pridem & fundaras : nec uno conten-
 tus , aliud nuper Augustæ , & aliud
 Memmingæ nobis , haud minori pro-
 ventu, tradideras. Academiam porrò,
 litteris studiisque florentem , admira-
 bar? Eam tuo tu patrocinio com-
 plexus , novis salariis locupletaras,
 professoribus scholisque auxeras, &
 præsentia propè quotidianâ illustra-
 ras. Denique & Marianum ibi Par-
 thenonem (plenum indole virtuteque
 cœtum)

cœtum) contemplabar? Eum nempe tu ipsum Præfectus sanctissimè gubernaràs; eum donis amplissimis affeceràs, eum exemplis, Principe te dignis, ad omnia summa excitaràs. Et adhuc ista, quasi privata commemoramus. Publica sunt, & jam æternitati consecrata, quæ tu laboranti periclitantiq̃ue Germaniæ, si non primus omnium, certè inter primos Principes, luculentissima contulisti. Quem enim illa te uno habuit vel in tuendâ Religione vigilantiorẽ, vel in oppugnandâ hæresi, his annis amplius triginta, ardentiorẽ? Loquuntur hostes æquè ac cives, quas impensas in bonum commune feceris. Norunt, quantos labores ad pacem reducendam exantlaris, quàm sapienti consilio partes erexeris, quàm opportunis auxiliis adjuveris. Amplissimum fuerat ærarium: id omne liberaliter exhausisti, ut nervos Reipublicæ firmares.

mares. Erant vitæ commoda, familiæ frequentia, palatii aulæque ornamenta; ea tu cuncta libens abdicasti, ut necessitatibus publicis cuncta largiùs uberiusque suppeditares. Quid multis? Cùm hæc aliaque plurima, in secundis rebus, gloriosè peregisses; restabat adhuc, ut etiam adversis tua se virtus experiendam offerret. Et ecce, belli procella! quæ à Septentrionibus effusa, cùm nuper in Germaniâ ferret ageretque omnia, etiam te adorta, nunquam potuit, quamvis & urbibus tuis oppidisque direptis, & civibus ac populis vexatis, & fortunis propè omnibus per vim ablatis, animi tui constantiam everberare: ad extremum ne exilium quidem à fide officioque abduxit. Ubi videre tum ego, non *Rutilium* videbar, quem exultantem Roma, ceu triumphantem, suspexerat: sed *Athanasios* mihi, magnosque Præsules in mentem reducebam,

bam, qui extorres quondam, terra-
 rum orbem obstupescerant. Eaqué
 propter futurum sperabam, uti te,
 quorum patientiam fortitudinemque
 æmulatus in exilio fueras, eorumdem
 gloriam in reditu consecutum videre-
 mus. Vidimus enimverò; & damnati
 jam votis, quicquid optari propemo-
 dum potuit, factum conspiciamus. O
 diem nobis auspicatum, quo suum
Augusta Præsulem, *Dilinga* Principem,
patria Patrem, ab exilio gloriosius,
 quàm alium à triumpho, redeuntem
 aspexit! Et felices ibi cives tuos, qui
 venienti occurrere, qui reducem ex-
 cipere, qui coràm alloqui, & manus
 deosculari, præsentē venerari potue-
 runt! Inter quos, HENRICE PRIN-
 CEPS, si & mihi locum fortuna reli-
 quisset, equidem, in gratulationes ef-
 fusus, animi mei gaudium mille indi-
 ciis argumentisq; coràm prodidissem.
 Quanquam & Romæ interea, tanto

terrarum intervallo , non omisi cir-
 cumspicere, ecquid absens reperirem,
 è quo cognoscere tu posses, me officio
 meo non penitus deesse. Ceterum
 omnia scrutatus, cum in paupere fun-
 do nihil hîc *meum* invenissem ; auda-
 cior, in Cæli cîmélia manus injeci, in-
 deque non ignem fabulosum , ut ille,
 sed Sacras has Cælitum *Delicias* furtim
 extuli : quas tibi , jam antè familiares,
 coque non ingratas, æquum erat de-
 dicari. Has ipsas proinde votis & pre-
 cibus claudio : uti tu , qui Rempubli-
 cam annis non minùs quinque & tri-
 ginta sanctissimè gessisti , in eadem
 gubernandâ alteros tantos felicissimè
 impleas : quò etiam Augusta suum in
 HENRICO Antistite REMIGIVM vi-
 dere se habereque gratuletur. E Col-
 legio Romano , Kalendis Januariis,
 M. DC. XXXVI.

LECTORES

BENEVOLI,

DVO mihi necessum est paucis hic præfari; de libri titulo alterum, alterum de genere modoque scriptura: quorum illud, nisi occupavero, invidia; & istud, huic video lucubrationi præjudicio fore.

Ac librum quidem Delicias inscribo: superbe, si ex meo; impune, si ab argumento; quod omnino mihi visum est tale, quippe plenum pie narrationis, & quod lectorem sui similem, id est pium, haud nullâ voluptate affectum relinquat. Nam quibus palatum obbrutuit, ii, si res hic enarrata plus aceti sapient quam mulsi, licet sibi intendant.

De genere porro formamque dicendi monitum quemque volo, ne Oratorem in hoc argumento expectet, sive forensem, qualem à Tullio; sive Panegyricum, qualem ab hoc avo. Neutrum ego duorum promitto: & verò si promitterem, aliud calamistrum ad crispandos mihi hos cinnos quasiissem. Nunc narrare duntaxat placuit, sed charactere dicendi mixto, qui neque recederet à familiari longius, & traheret ta-

men colorem ab officinâ Oratoris : cum materies per se ipsa, blanda propior quàm severa, ampullas, quibus ingrandesceret, visa sit aspernari. Atque hæc mihi in principis professio, adversus obtrectantes profutura confido.

Iam Operis parvi materies omnis in tres libellos est tributa : quorum Primus eas ferè Delicias memorat, quas Christi pueritia clientulis suis eximias ubere sç, propinavit : Secundus eas, quibus Virgo virginum suos aliquot alumnos suavissimè delinivit : Tertius denique iis Deliciis constat, quas, gustatâ voluptatum celestium promulsione, mortales aliqui, caloq; mox dignandi, praeceperunt. Has huiusmodi Delicias, cum ita mihi sumam, ut iis enarrandis pios alicubi motus, quasi colores quosdam, adspargam ; & per eos colores non sanè Lucem, (quam res habent à se ipsa) sed Vmbram (quâ solâ carent) adjiciam : eapropter meis illas coloribus non illuminatas inscribere, sed solum adumbratas libuit profiteri. Valere.

DELICIA RVM

LIBER PRIMVS.

I.

CHRISTVS parvulus in ulnis
SIMEONIS.

Ex Evangelio S. Lucae, cap. 2.



MAGNÆ mihi pulchræque voluptatis theatrum hîc aperiri video, Sodales; quòd ego quanquam è longinquo adhuc, & quasi per nebulam obscure dispi- cio; ita tamen eo moveri me afficiq; sentio; ut si coràm ibi clareque jam omnia contemplerer. Quòd proinde vereri minus debeo, ne quis jure mihi succenseat, si comites ego vos invitavero, ut adesse confertim, oculosque mecum animosque ad spectaculum illud, tam amœnum ac voluptarium, advertere seriò studeatis. Ceterum, eum vobis nescio quas voluptates & theatra hîc prædico, nolim de illâ scelerum palæstrâ vos cogitetis, cui totum & modestiæ suæ naufragium Alipius, &

innocentiæ excidium. juvenus, & pulchri
 omnis honestique exilium virtus, acce-
 ptum sæpe retulere. Faceffant hæc sua Ve-
 neres & Sirenes probra. Theatrum, quò
 invitamus, nullis fabellæ Milesiæ com-
 mentis, neque mimorum histrionumque
 ludicris profanum; sed meris cælitum ve-
 risque deliciis dicatum, & admirabili re-
 rum opumque suavitate refertum est: ubi
 vos simul circumspicere incipietis, qua-
 les (Superi boni!) quantosque estis Roscios,
 & quos eorum gestus motusque conspe-
 cturi? Unus ibi omnium labor est, jam
 Deum invadere, jam virginem Dei paren-
 tem circumdare, jam ex ejus complexu
 cælestissimum Infantem evolvere, Nu-
 menque patente sinu receptum, mortali-
 bus brachiis illigare. In hoc tale theatrum
 cum vos ego perduxero, futurum brevî
 confido, ut inibi non sedere spectatores
 ignavi, sed ultro prodire, & in ludo tam
 hilari actores esse, quam primum etiam
 ipsi desideretis.

2 Et ecce obvium in proscenii limine
 SIMIONEM, notæ pridem laudatæque san-
 ctimonix senem! qui vitæ jam omnis for-
 tunæque satur, dum nihil mortale in hac
 sibi coloniâ reliquum videt, quod voris,
 etiam

etiam mediocribus, esset ambiendum: ad longinqua cœpit spes omnes curasq; convertere; & rei cujusdam nusquam antea conspectæ, magnis assiduè novisq; desideriis æstuarè; cujus potiundæ, ut rationes ineat, nihil operæ sibi laborisq; putat omittendum. Quâ enim aliâ re, aut cujus tandem amore sanctius teneretur? Juventæ jam calor omnis vigorq; in canos defierat, jam vires ætati succumbere, jam sensus hebescere, jam labare cetera ruerèq; sentiebat; ut animus proinde, malè facti laris effœtus hospes, migrare quàm primùm, & statione, si missio daretur, excedere peroptaret. Sed optantem prope rantemque rei, quam dixi, unius desiderium ingens retrahebat. Et erat ea sanè materies, haud absurdo senis judicio, talis, quam unam omnia mortalium vota meritò suspirarent: erat, inquam, Dei nascentis & vagientis infantia; pridem illa populis terrisq; incertum, liberaliùsne promissa, an avidiùs exspectata, an postremò pertinaciùs dilata.

3. Hic iste quid ni fortunatum se crederet, si rem, tot majorum optatam suspiriis, tot postulatam lacrimis, & irritò semper conatu tot seculis concupitam, suis

demum oculis concessam, intraque sinus & manus & brachia conclusam, primis intueretur? Sed in rei tamen tam beatæ desiderio, non deerant curæ, quæ hominem adhuc perturbarent: Quid enim tibi tu? quid, senex, inquit, effæte, cœpto temerario cælum fatigas? aut quibus opibus tuis viribusque ferox, ad hos Numinis favores adspiras? Venient ea quidem appetentque tempora, ut Deum inter infantes recumbentem vagientemque tellus excipiat; venient ea, cum videbitur, ne despera: sed ea tamen quis uni adeò tibi, quis oculis tuis usurpanda promisit? Quid si feris nepotibus hæc olim gaudia reservantur? Potuerunt, si nescis, *Abraami* suspiria in tot annorum centurias differri: potuit *Mosis* constantia, & *Davidis* patientia, cum suis tot lacrimis, ampliari: potuit gentium cunctarum temporumque expectatio suspendi: & unus tu moram, delicate senex, recusas? Hæc hominem, ut dixi, aliquantulum perturbabant.

4 Nihilominus & hanc denique litem victor animus discussit. Nempe donum hoc, inquit, promitti nobis tam liberaliter non debuerat, si vel impetrari à me non potuit, vel noluit saltem desiderari. Imò enim-

enimvero promissum vel idcirco fuerat,
ut tanto expectatius aliquando & acce-
ptius obveniret. At *Abraamum* certe distu-
lere cælites, quem quantumque virtum? at
Mosen etiam, & quos non alios Heroas,
comperendinarunt. Audio pridem hæc
omnia, & mecum ipse non insciens ex-
pendo. Sed nusquam hic interim, nec illius
desideria, nec istorum suspiria reperio
damnari. aut certe monstra sis aliquis, ubi
cælum eis idcirco diem dixerit, quis dicam
aliquando scripserit, quis reos ambitus in
his illos comitiis accusarit? Quin potius, si
eos nemo non in cælum usque extulit, cur
eorundem mihi studia sapienter imitanda
non ducam? aut cur censorem eam in re so-
lus ego metuam, è quâ tot videam compe-
titores fuisse laudatos? An eò fortasse,
quod impar illis, paria temerè affectem,
incusor? Atqui, ubi vænale votis cælum
proponitur, etiam pauperes in mercatum
eunt, & magna pumiliones licitantur. In-
fero me proin, & digitum, inter copiosos
emptores hos, novissimus tollo. Vel enim
repulsam ego cum iis communem, hic fe-
ram, & magnis multorum exemplis me
consolabor; vel præ his ipsis voti compos
discedam, & eventu victoriaque primus
gloriabor.

5. O Virum in incepto salutari, sed arduo, magnanimum & erectum! ô Senem in corpore fracto vegetum adhuc & vivacem! In quo, ut labefecerit omnia expugnarique jam ætas, mentem profectò constantiamque non hebetavit. Quare neque nos actum acturos arbitror, si porrò, quid hoc tam contento studio Senex effecerit, exploremus. Pòst enim quàm diu noctuque pervigil hanc unam in rem incubuit, eumque nec temporis longinquitas frangere, nec repulsæ metus dejicere, ac ne mors quidem ingruens à conatu potuit detertere, quin idem assidue contendere, & ad Dei nascentis infantiam respicere constans perseveraret: adfuit ei tandem optatus è cælo, non ipse quidem infantis, jam præsentis, conspectus; certè verò præsens de infantis adventu conspectuque nuntius. Nuntius, inquam, ô quantis animi lætitiis exceptus? quot quibusque titulis salutatus? Nam, tametsi non sanè nuntium id temporis expectarat, sed Dominū videre Deumque puerum cupiebat; tamen augurio latus, potiturum utique voris se esse, ex prodromo discebat; futurumque haud multò pòst, ut, quod unum adhuc poposcerat, oculis mortalibus usur-

paret: Neque enim fatis concessurū prius, quàm se desiderati Numinis non modò conspectu dignatum, sed complexu quoque fruitum, miraretur.

6 ACCEPTO felici, quem diximus, nuntio, ulhúmne SIMEONI diem abisse vos creditis, quo die sibi gratulandum fortunatissimus senex non putârit? Jam oraculo confirmatus, noctes omnes diesque enumerare, & moræ impatiens, horis omnibus oculos attollere, cælique fidem suspiriis invitare. Et quoties domi suæ, quoties in templi adytis, de genu supplicans anhelansque, respectabat? nempe ad hoc unum sensus animusque Senis exercebantur, ut ne ferus hospes hospiti occurreret; heu venientem Deum aut otiosus exciperet, aut præsentem, & alicubi jam fortè vagientem, lentis officiis segnior ambiret. Ac potuit quidem etiam hæc talis industria, quò clariùs olim eniteret, aliquandiu protolli: ut verò longiùs prótracta, speratos successus non haberet, id fieri profectò nunquam potuit: sed suam simul & oraculo fidem, & promissam SIMEONI voluptatem oportuit constare.

7 SVBERAT jam auspiciatum ejus diei diluculum, horaque felix appetebat, quâ
Senis

Senis infinita cupiditas ad satietatem erat explenda: cùm institit ille, ceu futuri præscitus, se etiam ipso ardentior, exilire; pedesque senio victos, ad templi sacra, æquo maturius visenda, propellere. Accingitur longæva canities, viamque, toties incassum ambulatam, incipit gressu tremulo remetiri. Jamque ad eò volare pedes, animique imperium obsequio prævertere gestiebant; ni justæ molitioni, corpus effectum & senecta pertinax obnuntiaret. Igitur unum supererat, ut scipione correpto vires poplitesque fulcirentur, quò lubrica viarum prætentans, ad templi limen pedetentim eniteretur. Quanquam ad primum ædis vestibulum, cùm anhelans denique evasisset, ne ibi quidem continuò placuit interjungere (nec dum enim spectaculum illud, quod Senis impetum sistere, visumque pascere posset, illic apparuerat) sed penitus intro irrumperet, sed omnes templi angulos consulere, sed per turbas omnes, & siquà liceret, ad aras usque penetrare; dum ad expectatæ voluptatis metam pertingere, atque in promisso Numinis complexu intermori concederetur.

8 ET ENIM in eo sibi spem haud dubiam posuerat, ut crederet, fieri modo nullo posse,

posse, quin requisitus infans, ubi ubi esset, ex omni aliorum numero facillimè dignosceretur. Immuret, inquit, ora, vultusque suos arte quã volèr obducatur; dissimulet ambrosium colorem, si potest, & frontis divinæ pigmenta splenio ingeniosissimè regat: adhuc agnoscam, adhuc deprehendam. Infuscarì enim usq; adeò non potest,

Quin maneat reliquis formosior omnibus infans,


Inq; suã stellat astrag. fronte gerat.

Quare, quacunque nube Sol iste se recondat, exploratũ habeo, latere sic nunquam posse, quin perruptã confestim nebulã, sui mihi indicium copiamque faciat. Et sanè quemadmodum fecerit, paucis auscultate. Adhuc in turbã SIMEON, & cum turbã, quã pertumperet, decertabat; cùm fortè coniectis hac illac oculis, advertit eminus novam insueti fulgoris lucem apparere: quæ tametsi ipsum Solis meridiem longè præstaret, tamen intuentium vultus nitore suo non obtundebat. Atque hanc hujusmodi lucem ille, diu vestigans, deprehendit, nusquam nec supernè de tholi fornice, neque circum à templi pariete, nec aliunde ab aëre dimanare; sed omnem ab unius puellæ sinu existere. Erigit ergo in pedes sese, quantumque supra turbam potest, altior

altior increfcit : & ecce puerum illic ipfum
 (ô cupitas jam diu quæfitasque delicias !)
 puerum,inquam, videt ipfum, agnofcitq;
 procul : & confestim, Quid miferum, ex-
 clamat, impeditis? quid properanti obfi-
 stitis, cives? date fenio locum, finite hunc
 me globum, finite hac perrumpere : tarda
 omnis eft circuitio : finite rectà me infe-
 ram. Quid obftatis? mihi opima hæc fpo-
 lia, mihi funt promiffa. Data pridem in
 hanc rem eft fides : accepti funt obfides,
 relati testes; injuria erit veftra, five prohi-
 betis accessum, five retardatis. Dixit hæc
 ille, & fimul abjecto baculi fulcro, quali
 totam feneftæ farcinam excuffiffet, per
 obftantem populi coronam, agilis, ad me-
 tam ufque, ftupente frequentia, decurrit.

9 JAMQUE eò loci pervenerat, ut Vir-
 gini propinquior, nō oculos magis, quàm
 manus in prædam poffet intendere; cum
 repentè facinus incepit (Cælites boni !)
 plusquàm infolens & audax moliri. Adori-
 tur, ecce, nemine etiamdum metuente, di-
 viniffimum Infantem, eumque materno
 de finu palàm evolvere, brachiisque divel-
 lere, & in fuas illum ulnas attollere, fenili
 violentiâ laborat. Circumftare interea
 hiantes matronæ, Senemque attonitæ re-
 ſpicere,

ſpicere, & ecquid ſibi diludiis tam novis
cupiat, exſpectare. At Virgo ipſa, quam-
quam referre ſua cum primis videret, ſi ir-
ruere prædonem, ſpoliumque trahere tam
opulentum pateretur; tamen nihil pertur-
batè, neque ex uſu aliarum agere; ſed læta
potius, & oblectata ſpectaculo, renidere,
favereque prehenſanti, & prolem ſuam in
manus ipſi, inque ulnas, inque ſinum ultrò
ingerere, ac pulcherrimum Infantem Seni
gerulo commendare. Quid enim facere
aliud in hac dimicatione matrem decuiſ-
ſet? Norat illa ſapienter, Infantiam divi-
nam ſufficere unam omnium amoribus
poſſe; neque coli maternis obſequiis,
ſtringique brachiis ita velle, quin & alio-
rum officiis ambiri, lacertisque includi
ſe pateretur. Patitur omnino, Sodales;
idque, ut nulli dubitaretis, teſtem prodire
SIMEONEM hunc juſſit: jam in uno speci-
men dedit; &, erga ſe quid fieri ab omni-
bus velit, luculèter oſtendit. Niſi veſtrum
aliquem tædet, huc animum advertere;
&, quàm non invitus ille, quàm imò blân-
dus placidusque in hujus amplexus trans-
ierit, videre. Nam æquum erat, ut, qui
ipſemet dato pridem oraculo monuerat,
qui que in hoc theatri proſcenium ſuaviſſi-
me



mè Senem invitarat, jam palmas ejus ulnasque non torvus certè refugeret; sed sinum omnem gestiens exiliensque imple-ret: neque contentus, amantis oculos pascere, ad intimos animi recessus pene-traret, & nullam hominis partem lætitiis cælestibus immunem expertemque relin-queret.

IO O Senem plus mille titulis felicem! ô nostrâ, Sodales, invidiâ dignum; cui in hoc cæli nectare non pitissare duntaxat, sed imò (venia sit verbo) perpotare jam li-cuit & helluari. Nos interim auctorati Virginis clientes, hîc soli tanquam abste-mii victitamus, ne stillis quidem ab hujus remulentiâ rorantibus humectati. Quin excitamur & nos? paresque haustus, si nondum poscere omnes, saltem amare, si-tire, desiderare aliqui aûdemus? Nondum exhausta nec Infantis divinissimi suavitas, nec Virginis nostræ omnis est liberalitas. Nihilo parcius scaturiunt hodieque hi fontes: congii mellis hujus amphoræque cælo supersunt, dum ora tantùm, quæ si-riant, quæ perfundi liquoribus his & irri-gari cupiant, ne desiderentur. Quòd si ta-men ne hoc quidem nobis sumimus, sal-tem silentii tam parientes ne simus, quin
SIMEO-

SIMEONEM certè compellemus, cumque in hac tantæ voluptatis ubertate, quid ipse senserit, quid cogitarit, & quo pacto se suasque fortunas ceperit, interrogemus. Nam eum ad hæc postulata respondentem si audire contingeret, quæ, DEVS bone, & qualia sensa? quæ animi beati solatia? quæ cæli gaudia, & quibus ea coloribus adumbrari, depingi, exprimi, sentiremus? Sed video quid agatis. SIMEONEM, ad sua sibi commoda fruenda intentum, nefas ducitis interpellare: humaniùs facturi, si agentem porro, & in hac scenâ sermoninantem, taciti auscultare perseveretis.

II POST enim quàm usum se Virgine tam propitiâ sensit, ut pondus amabile suis etiam brachiis committeretur; non hæsit ambiguus diu, quid, eo spolio potitus, inchoaret: sed arctè Numen compresseque amplexus, seniles vultus sinusque, prope-rantibus gaudio lacrimis, continuò perfudit: & (quando oculis oculos contingere, & oribus ora, atque manus manibus jungere, majestas Infantis prohibebat) in eo se totus oblectavit, ut suum plantulis beatis caput submitteret, ut pedibus ambrosiis osculum libaret, ut gratulantibus verbis membra divinissima saluaret; ut in præstan-

præstandis denique obsequiis, nihil non aliud officiosissimè ageret. Ubi spectatoribus id præter multa jucundum acciderat, subitam videre Senis decrepiti mutationem. Nempe, qui bacillo nixus ad templum ægrè subrepserat, jam suis se ipse pedibus ferebat, jam bajulus juvenilibus studiis fervere, jam circumiens turbis omnibus DEVM ostendere; jam matri, & populo, & sibi, fatidicus audiebatur oracula fundere. O sarcinæ pondus suave! ô ulnas boni Pueruli alumnas! Ullúmne potuit onus humeris olim incumbere, quod bajulantem suaviùs beatiùsque degravaret? Si tamen onus illud putandū est gravasse, quod ipsum quoque bajulum exsilire, & omne senium coëgit à pedibus abesse, corpusque jam prope emortuum, primæ juventæ vigorem docuit assimilare.

12. SED frustra sim ego, si dicendo persequi singillatim ea omnia velim, quæ in hoc theatro SIMÉON alia ex aliis egerit, quasque præterea partes ac personas, quamque scienter omnes & concinnè explerit. Demus hoc optimo Seni, ut multa sensisse tunc illum egisseque cogitemus, quæ neque assequi nos hodie, neque ille possit facile recensere. Suffecerit, si ab illis
quasi

quasi diludiis exclusi, ad catastrophem certè, ludiq̃ue pulcherrimi coronidem admittamur. Etenim ubi Puerum Senex diu triumphans circumtulcrat, jam ceteris officiis sese perfunctum, & fidem oraculi abundè testatam ratus, Orpheum canorus vates induit; non citharædum illum, qui fluvios olim scopulosq̃ue fabuloso cantu suspenderat; sed illum, qui cygneo carmine Deum immortalem ad intimos complexus pertractum, populis ostenderet, & adorandum inter fascias cunasq̃ue Numen exhiberet. Quod ego Senis elegantissimū carmen, vereor ne temerarius hic vanusq̃; sim, si sperem, absono rudiq̃ue murmure imitari me posse. Quicquid enim incepero, nunquam sanè numeros illos moduloscq̃ue beatæ senectutis adæquabo. Quòd si tamen fas erit, Mæonii gloris, & jam jam expirantis, liquidissimos cantus, cum rauco asperoq̃ue aëriferis stridore confundere; hæc mihi vobisq̃ue non quidem illius carminis verba, sed verborum fuisse momenta, poterunt videri.

*Nunc, o nunc, mea vita, sit peracta
Fas abrumpere tedium senectæ!
Servant astra fidem: dedere quicquid
Promissum fuerat. Videmus ortam*

Terris omnibus omnibusque lucem.

*Est certè, est data missio. Quid ultra
Longi carceris hospites moramur?*

*Quod nunquam licuit, licebit, isto
Dum plenus premitur sinus Puello.*

*Iam vita satur, in lucro repostos
Si cursim fugiant, putabo menses.*

*Quid menses tamen auguror? facesse
Tam longi mora temporis. Relictas,
Ut cursim fugiant, precabor horas.*

*Nil annis erit, ah nihil, futuris,
Aut, quamvis foret, ah, nihil sub illis
Vltra cernere me juvabit annis.*

*Ignoscant oculis meis diurna
Et nocturna (videre tædet) astra.*

*Ibo nuntius, ibo, patriisque
Iam jam prodromus aggregabor umbris.*

Umbra surgite, quotquot estis, omnes:

Ducam vos ego conscius novorum

Ad compendia certa gaudiorum.

Nam quod nocte dieque mille votis

Et desideriiis, modisque mille,

Annisque amplius invenire mille

Nequicquam cupiistis, illud uno

Senex repperit unus in Puello.

13 Hæc ferè talia cùm SIMEON sonora
voce concinisset, perseveravit ille qui-
dem desiderium vivendi, ut pridem insti-
tuerat,

tuerat, rejicere; Puerulum verò, quem magnificè adhuc circumferèbat, ut matri suæ redderet, utque ab ulnis oculisque dimitteret, aut eripi brachiis avelli que suis sineret, si ægerrimè à seipse impetravit, quid est quòd quisquam admiretur? Equidem certè, ut de me uno, quod res est, ingenuè proloquar; omnia magnæ huic Matri cliens debeo, omnia cupio, omnia volo. Opes illa fortunaque à me repètit? abdicabo, quas habeo, daboque omnes. Cultum amoremque exigit? deferam ego, quem licebit, omnem. Vitam, sanguinem, animam poscit? hilaris omnem abjiciam, profundam, prodigam. Quid enim horum omnium negare Virgini aut impunè possem, aut sine injuriâ vellem? Unum est tamen unicumque in quo contumacem illa me haberet ac rebellem: ignosce flagitium hoc mihi, Mater, & fave abnuenti imperium clienti. Siquidem si tuam mihi prolem, si dulcissimum hunc Infantem, id est, Dominum Deumque meum, his olim brachiis excipere, si sinu fovere, si in gremio habere semel contingeret (quod Seni huic, post homines natos fortunatissimo contingere vidimus) dicam audacter, nec dicendi religio est, plagium ego luculen-

tum haud dubie molirer; à quo consci-
 scendo non alius aliquis, non tu ipsa (parce
 pervicaciæ) me inquam abduceres: neque
 ut reddendum tibi tam charum nobileque
 creditum censerem, ullis tu aut precibus
 tuis me flecteres, aut imperiis cogeres; ac
 neque minis etiam terteres, neque blan-
 ditius emollires. Nam et si intelligo, quan-
 tis tu titulis, quamque speciosis premere
 me posses, si matri filium, matremque filio
 deberi, inficiarer; tamen aliqua & meæ me
 causæ præsidia reperturum considerem.
 Ubi, quantò tu maximè, tuum esse hunc
 Puerum clamares, tantò ego maximè &
 meum esse, mihi que illum & natum æque
 & datum fuisse, vociferarer. Neque si ne-
 gare tu possidò vel addubitare tum velles,
 ego victus continuo tacerem; sed in iure,
 tibi Vatum oracula producerem, & data
 Numinis responsa, non ignarus, citarem;
 à quibus omnibus secundum me pronun-
 tiari perspicuè videres. Ecquānīgitur in-
 juriam tibi tunc faceremus, si, quod no-
 strum est, nobis assertum irreperitiacius
 vellemus? prodest oim

14 Hæc, inquam ego, prolixè agerem
 ediceremque, si, quod huic SIMEONI con-
 cessum esse legimus, etiam mihi per Vir-
 ginem

ginem hanc matremque concederetur. Sed ô inania vota ! ô somniata nequicquam gaudia ! quid irritâ spe exultantem animum ludificatis ? non ii nos adhuc, ah nondum ii sumus, quos implere tam vastæ debeant cogitationes. Humi reptamus miseri, & inter nubes condere caput affectamus ? Nequidum ad infima pedum, vix adeò ad calcis vestigia pertingimus, & jam divinissimi Infantis adspectus, jam osculæ vani complexusque meditamur ? Verum & hoc ignosces tu, quidquid erroris est, suavissime Puer ; & quorum soles affectum excusare, audaciam profectò non condemnabis. Neque tu item, magna ô magni Pueri Mater (etsi nos opibus tuis vim asferre, prolique dilectæ manus injicere cogitemus) clientibus aliud, quod succenseas habes, quàm, ut in hoc ipso injurios esse nos conqueraris ; quodd furtum istud cogitare nos solum, non etiam tentare manu, reque ipsâ perficere moliamur.

I I.

CHRISTVS infans in brachiis

CONRADI Offidæ.

*Ex Bartol. Pisano lib. 1. c. 23. p. 2. Ioanne
Majore tit. B. Virgo, exemplo 23.*

15 **Q**UANTAM exempla vim, ad homi-
nes utramvis in partem movendos
flectendosque habeant, tametsi jam ante
me multi veterum tradidere, &, ut alio
teste careamus, usu quotidie nos ipsi plus
nimio comperimus; tamen hujus ipsius
documentum si ex multis, unum hîc de-
dero, rem eò valituram apud nos sperabo,
ut nos, etiam ipsi, quæ præclarè facta in
aliis suspicimus, ad eadem vel audaciùs
æmulanda, vel certè ardentius desideran-
da, convertamur.

16 INTER illustria felicitatis moni-
menta, quæ à majoribus ad nos consigna-
ta pervenerunt, id cum primis memora-
bile est, quod de CONRADO legimus, in
Francisci posteris haud ignobili alumno.
OFFIDAM historiæ dixere. Is olim, cum
Sacris fortè meditandis incumberet, ibiq;

SIMEO-

SIMEONEM de Christi complexu triumphantem, veluti præsens intuensque observaret; invidiâ tactus, cum Cælitibus (qui candor hominis erat) institit expostulare, suamque Seni fortunam gratulari quidem, sed quòd in partem ejus triumphi non etiam ipse venerit, querelis, æquo propè majoribus, lamentari. Nam, Quæ Senis est hujus, inquit, humanitas, ut opes has, universis etiam suffecturas, suis unius brachiis, avarus, putet esse constringendas? Nemo, ne Euclio quidem, tam sordidè parcus fuit, qui Solem, cum ipse videret, non sineret etiam alios intueri. Aut quis olim tam impatienter sitiit, ut, ceteris exclusis, totum sibi amnem soli reservatum vellet? Et ferri proin hæc Simeonis cupiditas posset, si has sibi delicias, quantæ eæ cunque sunt, totas ambiret; dum ne competitores tamen omnes his comitiis arceret, sed socios certè aliquos, ad spem boni tam ampli, non invidus admitteret.

17 His ille cogitationibus cum paulatim exarsisset, sæpeque Simeonem, nunc in tabulis depictum, nunc in libris historiarumque descriptum, obversari sibi, & ubique velut insultantem, suasque sibi divitias ostentantem, intueri se crederet; im-

patientiam victus, eò novissimè prorupit, ut rentandam & sibi Senis fortunam arbitrarètur. Neque spes aderat nulla, futurum, ut, si candidatus in hæc ipse comitia descendisset, ferrè tribum fortassis aliquam posset. Verùm eæ tamen animum curæ collidebant, undenam potissimum exordiri, aut quos prehensare, in re tam arduâ, conveniret, ut eorum prærogativâ juvaretur. Nam ipsum, inquit, hunc Simeonem si ad partes meas invitavero, quid aliud in Senæ, etiam optimo, profecturus sum, quàm ut repulsam eò citius tulisse me sentiam, ipseque ille pignus suum, quod sinu gestiens ovariisque circumfert, arctius multò pressiusque adstringat; & ne quâ Deus infans è decrepito sinu elaboratur prætimidus, omnem competitoris societatem, ut suspectam, recuset?

18 ALIOS igitur necessum est ad oriar suffragatores, eosque ut mihi potius, quàm sibi quisque in causâ tam quæstuosâ, favéant, exorem. Quos alios autem illos? aut quis unus omnium ita se ipse contemnet, ut meis commodis suas partes in hoc foro postponat? Cælestes mihi genios fortasse quis dicet; illos utique, qui turmatim cælo delapsi, Simeonem hunc ipsum
taciti

taciti circumstant, Puerique divini autum
venerabundi expectant, ad cuncta ejus ob-
sequia, si vocet, ruituri: hos mihi scilicet
in his studiis operam operamque præstitu-
ros. Tanquam verò hi ipsi non istud sol-
lertissimè studeant, ut in demerendo In-
fante locum sibi quisque omnium primi
reservent? utque suum ephebuli Domi-
num circum undique cingant, eumque
ambiant proximè, & circumstant? Nec
enim ignorant, hunc esse Puerum illum,
quem quò contemplari cominus diutissi-
mè possent, è cæli palatiis emigrare, &
in has adeò terras, inque stabuli caulas
descendere, per ambitionem properarint:
numeraturi in deliciis, si intueri jacentem
vagientemque sinerentur. Atque hos mihi
loco esse cessuros, aliquis promittat?

19 CERTE autem hic ANNAM alius
mihi censuerit adeundam, natu grandi fe-
minam, & haud dubiam vatem: quæ, ut
facilis anus est, non gravatè suo me suffra-
gio sit dignatura. Quasi verò & ista non
ita sit actura res suas, ut in communi mul-
torum certamine consultius paret suæ ma-
gis, quàm adversæ factioni, suffragari? Ec-
ce, tot illa jam annis lustrisque thalami
omnis & gaudii expers, in hoc unum in-

cubuit semper, ut antelueana templum obsidere, ut abstemia preces fundere, ut ad omnes temporis occasiones intenta, vigilare diu noctuque pergeret, dum venturum hunc olim Infantem præstolaretur. Inhiat ipsa, & acriter, quod video, instat; ac, nisi locum præciperet Simeon, inter primas admitti; aut, si in secundis consistendū sit, se ipsam ingerere, quàm quémvis alium admittere, præoptat. Denique ne ego quidem (tametsi evenire hanc mihi fortunam præ ceteris desidero) auctor illi sim, ut in pignore jam sibi asserto; & porro tenaciter retinendo, anus religiosa cuiquam alteri concedat. Nam quod ego met, si id loci essem, obstinato animo caverem, ne quis hominum id mihi spoliū per vim ereptum iret, id ipsum ut Anna sit tibi; dum fortunā tam propitiā potitur, enixissimè caveat, adhortabor.

20. SECUNDVM has ego tot repulsas, à quibus aliis ullum, quod juvet, suffragium exspectabo? Plebem jussit aliquis, & hanc, quæ frequens circumstat, turbam prehensare? Sanè hanc quidem: at, nescio tamen quid metuo, ne parum auctoritatis habeat tam humilis favor, ad rem hanc tantam ambiendam. Potes ergo Proceres,

inquis,

inquis, locique Principes tibi quærere, & eorum, quippe illustrium, prærogativâ ad salutandum Infan-tem per-tingere. Nam isti quidem, ut nullis in Puerum obsequiis pro se singuli decertabunt, ita aliis totum diripiendum non inviti sunt relicturi. At neq; hæc suffragatio me magnopere con- solatur. Qui enim hujus infantiam sic aspernantur, ut eam, velut auctorati He- rodis satellites, implacabili odio devotam ferro belloque per omnes cunas sibi scru- tandam esse arbitrentur; quo pacto co- piam ejus mihi facturos esse persuadebo? Obnitentur imò hi omnes, acriterque re- sistent; & meos, quoad poterunt, conatus irritos utique volent & elusos. Quan- quam isti, ne si velint etiâ, in hac causâ juvare me ullo modo possint; cum nullâ ipsi apud Infan-tem hunc gratiâ, nec ullo in his comitiis aut jure aut suffragio pol- leant. Sed facite tamen, & velle eos meâ causâ omnia, & posse: non erit ex re, ut improborum viribus artibusque hîc præ- ceptis abutar; si præsertim consilia supersint meliora, quibus ad concupitas opes feli- ciùs enitamur.

21 Et video reverà consilium adhuc unum, ut promptius aliis faciliusque, sic &

efficacius, superesse. Quid enim imprudens per tot viarum flexus ac Mæandros jam dudum oberro? & matrem Virginem, quæ filii sui copiam vel sola facere poterat, rectà adire sollicitareque prætermitto? Nempe mater ea est, inquis, natiq̃ue longè amantior, quàm aut ephebuli sint cælestes, aut effæti hi Simeonès: quos tamen tu, quando exorari posse non putas, in ipsâ Matre expugnandâ exarmandaque, quid irritâ tibi spe polliceris? Hæc enim quò tenerius, quàm isti, validiusque diligit; eò ægrius, ut pignora sua è complexu dimittat, tibiq̃ue in audacissimo voto morigeretur, animum inducet. Inducet animum imò, quid ambigis, CONRADE? inducet. Nam ut sanè mater illa sit, utq̃ue prolem illa plus omnibus aliis diligat; diligi tamen eandem ab aliis quoque permittet. Permittet autem? Certè, si Matris animũ ego ingeniumque novi, etiam cupiet; etiam invitabit; provocabit; imperabit; neque, donec supplices efflagitemus, præstolabitur; sed ultrò eam promittere, ingerere, obtrudere, ut diligamus, diripiamusque, properabit. Nisi fortassis hodie demum suo se titulo abdicavit, ut *Mater pulchra dilectionis* esse vocariq̃ue dedignetur? aut

imme-

immemor, dissimulet, hanc suam se vocem agnoscere, quâ universos venire, accedere, accurrere ad se quondam jussérat, ut *ab ejus generationibus* omnes, quotquot essemus, *adimpleremur?*

22 ISTA secum ipse, aut horum non absimilia, CONRADVS: verum ita tamen pleraque, ut nequaquâ intra steriles querelas contineret se æstuans affectus, sed capto impetu; illactenus erumperet, ut re ipsâ exsequi conaretur, quod animo conceptum aluisset. Igitur liberè diserteque, quicquid vel oris rubor, vel voti magnitudo obnuntiaret, exorsus,

*Pignus ab astrorum Reginâ tale poposcit,
Quale Palæstini presserat ulna Senis.*

Neque id poposcit solum, sed etiam, quæ Virginis est benignitas, continuò impetravit. Vixdum enim voti sui summam CONRADVS absolverat, atque ecce tibi! cælum omne. repentè discedere, nubibusque ruptis novum undique lumen effulgere. Ubi sic tibi præluditur, CONRADE, potes jam ipse, quid mox futurum sit, con-jicere. Erige tu solum oculos, vultusque tot lacrimis humentes audacè attolle. Paruit hîc illè, monitusque, quos humi defixerat, oculos attollit:

*Nec mora, Mater adest, Eois pulchrior astris,
Lucidiorq; suâ matre Puellus adest.*

O facilem planè pronamque Virginem ! & suprà quàm sibi CONRADVS persuaserat, humanam & comem ! Finierat clientulus precari : quid ? nondum imò finierat, vix adeò dum inceperat, & voti jam compos, quicquid à Virgine desiderârat, concessum sibi datumque liberalissimè videbat. Jam infantiam divinam contemplari suaviter, jam in viciniâ admirari, jam totus ab uno spectaculo pendere, idque tametsi nondum manu contingere, ore jam certè oculisque poterat usurpare. Ecquis nostrum hac tantâ potitus voluptate, non se saturum, &, ut ita loquamur, saburratum esse confiteretur ? nondum tamen ne hac quidem copiâ satiatum Virgo voluit suum esse clientem. Auget amplificatq; donum, & hominem uberiore adhuc solatio perfundit. Quo autem solatio, si quod esse potest uberius, & quali tandem illo ? Non hîc verba jam ulla suppetunt ; hæret stupetque lingua, & ad infantiam omnis redit facundia. Me tamen etiam tacente, ipsam vos Virginem, quid agat dicatque, auscultate. Nam ea, porrecto, de sublimi filio, Agedum, inquit,

Tende.

*Tende duas, CONRADE, manus; cape munera,
quantus*

Quantus es, & toto hac pignora conde sinu.

23 ITANE verò? quid iterum hîc taces,
cessator? an nondum, ne nunc quidem,
cûm ultrò provocat, invadis? Etiamne tu
aut gaudio stupes? aut oculis captus, quæ
fortuna sit tua, non vides? In lucro est, quæ
datur hora: quid ultrà te ipse differs? Hæc
nostrum aliquis CONRADO tum poterat,
si cunctantem fortè morantemque con-
spexisset, exprobrare. Sed nihil ego hac
cum objurgatione video eguisse. Com-
modum enim Virgo invitarat, cûm impi-
ger, ultroque

Ille manus, simul ille sinus, simul ora tetendit;

Nec sinus illi unus, nec satis una manus:

Mille forent ulnæ, mille ille tetenderat ulnas,

Et sancta obsequio qualibet ulna foret.

Tunc oculos satiare datum, tunc ora tueri;

Iunctæq; tunc tactis labra beare labris:

Tunc prensare manu, tunc brachianectere collo,

Terrarum Dominos tunc religare pedes.

24 NEQUE tam brevem nos hominis vo-
luptatem hanc cogitemus fuisse, ut confe-
stim ea se rursum subduxerit: non adeò
parca sunt Virginis beneficia, ut inter pri-
mos etiam adspectus evanida continuò

dilaban-

dilabantur. Durant illa, animosque longis
 appendicibus morantur. De quâ quidem
 morâ, patere, quæso, nos ut curiosè aliqua
 percontemur : nam in tantâ voluptatum
 affluentia fieri non potuit, quin multa tu
 præclara cogitâris tecum, dixeris, feceris.
 Eorum nos, quando non omnium, at ali-
 quorum certè, conscios habere partici-
 pesque, non puto, dedecebit. Hic, fallor
 ego, an seriò nobis CONRADVM audimus
 respondere: Simples vos! me, quid fe-
 cerim, dixerim, cogitârim, interrogatis? ô
 curas humiles! Tanquam animus meus in
 eâ mellis & nectaris pluvia potuerit otio-
 sè, quid cogitaret, diceret, ageret, obser-
 vare? Ubi cæli se omnis opulentia effun-
 dit, mihi credite, non vacat rebus exiguis
 ullos animi sensus aperire. Tamen si vim
 afferre pergetis, ut ego, quicquid id fuerit,
 aliquid certè egisse me dixisseque confi-
 tear, audite :

*Tam grandi damnata videns ego brachia Voto;
 Obstupui manibus tanta licere meis,
 Inq; meos, dixi, potes ô bona Virgo, lacertos,
 Inq; meos potes hæc indere dona sinus?
 Tuq; sinu potes hunc Puerum dimittere Mater?
 Tuque sinu potes hoc Matris abire Puer?*

25 TALIA me dicere ingredientem, si sensus illicò destituere, dabitur veniam, ut & verba jam negem sufficere, quibus arcanae voluptatis reliqua series vobis enarraretur. In hunc fortasse modum CONRADVS, si colloqueremur, responderet. Et nos, quasi jam respondisset, ne porro simus odiosi, satis habebimus, si cetera silentio peragentem attenti speculemur. Sed enim his illum tam sanctis deliciis immorantem, facinusque jam, nescio quod, expectatione majus, molientem, fortuna (ô subitos rerum casus!) in medio cursu destituit; atque insperatò Pulcherrimus ille, quem ulnis suis brachiisque, inclusum blandissime fovérat, ille, inquam, Infans?

Ex oculis manibusq; suâ cum Matre recessit.
Cujus mihi tam improvise recessus, si divinare fas est, causam videor non absurdam odorari. Nam nisi fugâ violentâ Puerum abstulisset,

Nullâ aliâ Matri redditus arte foret.
Hic ego statuere mecum, Sodales, non audeo, majorémne credam ab aspectâ Numinis infantiâ suavitatem apud animum CONRADI, an ab ereptâ omisâque dolo-rem successisse. Ceterum, utrûmvis horum dixero, profectò moderatiùs ille potuit dolere,

dolere , qui ex amplexu conspectuque diutino Deum elabi sibi persensit. Nos verò , quibus spoliū hoc cæleste nunquam sinu fovere , nunquam brachiis stringere , ac ne oculis quidem intueri contigit , nescio an æquè , ac ille , doleamus ; certè autem dolendi lugendi que causam , illo majorem , plerique habemus.

26 QUID ni enim , ô Virgo magna , quid ni causam , ô magna Mater , haberemus ? CONRADVM hunc , ecce , clientem tuum , nos è longinquo hinc , etsi non conspiciamus , attamen audimus pridem & legimus , in voluptariâ scenâ gestientem , cæli que fortunis omnibus circumfluentem ; & necdum etiam assurgere ignavi , eademque abs te contendere , aut hæere aliquâ saltem in parte apud te , studemus. Potuit ille ad unum Simeonis exemplum sese erigere , potuit ad pares successus animum adjicere , potuit commune cum illo solatium sperare. Etiam nos tui , Virgo , clientuli sumus ; etiam nos , ut nondum æquare tot alios tuos possimus , tamen admirari jam venerari que didicimus ; & si porro adjuveris tu , conabimur , quoquo eventu , & vel impari passu , æmulari. Etenim , ne quid veri dissimulem , quis iste beatulus,

beatulus, aut unde tam insperatò sic fortunatus exstitisset, nisi tuâ tu ope favoreque huc illum evexisses? Non oculis ille Simeonem viderat in templo deambulantem, non adstiterat arbiter ejus gaudii, non testis spectatòrve approbârat; sed id ei tunc usu venerat solùm, ut de absente legeret, audiret, cogitaret: & inde tamen quantos homo repentè animos sumpsit? quid continuò, non tantùm desiderare, sed affectare & efflagitare, idque quantò violentiùs, tantò feliciùs, incepit? Nempe tuæ id artis opisq; fuit: tu viam ei modumque, quo accederet, demonstrâsti: tu ut auderet, tu ut citiùs impetraret, effecisti. Utamur eodem & nos, quamvis audaci, tamen utamur, compendio; & quicquid timidi dudum segnesque parturimus, id aliquando animosi pariamus. Nam quorsum, in facinoris pulcherrimi conatu jam deprehensi, ultrà tergiversamur? Palàm imò nunc aperteque erumpimus, ut quicquid aut impetrare priùs licuit Simeoni, aut mox imitari huic Simeonis rivali, id universum (quid erubescis oratio? quid titubas lingua?) id universum te, magna Virgo, & rogare nos, & flagitare, profiteamur. Quâ quidem in tantâ postulatione da veniam clienti-

clientibus Mater, si plus nimio vel sumus, vel videmur ambitiosi: tales enim ut hodie fieremus, suo Simeon & CONRADVS exemplo, tu tuo suffragio patrocinioque effecisti.

III.

CHRISTVS parvulus, in præsepi-
bus FRANCISCI.

*Ex Bonav. in Vitâ cap. 10. & Vincent. Belluac.
lib. 31. cap. 107.*

27 **Q**UOD plerique omnes inprimis studemus, ut eorum, apud quos suum narrationi momentum pondusque constare volumus, benevolentiam prius aliquam colligamus; id præter morem ego, non præfidenter temereque, sed (nisi instituti me mei amor fallit) rectè sapienterque; omissurus hîc esse videor. Facit hos animos, argumenti, quo de acturus sum, illecebra; nascentis, inquam, & vagientis adhuc Numinis infantia: quæ, dum à cognato Virginis gremio, ad extemporales FRANCISCI cunas divertere narrabitur; sperat, tantum in se ipsâ habituram suavitatis, ut
ad

ad animos sibiadjungendos, nullius egeat
denocinio patroni.

28. FRANCISCUS Assissas, Umbriæ quon-
dam alumnus, nunc Patronus (clarum ter-
ræ cæloque nomen, eaque causâ Fastis re-
ceptum) cum vergente senio didicisset,
propediem fore, ut rebus humanis, quas
longo jam pridem fastidio nauseabat, exi-
mendus, ad immortalales lauitias evocare-
tur; quod vitæ adhuc reliquum erat, ne id
quidem sine rerum cælestium sensu puta-
vit esse traducendum. Sipienti sanè con-
silio; & cum ceteris vitæ studiis apprimè
congruenti. Igitur, ut aliquem futuri sa-
porem præciperet, cælique voluptates
carpeim, quoad mortalitas esset, in torris
prælibaret, placuit diem CHRIS TI natalem
-& alioqui tempus suberat) exquisitè præ-
ut vulgè ceteri solemus, & peracturatè, ad
veri speciem, instaurare. Nam, quod argu-
mentum eligere tunc opportunius potuis-
set, quàm noctis ejus, imaginè rediivam,
in quâ talum rore quondam lacteo, & plus
melleo liquore meminèrat pluisse, terras-
que secundis bonorum omnium imbribus
irrigasse? O noctis beatæ memoriæ suæ-
ven! ô, uberes delicias, ab ejus etiam solâ
recondatione dimanantes! Verùm hanc
noctis

noctis ejus amœnitatem cupiebat, non soli memoriæ & cogitationibus objicere FRANCISCVS, quod meditando semper adhuc fecerat; nec auribus duntaxat committere, quod sermocinando sæpius insuêrat; sed oculis etiam ipsis, quod antehac nunquam licuerat, repræsentare.

29 QVAPROPTER his hujusmodi curis intentus, aggreditur tempori rei que congruens palatium adornare; id est, humile pauperque tugurium inter condensa nemoris umbrosi arbusta exstruere; laresque stipulâ & arborum ramalibus intectos (squalens hiemis pluvia que domicilium) in stabuli faciem conformare. Id omne palatium in prædio erat, quod inquilini GRÆCIUM dixerent: cetera locus silvestri horrore opacus, & solitudini peropportunos. In his penatibus incipit; hic è duro cortice præsepia concinnare, hic lectuli vice fœnum supponere; ibi collecta humi stramenta subjicere, mox de caduco folio paleâque pulvinum sternere; & de fragili culmo regetem sarcire; informes imparesque hospiti cunas. Jamque adeò stabuli faciem locus induerat; sed suis inquilinis adhuc vacuus, cui familiæ præpararetur, ignorabat. Igitur ne domus aliquid sui

deside-

desideraret, induci colonos jubet rude pecus asellum, & natum operi juvencum: jubet utrumque hinc atque hinc alligari præsepibus: jubet, in suam utrique cænullam, vile pabulum obsipari, omnia ad antri Bethlemæi exemplum. Sed, quod usitatas stabuli fortunas unum superabat, aderant pensiles ab humili fornice lychnuchi, erant relucens cerei, erant dispositæ facces; ut plebeii laris spelunca vix se ipsa, in peregrinâ luce, agnosceret.

30 CETERVM non solus hic tuguriî ornatus spectaculo fuit, sed ut circumcircâ omnis etiam vicinitas id noctis triumpharet, & arva prataque hîc Cælitum advolantium choreas, hîc pastorû vigilantium curas, hîc accurrentium plaudentiumque turmas exhiberent, jam antè FRANCISCVS suis negotium dederat, ut silvæ locique accolæ omnes, plebejum genus, ad frequentandam stabuli scenam in tempore excirent; utque nemora viasque relucere ignibus, auras modulatis sonare vocibus, omnia lætitiis studiisque cogerent fervere, Crederet viator, auditis tot choralis, alteros per nubes Amphionas volare, & novam cum Orpheo suo velle Rhodopen ambulare: sic ubique, & rusticæ testudines strepere,

strepere, & citharæ tinnire, & nablia canere, & valles omnes collesque gestire audiebantur. Quidni autem arbitremur, in eo tot hominum studio veros etiam opiliones, gregumque custodes permultos vigilasse, qui noctis meridiem, ostentis talibus plenum, admirati, cælum ab incolis suis crederent esse derelictum? qui que, cum ambulare per prata lucem, ingeminari per nemora carmen, cursare per devia plebem, consensu tanto viderent; itidem exciti, à pascuis suis ad casam, à gregibus armentisque ad cunas festinarent? Festinarunt profectò, ne dubitemus, festinarunt & ipsi: debuitque sua FRANCISCO voluptas integrè constare, ne ad veri imaginem deesse aliquid videretur, si instauratis Christi cunabulis, pars magna pastores defuissent.

31 INTER hos populi affluentis concursus, ut quique in pauperem stabuli speluncam primi penetrarunt, inopinatâ loci specie capti, nihil aliud, quàm in redivivum Bethlemii spectaculi tugurium delatos se arbitrati: quaquà oculos convertunt, enimverò hîc illis stipata fæno culmoque præsepia apparere, hîc fasciæ & cunarum crepundia videri, hîc pecus auritum

ritum rudere, hîc bucula simplex mugire. Ibi sedulae matris officium, in FRANCISCI obsequio; ibi Josephi seniû, in FRANCISCI socio; ibi totum stabulum, in æmulatione tugurii figurabatur. Fervet studiis antrum, ut omnes agi rem ipsam putaretis, non assimilari. In quo tanto tamen apparatu, quod ad rei summam vel maximè pertinebat, id unû absentia suâ FRANCISCVM, ne solidè sua gaudia gauderet, distinebat. Id verò cujuscumque fuerit, etsi cogitando per se potest quisque conjicere; tamen abs re non fecero, si studeam hîc indicare. Nam ille quidem, ut reliquum stabuli ornatum fabre scienterque concinnarit, tamen adhuc, nescio quid, in vacuis præsepi- bus identidem improbare se ostendebat. O quoties oculos ad cunarum paleas advertere! quoties ad rudes culcitas adjicere! & sæpè delusos, sæpius tamen retorquere persistebat? Poterat quippe tugurii quandam imaginem effingere, poterat è cespite corticeque præsepia contexere, poterat ex opilionum ac bubulcorum tribu spectatorem accire, & in his universis quandam veri similitudinem imitari: sed in uno demum imitando ars illum omnis, æquè ac manus & ingenium, defecere. In-

elligitis, video, omnes, hîc mihi quid ve-
im. Cupiebat hic Dædalus, in rerum cœ-
rerarum, tantâ similitudine, PVERVLVM
quoque verisimilem intueri. Hinc oculis
explorantibus toties incunabula lustrare,
ecquid ibi simile apparere, ecquid vita-
moveri vagireque inciperet, tam anxie
quirebat. Sed irriti tot oculorum con-
ctus, in totidem singultus gemitusque
imperdesiere.

32. NAM ubi gentium, quæso, terra-
mque potuisset infantem reperire, quem
hic nostro similem, in cunarum stipulis
allocaret? An puppum fortassis aliquem,
iis quos marmore Pario, aut secto ebo-
factos, hodie in aræ pegmate multos
nspicamur, supponeret? aut ceretum uti-
e signum, quod cerusa niveum, & mi-
rubore verecundum, & auro radiatum,
turis penicillus colorasset, ibi reconde-
? Nugæ! Scilicet, aut posset agnoscere
ANCISCVS vitæ similitudinem in inani-
puppo? aut dignoscere Virginis filium
ysippi sigillo non posset? FaceSSite hæc
nnia. Nam in formæ hujus imitatione,
uè & Phidiæ labor erubesceret, & A-
lis color palleret: omneque vel Men-
is cælum, vel Polycleti studium, vel

Timantis ingenium desperaret. Nos sanè cum artibus magna quæque tribuimus, eas vix etiam naturæ æmulas facimus; & oris humani lineamenta expressisse, summa votorum apud artifices habetur: at ultra naturæ limites conari, & Infantis divinissimi venustatem oculis mortalibus subjicere, nondum sibi ne audacissimæ quidem artes arrogarunt.

33 Quid igitur in rem suā aliud FRANCISCVS inveniret? an ab arte depulsus, ad naturæ subsidia confugeret? & quemadmodum ad ceteras stabuli partes animandas, jumenta spirantia, videntesque pastores ac sentientes accersit; sic alicunde & puerulum verè vagientem è nutriculæ gremio surreptum, fasciis fallacibus includeret, eumque ut Bethlemio Infanti supparem, in cunis æmulantibus collocaret? O inanes tunc denique mendacesque cunas, quæ tam dissimili se sensissent imagine degravari! Tanquam verò natura quidquam animare tam solerter didicerit, ut oris divini clarissimum sidus, frontisque serenæ jubar, in ullo suo possit Astryanaëte assimulare! Hyacinthos illa suos, ævi que fabulas Narcissos, ut supra vulgares formas quondam evcheret, commentis indiguit: &

Hylæ colores diluit mendacio, ne contempti apud nos sorderent: in his ambrosiis CHRISTI ocellis, in purpurascentibus Dei genis, in suauitibus Numinis label-
lis, quid effecturam imperita se sperasset? Cesset hanc formam, cesset conari tellus; in quâ concinnandâ cunctum cæli ingenium laboravit. Senium est, odiumque, quicquid aliud cum hac hujus pulchritudine comparatur. Et nobis fortasse, qui tam acutum minimè videmus, imponere quædam rei similitudo potuisset; verum enimverò FRANCISCVM, in celestibus dignoscendis hominem sagacem, & apprimè versatum, nullus neque pigmentorum fucus, nec purpurissi dolus, & neque artifex industria, neque opifex natura, ut trahi se decipi que sineret, induxissent. Quapropter totam solatii vim & magnitudinem, ceteroquin abundè cælo affluentem, una, quam diximus, Infantis absentia temperabat.

34 JAM paulatim noctis conticinium inter gratulantium convenarum plausus abierat, cum FRANCISCVS interim Socio, ad ipsa præsepia Sacris operanti, sic operam suam navabat, ut, quamvis oculos lacrimis affluè madero, animumque desi-

deriis novis incalescere sensisset, non præ-
 termittere tamen, quin, uti cœperat, ad
 sua identidem cunabula respectaret. Tum,
 ecce rem comperti prodigii, monstrique
 inavissimi refertam! Quas enim ille cunas
 toties antehac non modò inanimas, sed
 etiam inanes informesque conspexerat;
 eas ipsas repente jam, Superi boni! quales,
 & quantum à seipsis mutatas, conspiciatur!
 In asperâ rudiq̃ue stipulâ, in paleæ culcitâ,
 in fæni stramentiq̃ue pergulâ, cubare vider
 infantem. Vider, inquam, infantem, qui
 unus omnium hominum formas aboleret,
 qui radiis suis astrorum extingueret ignes,
 qui intuentium sensus raperet & amores.
 Hunc talem FRANCISCVS videt infantem.
 O suavem nobis Infantulum, & felicem! ô
 lectulo certè molliori, inque Regum pala-
 tio, non pastorum tugurio, collocandum!
 Atque tu quid ni anhelus ad talem accur-
 reres FRANCISCE? quid ni volentem &
 obvium occupares? quid ni brachiis sinu-
 que toto acceptum, festinus includeres?
 Accessi enim vero, occupavi, in vasi, inclusi;
 & quanto id animi mei gaudio, putatis?
 Nos quidem, FRANCISCE, putamus, ma-
 gno, ac propè dixerim, immenso.

35 NAM, si guttæ quondam unius sua-

vitas, sensibus illapsa, nihil tui tibi visa est
 reliquisse; dum tacta fidicine cælesti che-
 lys resonabat; isque ludus non sanè diu-
 rurnus, sed, quasi jocante plectro, inceptus
 simul abscissusque vanescebat: quid jam
 te, toto nectaris fluvio temulentum, vel
 sensûs vel animi retinuisse censeamus?
 Quid? quòd te nuper, cum tu idem pactæ
 cum cælo securitatis syngropham accepis-
 ses, quâ æternitas tibi in tuto reponeretur,
 usque ad eò capere fortunas tuas nequiiisti,
 ut diebus continuis octo nihil aggredi,
 nihil moliri, nihil auspicari aliud licuerit,
 quàm ut tuam tibi felicitatem gratulatus,
 Deum assidue clamitares, laudares, amares?
 neque tum tamè ille se tibi reipsâ commi-
 terat, sed dato solum arrhabone se alligarat.
 At eundem nunc oculis tuis contemplans,
 eundem fasciis constrictum intuens, eun-
 dem brachiis circumplectens, & manibus
 ejus pedibusque tot oscula ferens, quan-
 tam fieri voluptatis accessionem persenti-
 scis? Profectò, ut solenne tuum, DEVS
 MEVS, ET OMNIA, sæpe alias suavissimè
 exclamaris; hic illud tu sæpè sapius, &
 multò quàm antehac suavius, potes debet-
 que ingeminare.

36 REPETAT patrimonii assem præpar-
 cus

cui pater, neget adimatque filio vestem,
abdicet exigatque nudum: cui Deus su-
perest, ei & pater jam suus, & patrimonium,
& vestis est. Neque hic se patris teneat in-
juria, sed ad contumeliam socientur plu-
res. Rideat abdicatum frater opulentus, &
egestatem occurrens exprobrer: opum ha-
bet abunde, quisquis in complexu Deum
habet. Horrido incultoque sit aspectu, &
ubique perpluat informe stabulum: ubi
Deus meus incolit, cælum est. Etiam si fri-
gus ambiat, etiam si fames & sitis urat: fla-
grare sinus, pectusque satiari Numine po-
test. Omnes deserant, diffugiant omnes,
omnes omnia auferant; Deum qui retinet,
nihil amisit. Eaque propter exprobrate,
qui vultis, FRANCISCO inopiam: dum
Deus mihi meus est omnia, de inopiâ meâ
quod conquerar non habebō. O senten-
tiam vocemque FRANCISCO dignam! ô
penuriam Cræsis Crassisque omnibus in-
videndam! Verè omnia, FRANCISCE, verè
tu tibi omnia retinuisti, qui hunc tibi ta-
lem in summâ mendicitate Puerulum re-
servasti. At verò nos omnia, infortunati,
amissimus, si hunc tibi Infantem uni soli-
que totum relinquimus, si nō & ipsi invadere,
nobisque totū vindicare, pari studio labo-
ramus.

37 VERVM hic supervacuus timor est, siqui fortè metuimus, ne socios felicitatis suæ FRANCISCVS recuset; liberalior est multò, quàm ut hæc suspicemur: quin adeò ne expectat quidem, quoad lentis precibus hanc à se societatem postulemus; potius ultrò, quemadmodum advocare, invitare, attrahere universos ad boni sui communionem laboret, audite. Etenim, jam certè tum, ebulliente in vocem gaudio, ferunt ad frequentem populum, concionantis in modum, verba fecisse; quibus ad Bethlemium Infantem, omnium animos affectusque inflammaret. Quæ mihi verba, ô si eadem ad vos afferre nunc liceret! Nulli, reor, usque adeò duri ferrei que jam sumus, quin dicentis oratione concussi, quàmprimùm vel in flammæ amoris solveremur, vel in doloris lacrimas universi diffunderemur. Sed audiendus nimirum antè mihi FRANCISCVS fuerat, quàm eum apud vos, ore meo loquentem, producerem. Nunc interea, dum, quæ ipse verba dixerit, incompertum habemus, hæc saltem dicere eum id loci temporisque potuisse arbitremur.

38 MISERI mortales, quò usque tandem ruere vos in diversa perseveratis? quò mentes,

mentes, sinistri, oculosque divertitis? & tamdiu vel deformia, cæci, vel incerta fluxaque, vagi; vel nocitura, stulti, vobis eligitis? Expergiscimini aliquando, & toties malè decepti, donec licet, resipiscite; neque ut magnis cogitationibus aërem verberetis, vota mille terrâ marique incassum diffundite. Hic, ecce, metam, hic terminum ostendo quem appetatis; hic omnis desiderii voti que compendium invenitis. Nusquam aliò posthac studia curasque vestras convertite. In stabulo hoc omnis expleri mortalium curiositas, saturari omnis omnium cupiditas potest. Venite, adeste. En, immortale hic Numen, quemadmodum jacet! O vim amoris visu dictuque mirificam! Tun' è cælo Deum evocare? tu ad terras detrahere, & eundem in hos corporis modulos ausus compingere? Tu illum pelle ossibusque circumdare, imperareque, ut in hac Infantis metamorphosi vagiens, matris papillas sollicitaret? ut lacteum virginis rorem, posthabito nectare, ambiret? ut, ambrosiæ vicem, mansum sibi pulsemque præberi permitteret? Quis alius hoc licere sibi in Cælitibus sperasset? At neque hic tamen violentia tua stetit, sed eum, qui gentes laborato

tegmine, & animantium quasque suo vel-
lere semper vestierat, effecisti tu, ut nudus
hic ipse recumberet; ut hiberno frigore
palpitans, lacrimansque, hominis præsi-
dium imploraret. Cogit rei me novitas
iterum exclamare: O amoris indolē vio-
lentam! Tu eum, cujus edicto cælum to-
nitribus remugit, & imperio mare tume-
scit, & nutu tellus contremiscit; eum tu,
ceu debilem pupillum in stipulâ fœnoque
deposuisti: cui palatium cælestis proceres
apparere, cui siderum choragi excubare,
quem crebi phalanges expavescere con-
sueverant; eum tu infra homines, & verò
etiam infra pecudes, (violentus, dicam, an
crudelis?) abjecisti.

39. INTEREA VOS, ò fluxæ gloriæ riden-
da mancipia! ò superba, mortales, super-
cilia! vos, hoc tandē spectaculo convicti,
erubescite: qui dum tectis marmoreis in-
ter stragula serica lascivitis, auroque &
ostro cubilia cingitis, & eburna trabe la-
quearia suspenditis, grandesque porticus
& atria columnis distinguitis; interim in
hoc vili tugurio, in hoc pecudum contri-
berio, EN, INFANS, DOMINVS DEVSQUE
VESTER, en, quemadmodum cubat? en, ut
luxum ille vestrum, quem lege mutâ ne-
quiebat,

quierat, loquente exemplo condemnat? Imperate vel hoc oculis vestris, ut, quâ sine fastidio possunt, ad hæc stabuli præsepia, ad hæc inquam divinitatis mapalia, se paullulum demittant: & si sensus adhuc est, vestra confestim palatia subsident. Familiam cunctam suspicite, quæ jacentem hic Deum circumstat: & vestra se pompa, comitum clientumque legionibus aucta, subducet. Stipulas paleasque contrectate: & mox ambitiosa purpura sese abscondet. Unum porro unicumque restabit; ut, viso tam conspicuo modestiæ exemplo, vestra quoque supercilia, superbiaque detumescant.

40 Tu verò, plebs miseranda, tu sordidata reorum facinorosorumque turba; quid etiâ mne iners agere res tuas cunctaris? nondû mne tu quidem accurrere huic festinas? neque ad hanc cunarum aram lustrare te, veniamque noxarum exposcere, gratiamque à judice inire, ignava, procuras? An hoc tu mihi, quod præsentio, fortasse dices? Accederem, nisi meus me metus, & animus malè conscius detereret. Quâ enim fronte ad illum mihi summam, aut gressus intendere? aut manus attollere? aut oculos tutò advertere? qui

Olim fulgure, fulminisque telo,

*Olim sulfure, flammeoque nimbo
 Sontes terruit, impiosque plexit :
 Mersitque aquore perfidos, & undis
 Terramultricibus obruit rebellem ?*

huic ego me tam infenso violentoque judici committam ? vix etiam ab insontibus, nisi trepidè, convenitur. Periiimus, rea turba, quotquot accedere propius ad hoc tribunal attentamus.

41 ITA tu quidem : sed eheu ! quàm longè falleris, miserabile agmen ! Jam judex iste, quisquis olim qualisque fuerit ; certè enim, postea quàm in stabulo pernoctare, post quàm in paleam recumbere, & inter mugientes rudentesque pecudes vagire didicit, ah quantò seipso mitior evasit ? Amari jam solum potest ; metui & timeri vix, ac ne vix quidem potest. Certè quidem, ne posset, in hæc sese PVER cunabula abstrusit : & ne quàm porro in quenquam sæviret, suis se viribus Infans abdicavit. Nullis jam ille

*Nec minis terret populos, nec actum
 Torquet irato jaculum lacerto,
 Nec gravi sontem metuendus orbem
 Fulminat hastâ.*

Quod enim spargerent hi tam debiles lacerti telum ? aut quod amentum cerei digiti ?

giti? aut pueriles hæ manus quod stringerent ferrum? Olim hæc omnia potuit voluitque, cum conjuratam cæli superbiam exscindere, cum orbem terrarum uno omnem naufragio mergere, cum Pentapoleos mephitim piceis ignibus involvere, & in Ægypti copias, maris oportuit rabiem armare; enimverò tunc manibus iratis hæc tela, tunc fulgura fulminaque placuere.

42 Nunc belli consiliis abjectis, & excusso manibus ferro, quid inermem imbellemque formidatis? Securi accurrite: damnum egomet omne periculumque præstabo. Est enim, est

*Noxarum immemor omnium, & nocentum:
Iam nullas acuit severus iras,
Ah, nullus PVER iste. Savientem,
Agnosce mitior, exiit leonem.*

Inde & virium suarum oblitus, iram omnem in ignoscentiam vertit; neque aliud modò expectat, quam ut huc universi magno agmine, magnaque cum libertate properetis. Et quid ni autem properaretis? Tota hæc vobis caula, jam venia est. Judex ipse, quem suspectum infestumque habebatis, fasciis PVER adstringitur, & in vinculis Infans attinetur: ipsum vos illum, si

lubeat, nexum hic captumque invadere, abducere, abstrahere potestis.

42 HÆC ut fortasse talia FRANCISCVS ibi tunc dixerit, certè tamen ea multò aliter, & ò quantò melius ardentiusque, putandus est dixisse. Nos quidem utinam eâ conditione fuisset, ut ipsummet ibi perorantem auscultare, & in illo tuguriolo inter suavissimos Christi amplexus ovan-tem, propius licuisset intueri! Non commisisset ille, ut immunes indidem sineret, & indonatos recedere; sed nobiscum aliquid sui caloris, & vel tenues ex eo ferro, quod cudebat, stricturas libenter communicasset. Interea tamen perinde, ac si de longinquo saltem aliqua ejus verba percepissemus, accurramus & ipsi audacter, & ad divinissimos hujus Infantis pedes, inter tot alios FRANCISCI clientes & affeclas, postremi advolvamur: quando præsertim, ne quâ formidemus, ipsum illum & addere nobis animum, & præire exemplum, & promittere patrocinium, audimus.

I V.

CHRISTVS puerulus in anonymi
ADOLESCENTIS hospitio.*Ex Relation. Brandisii.*

43 **S**I cui novum hoc hodie mirumque videbitur, me prolixæ orationis copiam in unius narrationis angustias cogere; is, cum rationes consilii mei acceperit, recte omnino ordineque fecisse judicabit. Agimus enim de JESU, nascente puerulo; vel, ut blandius dicam, vagiente infantulo: qui, ut lacrimis nos prius quam verbis cepit compellare, ita non oratione magis quam amore sibi vult responderi. Cujus ut voluntati nos obtemperemus, equidem de suavissimâ ejus infantiâ verbis, quam poterò, paucissimis hîc narrabo; vos de eadem, quam fieri potest, longissimis affectibus cogitate.

44. Adolescentulum ajunt ingenuum, nescio quem, fuisse, cumque cum aliis naturæ ornamentis honestum, tum solidæ virtutis, præter ceteros, eximie studiosum: in quo scires nec ab indole formam, neque
ab

ab hac , ingenii felicitatem dissensisse : & præ utraque tamen animi morumque decora , non ambiguo certamine palmam abstulisse. Cujus Adolescentis utinam mihi nomen hodie, locique vestigia , æquè ac gestæ rei memoria, suppeterent! ingenuam ejus appellationem nec aures, puto, nostræ refugerent, nec libri fastique repudiarent. Nunc sublato nomine (qui ævi melioris candor fuit) res plerumque nudæ in Acta sunt relatæ, quasi fidem seipsis inventuræ, si ad bonos perferrentur. Quod si provida vetustas, exstituros aliquando sui tam dissimiles nepotes credidisset, qui fidem majoribus, nisi per testes mille caveretur, habere nullam vellent, libripendes, firmandæ huic etiam rei non defuissent. Sed dabimus hoc certè nos antiquitati, ut aliam narrationis syngrapham nunc ab eâ non exigamus.

45 EVM igitur, quem diximus, Adolescentem, cum Christi genethliaca , ex temporis usu, jam appeterent, ferunt diu multumque non vulgarem operam dedisse, uti per eos dies quicquid auspicandum esset , id omne per quam observatè religiosèque sic aggrederetur , ut ne quâ labe apparandum Christo nascenti domicilium inquin-

inquinaret: quippe non ignorabat perspicax indoles, quàm illibatum integrumque ejus esse animum oporteret, cujus subire dignarique Infans ille hospitium vellet. Quà quidem sollertiâ consecutus est, ut, cum hospitis ejus permagno desiderio teneretur, ea omnia agere moliri que exactè perseveraret, quibus ejus infantia capi maximè trahi que posset. Ceterum quænam illa, & cujusmodi studia fuerint, si animos huc advertemus, operosum non erit divinare.

46 **EQVIDEM** ita mihi jam dudum persuadeo, quicquid olim nos ipsi rectè studioseque facturi fueramus, si in expectando Virginis partu, par desiderium animos inflammasset: aut, ut verius rem dicam, quicquid hoc tempore nos plerique facere per ignaviam omittimus, qui frigore nostro hanc ipsam hiemis glaciem nivemque triumphamus; id omne profectò, & quicquid fieri aliud in re tali præclare debuit, par est arbitrari, in hospite invitando Adolescentem hunc factitasse. Nolo tamē, in eo putemus defudasse hanc tantam ejus industriam, quemadmodum in paterno lare Phrygiis aulæis parietes prætexeret, aut suum ipse cubiculū conchyliato peristromate

mate vestiret : in quali plerumque Iuxu mortales apparatus superbiunt. Nihil opus hac erat elegantia ad rem quam parabat ; sed novis artibus opibusque alii quaerendi ornatus fuerant, dum ambitionem purpuræ , animi modestia ; studiumque gloriæ, sui despicientia , commutat : dum caduca perituraque contemnere, immortalia votis continuis appetere, & gaudia nocitura perennibus lacrimis insistit damnare. O verè præclarum artificem ! & ornandi operis larisque apparandi, non imperitum ! qui si pavimentum studuisset asarotis expingere, aut conopeo fastuq; Babylonio pueriles cunas instruere , videretur hospitem egenum non magis invitare voluisse, quàm ingressu accessuque prohibere. Nam illum quis ad hanc opum & penatium illecebram audeat vocare, quem jam viderit ab Herodis sublimi palatio ad humile tugurium divertere, & præ plumentibus Sybaritarum lectulis, inter paleas culmosque recumbere ; & contemptis aulae servitiis, in caulâ pecudum obsequiis uti maluisse ? Scilicet delirantis indicium foret, tali Milesium cubile præparasse. Ea propter Adolescenti omnis apparatus inter animi virtutes consumptus est.

47 JAM intereà nox illa, quæ sole purior sereniorque diem orbi terrarum quondam attulerat, propinquare; & proin Adoleſcens novis caloribus, præ quàm antea nunquam flagrare: ita quidem, ut crescentis desiderio, moram porrò omnem queribundus refugeret; & expectati gaudii impatienter appetens, horam unam omnibus annis putaret longiorem. Quanquam eâ se tamen spe sustentabat, quòd crederet, utut astra lentè se circumagerent, dum postremo tandem expectata nox venisset, tum cælo certè maximè propitio se usurum. Jamque ecce vesper, & inde crepusculum, & primæ faces. Quid expectamus, quàm ut Adoleſcens suis se votis damnatum esse jam exclamet? Verum ô spes hominum incertas! & vel irrita multorum vota, vel seris demum fructibus potitura! Inter hos ultimæ spei conatus, dum summa omnia præparat apparatque gestiens animus, sentit inopinatò, nihil se, & minus nihilo profecisse. Nam illa se tota priorum dierum suavitas, temporis momento amisit; cœpitque & illa cæli voluptas, antè redundans, velut exhausta, vanescere, & lacrimarum scaturigines ficcari, & ipse etiam pectoris æstuantis ardor in hibernum gelu definere:

desinere : ad extremum, quicquid ubertatis solatiique nox expectata promiserat, jam, ut si promissi pœniruiſſet, totum negare ; ejuſque loco , plenos mœroris luctuſque congios propinare , ut cælum illi pluſquam ahenum, nulliſq; precibus exorabile, totum obſurduiſſe videretur.

48 Hic tantâ ſpe dejectus Adoleſcens, quid inciperet porro, aut quò mœſtus recurreret ? An fortasſe (quod multi, cum adverſis premimur, impiè ſolemus) injuriâ hanc eſſe Numinis, amens clamaret ? aut, malè locatas tot dierum menſiumque præces, effuſos tot oculorum imbres , pervigilatas incaſſum tot noctes, diceret ? aut, cœpta mox omnia , cum hominum ſuperumque convitiis , deſperaret ? Audite vos imò, atque obſtupeſcite ; & quotquot poteſtis , laudatæ virtutis imitandam conſtantiam ſuſpicere addiſcereque laborate. Quærimus enim, in hoc rerum ſuarum naufragio quid agat ? Perſiſtit obſſeruatè ingens animus, & voti etiam nunc potiundi certus, pervigilat id noctis in precibus ; gemituque cælum , invitum propè adverſumque, obtundit. Et, Abnuat, inquit, reſuſcitque pertinax, non abiget inſiſtentem. Vincet importunitas pia, quod mendicitas nulla

nulla extorsit. Si surdum est, excantari artificio & surda quædam possunt : denique ferreum sit, expugnabo. Docuit magnus me Poliorcetes, quibus arietibus vel adamantinas portas effringeremus. Perseverandum in incepto est ; & quicquid adhuc precantis verecundia nequit , pertinacis violentia impetrabit.

49 Dixit hæc indoles generosa ; nec dixit fortius, quàm effecit. O maturum bonæ mentis consilium ! ô animû ingentem ! & vel ideò morâ longiori differendum, ut plures hæc ejus magnitudo spectatores, imò admiratores laudatoresque inveniret. Nam si primis eum molitionibus mox omnia consecutum vidissemus, dicam liberè ac fidenter, non solum ipse nobis admirationi non esset, sed & suum ipsi gaudium, tam inertis suspirio emptum, vilescere quodammodò potuisset. Quid enim ? diceret, vix uno, quid mihi cuperem, nutu prodidi, votumque otiosè quasi fastidians signavi, & manum languidiusculè porrexi ; cum continuò cælû se mihi omne aperuit, gazam effudit, sinum implevit, suasque delicias, quas desidem rogare propè piguerat, stertenti profusissimè objecit : ut non donari munus à liberali, sed excuti pondus inutile

inutile obtrudive crederetur. Horum omnium nihil hîc, inquam, Adolēscens cogitare jam potest, quando nectaris divini promulsidem non nisi pertinacibus lacrimis, precumque assiduis clamoribus, ac perpetuis pænè gemitibus obtinuisse, tamdiu dilatus ampliatusque, potest gloriari. Animus omnino dignus his demum deliciis inundari, quibus tam generosè didicerat carere.

§ 50. QUANQVAM, quomodo etiam caruerit, in rem nostram erit, ut tandem aliquando cognoscamus. Noctis jam ejus, quâ de agimus, concubium aderat, & Adolēscens adhuc in sui cubiculi recessu divina meditans, cæli pertinaciam de genibus oppugnabat; cùm interim lene quoddam in viciniâ murmur oriri, ac timidè, nescio quis, cubiculi foribus oberrare. Nihil eo strepitu moveri pugil, sed in incepto pergere. Pergit & alter in limine moliri, demumque molli digito januam cedere. Quid? non hîc saltem tu respicis, Adolēscens? neque quis foribus tuis obturbet, requiris? Jube confestim succedere, quisquis est; jube, inquam, audacter: nam larrem, quem hi mores excolunt, subire incolereque hospes improbus non vult.

Dictum,

Dictum, factum. Jubet perfamiliariter Adolescens, quisquis esset, succedere; ignarus adhuc, quem sibi, quamque expectatum id noctis diversorem advocaret. Jubet: & ecce tibi! morâ interpositâ nullâ, pessuli reducuntur, versantur cardines, referantur fores, & hiscentibus valvis, ingreditur. Quis enim ingreditur? quem hominum cœlitumve autumatis? Ingreditur, ambrosiâ luce radiatus, & nectare cœlesti perfusus, & grâtiis omnibus comitatus. Quis ille tandem? quid animam hiantem lingua suspendis? Ingreditur (ô felicitatis non explicandæ prodigium!) ingreditur.

Phœbeâ face purior Puellus,

idemque

Astris clarior omnibus Puellus,

idemque

Formis omnibus elegantissque,

Rebusq; omnibus, omnibusque, quotquot

Sunt usquam, fueruntq; eruntq; pulchris

Unus pulchrior omnibus Puellus.

51. Hic talis inquam paryulus, hic talis infantulus, ad Adolescentem humi effusum, pieque supplicantem, ingreditur. Ecce autem his tot circuitionibus odiosè vos traho? verbo jam omnia absolvam. Ingreditur Virginis magnæ filius, puerulus, inquam,

quam, ingreditur JESVS. At miserum me!
in hoc tãtæ fortunæ miraculo quid amens
ego repentè conspikor? Vix tenuis hunc
talem Parvulum tegit subucula, infestant
niveos pedes manusque frigora, pavent
tremuntque membra, & formosissimo in-
ter filios hominum Puello.

Humectis (viden'?) imber ex ocellis

Viva vitreus instar exit unda.

Et hîc tu tamen, fortunate, cunctaris? non-
dum hospiti tuo aut vestem injicere, aut
gelu depellere, aut manantes à genis lacri-
mas abstergere festinas? Adhuc in subeun-
tis vestigia irruere, adhuc in genua inva-
dere, adhuc plantulis osculum imprimere,
vereris? Sed nimirum, utcumque jam pro-
peres, lentū est studium occurrendi, quod
omne prævertit celeritas Infantis.

52 POST enim quàm sibi cubiculi fo-
res in hunc modum patefecerat, prior ul-
trò accurrere ad Adolescentem Infans,
blandeque de noctis hiemisque injuriâ
questus, singultante animâ hospitium
orare, & simul, extremæ sibi vestis laci-
niam pro amictu superinjicere, idque ad-
versus frigora perfugium habere. Vidisse-
mus hîc omnes contubernii angulos ex-
templo radiis collustrari, & Adolescentis
animam,

animum, erumpentibus flammis involutum, mille solatiis gaudiisque repleti: vidissemus ora genasque calentibus lacrimis, velut mellitis imbribus, rigari. Audissemus pectoris æstuantis suspiria; & quanta rerum nostratium tædia, tanta immortalitatis desideria sonare. Atque ô si contingeret parvulam ab hoc incendio scintillam excidere, quis nostrum ultrò occurrere, eamque pleno sinu excipere, non studeret? Nam mutare vel modica strictura nos posset, levi que contactu totos ambureret: ut vel inde jam, quantum Adolescens exarserit, quibusque flammis conflagrarit, liceat æstimare, in cujus felicissimo sinu totum hoc debuit incendium residere.

53 SED inter hæc ipsa tam optimæ felicitatis principia, cælestissimus Infans è manibus oculisque elapsus, hospitem improvisò deserit. Deserit, inquam, & abit. O infelicem te, Adolescens, si hospes hic nihil sui apud te, fugiens, reliquit! si, quidquid insperatò secum attulerat, inopinatò rursus asportavit! Ut enim plurima liberalis dederit, ut cæli divitias opesque, cum accederet, omnes impertierit; quid lucri tu adeò fecisti, si iisdem omnibus, cum rece-

D

deret,

deret, te avarè spoliavit? Verùm absit, ut tam sordidè tenacem hanc Pueri fuisse fugam suspicemur. Nam abiit ille tum quidem, seq; oculis mortalibus, quod æquum fuerat, subduxit: sed animo tamen refusus, intimè tenacissimeq; inhæsit; atque clientem, ingentis voti reum, de ærumnoso fortunatū, & lætitiis omnibus solatiisq; perfusum reliquit. Quanquam ne oculis quidem ipsis sua voluptas continuò omnis decesserat: nam Parvulum cælestem Adolefcens assiduè velut adhuc præsentem adstantemq; contemplans, secumq; jam divinissimæ formæ gratiam, jam vocis suavitatem, jam circumfusæ lucis pulchritudinem requirens,

Expleri mentem nequit, ardescitq; fruendo.

Et ardeat sanè, fruaturq; felix hac ille magnitudine castæ voluptatis; nos interea, & nostras agere partes in hoc ludo, quousque differemus?

54 ABRVMPITE mecum segnem hanc moram; quodq; reipsâ nondum possumus, animo saltem cogitationeq; repræsentemus. Et fingamus hodiernâ luce, hanc suavissimam nascentis infantiam non eminus in malè facti stabuli ruinis hibernantem, neque inter cunarum fascias la-

criman-

erimantem , è longinquo nobis objici (tametsi & hæc spectacula forent jucunda) sed eam putemus hîc coràm adesse : putemus , renidentem ab uniuscujusque ulnis pendere ; putemus , inter manus sinusque nostros gestire. Enimverò si talia nobis hîc hodie fingeremus (atque utinam potius ne fingeremus!) quis animus cuique nostrum? quæ mens? quis sensus appareret? caperene felicitas nostra beatitasque se posset? Quid ulterius deinde , si hæc omnia non effingeremus, ut modò, sed reipsâ manibus oculisque, ut fortunatus iste, verissimè usurparemus; quid facturos, dicturos, censuros esse nos putatis? Utique beati nimium, & bonorum immortalium pleni, possemus admirari, possemus ardere, possemus amare & gaudere; sed gaudia nostra dicere, explicare, capere non possemus.

55 Nunc autem, postea quàm partum hunc divinissimum, has, inquam, nostræ Virginis unas verasque delicias , aliò nos divertisse , & ab alio castissimè videmus retineri ; habemus unum , infelices, quod possimus. Possumus Adolescenti felicissimo invidere. O planè dignum invidiâ! sed hac innoxia & amicâ , quâ talem illi Parvulum non quidem per vim & nefas eri-

piamus, sed uni tamen ac soli non relin-
quamus. Agite proin, & mecum omnes
audenter involate, invadite, & vel stabuli
Palæstini tugurium, inter opiliones repe-
tite, vel ad occupatas Simeonis ulnas ultrò
recurrite, vel me ductore, Adolescentis,
quo de loquimur, hospitium explorete :
ubique spes opima prædæ. Audistis, quò
desiderata Numinis infantia concesserit ;
quò sese abdiderit, ubi latuerit, comperi-
stis : eòdem alacres pergite, irruite, diri-
pite. Sola hæc vis erit, quâ nulli nocebi-
tur. Plurimum amore dignus hic Puer est, à
pluribus ametur, ab omnibus expetatur, à
nemine dimittatur. Erit hæc ævi nostri
ignavia, erit nominis generisque macula,
erit temporis hujus labes immortalis &
nota, si olim arguamur, nos omnes Ado-
lescentulo uni reliquisse, quidquid omni-
bus ubique suffecisset.

V.

CHRISTVS PVERVLVS in Inno-
centiæ convivio.

*Ex Antonino Sen. in Chron. Præd. 12. 40. Ioan-
ne Majore in Speculo, v. Puer JESVS,
exemp. 2. Rad. Virid. 2.*

56 **S**I quando res ulla post homines na-
tos usquam gesta est, cujus inexpectata festivaque novitas (admiratione dicam an voluptate?) complere nos largissimè possit; eam ego rem, ni vehementer erro, in præsentia producturum me confido. Etenim si Christi potuit infantia, cum è matris gremio ad Siméones, aut Franciscos, aut alios aliquos jam ævi maturos descenderet, oculos nostros animosque suavissimè tenere; quid ni parem ego nos, ac fortè etiam majorem, capturos esse voluptatem arbitrabor, si eundem aggrediar ostendere, cum ephebulis quoque & primæ innocentiae candidatis familiarissimè colludentem? Aggrediar enim verò, & libenter; unaque & meam in eâ re commemorandâ fidem, & in audiendâ ceterorum mihi attentionem pollicebor,

D 3

57 EST

piamus, sed uni tamen ac soli non relinquamus. Agite proin, & mecum omnes audenter involate, invadite, & vel stabuli Palæstini tugurium, inter opiliones repetite, vel ad occupatas Simeonis ulnas ultrò recurrite, vel me ductore, Adolescentis, quo de loquimur, hospitium explore: ubique spes opima prædæ. Audistis, quò desiderata Numinis infantia concesserit; quò sese abdiderit, ubi latuerit, comperistis: eòdem alacres pergite; irruite, diripite. Sola hæc vis erit, quâ nulli nocebitur. Plurimum amore dignus hic Puer est, à pluribus ametur, ab omnibus expetatur, à nemine dimittatur. Erit hæc ævī nostri ignavia, erit nominis generisq̃ue macula, erit temporis hujus labe immortalis & nota, si olim arguamur, nos omnes Adolescentulo uni reliquisse, quidquid omnibus ubique suffecisset.

V.

CHRISTVS PYERVLVS in Inno-
centiæ convivio.

*Ex Antonino Sen. in Chron. Præd. 12. 40. Ioan-
ne Majore in Speculo, v. Puer IESVS,
exemp. 2. Rad. Virid. 2.*

56 **S**I quando res ulla post homines na-
stos usquam gesta est, cujus inexpectata festivaque novitas (admiratione dicam an voluptate?) complere nos largissimè possit; eam ego rem, ni vehementer erro, in præsentia producturum me confido. Etenim si Christi potuit infantia, cum è matris gremio ad Simeones, aut Franciscos, aut alios aliquos jam ævi maturos descenderet, oculos nostros animosque suavissimè tenere; quid ni parem ego nos, ac fortè etiam majorem, capturos esse voluptatem arbitror, si eundem aggrediar ostendere, cum ephebulis quoque & primæ innocentia candidatis familiarissimè colludentem? Aggrediar enim verò, & libenter; unaque & meam in eâ re commemorandâ fidem, & in audiendâ ceterorum mihi attentionem pollicebor,

57 EST in terrâ Lusitaniâ locus, quem Sancterenſes beato Dominico ſacrum, & ab ejuſdem Aſceterio celebrem habent. Ibi annis abhinc propè quadringentis, BERNARDI nomen, in eâ familiâ, clarum eſt: viri tum cetera omnia religioſi, tum hoc præter cetera eximii, quòd morum optimorum candore, germanum Domini- ci clientem palàm referret. Neque enim tantus hominum aliorum eſt ardor, ut ad magna mox evadere, ut æqualium quem- que tranſſcendere, ut in ſummis liceat, ſpreto ruinæ periculo, conſiſtere; quan- tum iſtius votum ſtudioque fuerat, ut ad ima quæque deſcendere, & contem- ptim, quoad mortalibus oculis planè vi- leſceret, infra omnes abjectus poſſet latere. Quo in genere id ratus eſt fore conſiliis ſuis opportunum, ſi aliis humanæ ſapientiæ ſtudia, rerumque ſublimium faſtigia ten- tandâ relinqueret; ipſe verò in tradendis litterarum elementis exercere ſe, teneroſ- que puerorum annos ad calcanda virtutis veſtigia ducere ſineretur.

58. NON paſſum eſt Numen hanc ho- minis mentē ſpē ſuâ excidere: impetravit. Nactus eſt haud multò poſt ephebulos duos, tenues quidem illos, & mediæ ple-

bis tirones ; indole tamen præditos bonâ,
& quos ad omnem nutum magister non
ægrè conformaret. His BERNARDVS in
ludo , paucisq; hoc genus aliis, præfectus,
quidquid à divinis reliquum erat, id omne
tempus in suosumnulos hilaris doctor
alacerq; tribuebat ; operam navaturus
egregiam, si inter characteres ducendos,
& elementa dignoscenda, primarum quo-
que virtutum lineamenta formare præ-
textati clientes edocerentur. Intelligebat
enim homo sapiens , quantum in eo mo-
mentum verteretur , quamq; gratum id
æterno Numini studium, & juventæ peri-
clitanti necessarium, Rei que demum publi-
cæ foret salutare : neque cladium magna-
rum exempla, alios plerunque fontes ha-
buisset, quàm quòd in litteris complures sic
adoleverint, ut vix secundis in curis ha-
buerint virtutem.

59 SED hîc mihi tacendus non est mos
ille, qui tum invaserat, qui que hodie apud
non paucos obtinet, ut parvulis, cum manè
ad ludum itarent, suæ cuique dapes, parcæ
quidem illæ ac pauperes, jentaculi vicem,
deferendæ , à parentibus traderentur : ut
penso memoriæ apud magistros soluto,
indidem ipsi , cum videretur , jentarent.

Idem hoc servatum egregiè, etiam in istis. Atque accidit iis percommodè, ut ædicula templi vicina, ludoque pænè contigua, suum illis quotidie triclinium esset. Illuc namque ab opere litterario digressi sese unanimes, velut ex præscripto, recipiebant, symbolisque de sinu expromptis, & super aram, quâ cuique licuit, explicatis, alterum alteri candidè modesteque invitabant. Hic erat sæpenumerò videre iucundum, quas quisque de paupere perâ, quamque misellas opes educeret: Cereris plerumq; jam adessæ duratæque fragmentum, & ovilli casei mucescentē quadram: aliquando repostam è cænæ spolio placentam: aliquando nucē nunc juglandem, nunc avellanam. Quòd si, pro re natâ, vel lectæ castaneæ, vel recentes à flore amygdalæ, vel aliquid uvæ duracinæ obtigisset; tum uterque in Luculli Apolline convivari, & lautitiis omnes Apicios visi provocare. Subinde, matrem nacti benigniorem, etiam vosēnum autumnii pyrum, aut decumani ponderis pomum eblandiebantur, quo mensas communes instruerent. Denique semper aliquid horum in medium deferabant.

60 His huiusmodi apophoretis illa parvulo-

parvulorum jentacula parabantur ; & quæ duorum concordia in conferendis, eadem in carpendis capiendisque dapibus constabat. Non alter alterum occupare , non invidere inter se , non præcipere : sed pari uterque modestiâ , cedere magis , quàm contendere : neque quemadmodum aliena reciperent , sed quomodo sua melioraque apponerent , laborare. Negares esse pueros , in quibus hos mores etiam senibus decoros conspexisses. Sed pleraque hæc omnia BERNARDO, bono magistro , dociles tirunculi debuere. Hæc igitur convivia, cum eodẽ in loco jam ex usu frequentarentur, non fefellerunt oculos cælitum : quippe quos denique ipsos hæc ephebulorum simplicitas , ut spectatores semper habuerat , sic propediem & convivatores esset habitura.

61 ERAT in aræ pegmate , propter quam alumni discumbere concordis sigmate solebant , Virginis parentis antiquâ formâ conspicuum signum, è tiliâ fabre venusteque cælatum, & auri pigmento non tenuiter neque parcè illusum. In hujus gremio aliud, uti mos est, sigillum inerat. Pueruli æquè elegantis ac formosi , ut quem facile scires pulcherrimæ matris

non dissimilem prolem assimulare. Nec abs re fecero, si pueri sigillum illud dixerō, pallā sericā, auratoque amictu, & pendulo monili, bullisque aliis (ex more, quo etiamnum amiciri, & in aris nostratibus sacra destitui imagines soleant) exornatum fuisse. Cogitemus inquam, hanc ejus parvuli speciem habitumque nituisse; & quid usu deinde venerit, auscultemus. Discubuerant ii, quos memoravi, pueruli, ut ex lege suā, quam tulerant, unanimes jentarent. Promunt ergo conferuntque symbolas. Jamque partes adorti carpere, vident, ecce tibi! cælatum Christi sigillum librare sese, & expeditum materno de sinu graviter lenteque descendere, perque aræ patentis spatia ad jentaculum rectā festinare; ac, ne duo infra Gratias accumberent, sese tertium addere. Tum dein comiter injectā manu, partem sibi suam capere, & vultu renidenti, æquē ac reliqui, comesse, ceteraque in aliorum morem agere; denique remotis jam mensis, cum tirunculos ad ludum hora revocaret, etiam simulacrum Pueruli automaton ad matris ulnas postliminio remigrare.

62 EXPECTATIS jam, puto, nec id fortassis immeritò, ut prolixè vobis hīc memorem,

morem, quis duorum in re tam novâ subitaque motus, quis animorum habitus, quis in corpore exstiterit gestus. Nullane eorum exclamatio, inter admirationem, eruperit, nulla expaventium trepidatio, nulla de spectaculi insolentiâ consternatio invaserit. Nos enim ne audire quidem hæc, aut legere, nisi attoniti, possumus: illos, qui eadem oculis viventibus inspexerunt, eorumq; pars magna ipsimet fuerunt, quanto amplius credendum est obstupefactos adstitisse? Rectè nos quidem, & si suis momentis rem per seipsam expendamus, nequaquam temerè sic statuemus: verum, si ad hos innocentiae prætextatos descendamus, ajo, nihil tunc illos istorum, minusque nihilo, factitasse. Ipsa enim innocentia sensum illis miraculi ademit: illa spectaculo tam novo novitatem, illa inventibus admirationem detraxit; ut, si præfatus ego apud vos non fuisset, hoc solo argumento simplices animos, niveæque mentis infantiam fueritis deprehensuri. Quare ii tum quidem, ut si nihil insolitum conspexissent, abeunt è loco, incuriosi, indeque ludum, atque indidem lectulum, ut tempus monuit, somnumque jussi revisunt.

63 JAM tenebris cedentibus, etiam somnus diffugerat, aderatque lux altera, & cum luce, vigiles alumni rursus ad magistrum & pensum; atque à ludi diverticulo rursus ad aram, cum suâ quisque sportulâ revertuntur. Commodum accubuerant; & rursus continuo movere se Puer, rursus è virginis sinu ad jentaculum decurrere, rursus hospes à symbolus accumbere; idque tertiâ dein, idque quartâ luce, & rursus quintâ sextaque, strenuè facere; semperque cum aliis ita recedere, ut si jussus hospes vocatusque quàm maxime fuisset. Ea res cum in consuetudinem usque fieret, cœpit alios, tametsi simplices, postremò demum advertere. Nam augente convivarum numero, nō æquè demensum & annona crescebant, utpote quę tantò jam parcius singulis obvenirent, quanto in plures erant dividenda. Quamquam non erupit tamen ne tum quidem in querelas admiratio: sed modestè tamdiu premebatur, donec spes suberat, futurum aliquando, ut hospes gratuitus & suam ipse symbolam ad commune triclinium apporaret. In quâ expectatione cum frustra se esse denique cognoscerent, tum verò placuit, acceptam, uti rebantur, injuriam ultra non dissimulare.

64 AD BERNARDVM ergo placidi recurrunt, & doctori suo de rei indignitate pueriliter conqueruntur: Non deesse se suis partibus, sed pro virili, ut cujusque copiae sint, symbolas ad aram liberaliter afferre: ceterum supervenire jam crebrius convivam planè immunem, qui seipse semper invitet, ac de alienâ quadrâ non illiberaliter jentet: Nec aspernari se adventorē, quippe ingenuæ frontis, & (quod quidem appareat) haud malæ indolis puel- lum, dum lege tamen si rempse victitaret, de- que suo vel pauxillum aliquid subinde poneret, neque planè eximius immunisq; tam familiariter dapes gratuitas comesset. BERNARDVS nondum quid rei ageretur intelligens, ecquem ergo convivam ephe- buli vellent, & cujus parsimoniam accu- sarent, indagat; ratus, unum aliquem è suâ item disciplinâ notari, cui gratis alienum cibum comesse, ceterorumque annonam accidere, prælicenter luberet; eum para- tus, si proderent, pro imperio ab inferendâ injuriâ prohibere. Ajunt illi, quod res erat, Parvulum esse quendam, prætextatum, aureâ cæsariæ, cinnisq; flaventibus, & reliquo corporis habitu non invenustum; il- lum adeò ipsum, qui interdum quidem in-

ter ulnas beatæ Virginis permolestè quiescere solitus, appetente post jentaculo, socium se continuò addat, atque à brachiis maternis defiliens, in sigmate primus omnium recumbat. Eam rem insuper habendam sibi non videri.

65 HIC tandem BERNARDVS, non perinde tiro, quid fieret, & quò tam placidæ duorum querelæ spectarent, palàm agnoscere, secumque attonitus rem comperiri miraculi, quid portenderet, considerare. Utique, rudem ætatulam, ejusque suavem innocentiam Deo non parum complacitam esse, cui tam rari amabilisque prodigii gratiam fecisset. Neque statutum in hoc limite Numen; sed quem ludum ludere cum tirunculis suis inceperit, eum porò continuaturum. Quare facile produci hanc cælestis Favonii auram, etiam ultrà, posse, si parvuli conniterentur. Par autem esse, ut alumnulos rudes, quid eâ in re facto sit opus, magister ipse prius instruat. Itane verò? alios ego, quid consilii sibi capiant ad cælum expugnandum, erudiam, & mei ipsius in eodem affectando obtinendoque rationem excors non habebo? O miserè nimis, maleque locatam doctoris operam, si diu secum anxieque
deli-

deliberet, quemadmodum pueros quadrimos ad felicitatis fastigium compendio perducatur; ipse autem, ut unà pervenire, partemque talis fortunæ possit capessere, per ignaviam væcordiamque omittat! At enim debet hanc discipulis operâ doctor! Hanc debeo sanè; sed eandem & mihi, vel præ illis, vel certè cum illis, cur non debebo? Quæ quidem si eadem procurari simul utrisque potest, quid opus est operam partiri? Audendum est, dum occasio monet. Unum idemque consilium vel expediet utrosque, vel profectò neutros occidet.

66 DIXIT hæc apud animum suum BERNARDVS, & maturato opere, speique plenus, ad prætextatulos duos, *Ite vos*, inquit, ô mei, & crastino, cum luxerit, ad triclinii vestri sigma, quantum potest, recurrite; quæque soliti adhuc estis, eadem omnia instaurate: sed hospitem illum advenamque, quo de memorastis, cum etiam asymbolus accesserit, ne arcete: (quæ enim, malum, hæc foret humanitas, talem arcuisse?) quin etiam benevoli, præ ut aliàs, venientem accipite, vestraque sportulæ copiam illi, quoad ipse volet, lubentes facite. Qui tamē si denuò, ut antehac,

hac, immunis cœperit abitum parare, tum verò vos, quin abeunti, quàm blandissimè potest, inhæreatis, non intercedo. Inhærete, inquam; & modestè, ut paria vobiscum facere, & toties gratuitus conviva, suum & ipse aliquando epulum vobis vestroque doctori præbeat, efflagitate. Patrem enim habet, omnium rerum opumque copiâ affluentem, qui proinde & habet quod det, & dat, nemo largiùs; tum autem, si convivia quæramus, accipit nemo meliùs prorsus, neque prolixius. Dictum factum. Etenim isti, ad omnem nutum parere jam docti, quid aut recusare contumaces, aut differre segnes desidesque auderent?

67 Igitur simul atque dies altera cælum reduxerat, isti cum suo singuli opsonio ad ludum, nec multò post, cum tempus vocaret, ad templi aram divertunt; præcepti, quod pridie magister dederat, memores apprimè. Id loci annona miscella expromitur, moreque solito accumbitur, estur. Hic iterum redintegratum spectaculum, & quàm dictu mirum, tam visu audituque jucundum! Molitur ex templo sese, & in omnium oculis de Virginis sinu delabitur expectatus conviva, rectaque ad

ad suos; accumbit, atque epulas unà capit, carpit, edit. Dissimulant commilitones, feruntque ex composito omnia; & patienter, quod magister jussèrat, discessum operiuntur. Postremò cum, absumptis jam dapibus, satur abiturum se demonstràret, & nullius, ne tum quidem, symboli spem convivoribus relinqueret; hìc jam unus duorum candor simul in voces prorumpere, & cum hospite nondum agnito palàm exostulare, deque damno accisæ annonæ comiter placideque balbutiente propemodum ore conqueri. Alter præcipuè, paullulò quàm alter seu disertior, seu audacior.

68 Et nempe, Quousque tandem hoc? inquit; aut quamdiu spes nostras proferre, conviva, perseverabis? Num assiduè hoc erit, ut nunquam de tuo reponas? Atqui nos certè sportulas nostras, & quicquid è paupere matris penu conferre licuerat, (tenuem quidem reculam, sed tamen omnem) partiti tecum sæpe sæpius libenter fuimus; & immunis tu tamen, nondum ad nos tui opsonii quidquam attulisti; sed æquè & venisti semper a symbolus, & recessisti. Non accusamus hospitem; sed si mutuum tamen aliquid ab hospite nos
item

item expectemus, nemo fortasse nos vel sordidè avaros esse, vel rusticè inhumanos, cogitabit. Patere tu igitur, ut hodie symbolam à te aliquam, non jure quidem efflagitemus, certè autem promitti benevolè condiciq̃ue audiamus. Plus nimio compensata fatebimur nostra omnia, si convivator ad mutuas dapes, vel semel, invitaveris; nosq̃ue, & nostrum nobiscum doctorem epulo paterno, quo potes, acciperis. Dixerant hæc illi, propè adhuc ignari quid dicerent; inde, quod unum poterant, abeuntem Puerulum amico murmure profecuti, ad orbatæ matris gremium reduxerunt.

69 ELICVIT innocens duorum querela vocem infantis, ut rupto silentio, quod pueri rogaverant, prolixissimè polliceretur. Maestè animo essent: nam brevè se illis gesturum morem, & pro impertitâ sibi sportulâ *Rectam*, pro jentaculo *Congiarium*, pro merendâ *Epulum adjiciale*, de suo præbiturum: quo vel uno recreati, nunquam porrò se essent, veluti parcum & asymbolum, traducturi. Irent intereà, nuntiumq̃ue magistro afferrent, propediem futurum, ut ad paternos lares invitati, loca & lautia caperent, suprà quàm vel avari possent,

possent, vel famelici, desiderare. Addidit, diem ei se convivio dicere, illum, quem anniversarium sibi triumphanti, cælumq; repetenti, mortales dicassent. Proin alacres ad iter sese, epulique promissi lautitias appararent.

70 Hic ephebuli, etsi necdum liquidò, quid epuli futurum id esset, intelligebant: læti tamen responso, festinant illicò ad BERNARDVM recurrere, gestæque rei seriem omnem, ut acceperant, retexere; sed præcipuè epuli condicți nuntium apportare. Quæ quidem omnia, quo animi candore frontisque serenitate, & parvuli renuntiarint, & BERNARDVS acceperit, supersedeo monere; cùm in promptu cuique sit ex re ipsa conjicere, interiora ejus solatia per omnes corporis sensus illustribus indiciis erupisse. Sed hæserat tamen inter principia suspensus, & adhuc anxie, quid se uno futurum esset, BERNARDVS expectabat, donec ingenuè clareque, & ipsum invitari nominatim; & diem, quo convivium iniretur, haud longinquè abesse, docuerunt: tum enim homo insuetis efferri lætitiis, inque voces inque laudes resolvī; simul gaudii testes lacrimas fundere, simul gratiis precibusque cælū complere,

plere, & mortales de cetero curas exosus, in id modò unum incumbere, quemadmodum animo rectè ornato instructoque diem edictum præstolaretur.

71 SAPIENTER tu istud, BERNARDE (cogit enim fortuna me tua, ut serie narrationis interruptâ, te tuosque alumnulos compellem) sapienter hoc, inquam, & præclarè instituisti. Etenim, si Sybaritidas quondam accepimus, ut comparando muliebri mundo sufficerent, toto prius anno solitas invitari, quàm adduci ad civium suorum epulas mensasque se paterentur; ne, si plus æquo properassent, inter æquales comptæ minùs apparatusque comparent: quid te modò, quid alumnulos tuos æquum erat facere, qui ad Agni nuptias, Cælitumque ambrosiam & nectar hauriendum eratis invitati? Nam profectò vel hac unâ in re, vel alibi nusquam, viris decorum est, ut illis, dum comuntur, dum moliuntur, annus eat. Valeant Assueri dapes & fercula, nihil hîc neque Neronis triclinia, neque Vitellii luxus & signata nominentur. Quos cælum vocat, Deusque promisso congiario invitat, iis nostra convivium inter mera solent jejunia reputari.

72 SECUNDVM hæc agere clàm multa BERNARDVS, quàm copiosè apud alios dicere, præstabilius duxit: & aliud nimirum velle, decretæ temporis angustia prohibebant; quas norat sibi non in amicorum salutationibus deterendas, sed ad viaticum itineri parandum, concessas esse. Igitur ingruente paullatim eâ luce, (quam ipsi, tametsi properaret, tardam tamen lentam-que incusabant) hospites beati unà omnes ad templi sacrarium concedere; & forsan ad eandẽ omnino aram properare, quam felicitis arcani consciam, pactique convivii testem habebant. Associati, omnium ordinum multi comitantur. Nam tales quidem convivas, quos sciremus ad immortales epulas vocari, quis adeò segnis foret, ut comitari vel ad aras usque recusaret? Comitati sunt, inquam, alii multi. Atque ô utinam & nobis interesse tunc, videre, comitari, rei-que delicatissimæ eventum expectare licuisset! Re enim verâ, tam jucundi spectaculi scena, omnium voluptatum aliarum cupidines in nobis restinxisset. Verum, quò usque miseri votis inani-
bus ultra limites provehimur? Calcanda prius hæc horum vestigia nobis erunt, quàm ad eorundẽ fastigium pertingamus.

Non-

Nondum alteri nos Bernardi sumus, qui nostris exemplis tales nobis clientulos informemus. Quid autem nos Bernardi? ne discipuli quidē adhuc BERNARDI fuimus, à quo erudiri ad æmulas virtutes duci que nos sineremus.

73 CETERVM, ut ad institutum redeat narratio; cū BERNARDVS eo die, quem diximus, ad aram operaturus accederet, duos voluit probati candoris ephebulos adesse, qui litanti operam navarent: ut, quos communis felicitatis nuntios habuerat, eosdem & socios consortesque intueretur; simul ut hospites ad destinatum immortalitatis nectar evocandos, Christiano prius viatico, id est, cælestis epuli promulside, initiaret. Nam cui dubium est, quin tot intermediis diebus ambos ille perpulchrè, quò invitatio Parvuli tam nova pertineret; quæ ejus dapes, quæ Parentis ædes forent, edocuerit? ut tantò nimirum impatientiùs esurirent, quantò clariùs ii, quid ambrosiæ nectaris que pararetur, prævidissent. Unde facile est cogitare, magnis eos inter sacra desideriis æstuasse, & singula horæ momenta totis propemodum annis longiora cœnuisse: dum futurorum conscii, suam eternitatem

animis,

animis, ac pænè etiam oculis contemplarentur. Cum deinde, quò longius in sacris perpetrandis progressi, hoc propinquius ad destinatam hilaritatem accederent; cum in sacrorum fine denique constituti, vix passum alterum alterumque ad metam restare jam viderent; ingentes, mihi credite, motus animorū necesse est extitisse. Quorum si reliquæ ad nos aliquæ provenirent (date veniam qui auditis) alii continuo, & ab iis qui vel fuimus olim, vel adhuc sumus, longè diversi essemus, neque caelestium porrò tam socordes negligentesque viveremus. Nunc nostro, tempore dicam an frigore? impediti, hoc solum retinemus, ut hæc aliorum gaudia narrari pænè immoti audiamus.

74 AT QUI intempestivus hæc ego talia lamentor, qui historiam, ad metæ pulcherrimæ flexus properantem, veluti injecto sufflamine, nescio quid retardo. Veniendum est eò tandem, quò dudum ipsa nos rei series vocat, quando ipsi jam illi teneri se diutius non sinunt, quos mellis divini parvulâ gustatione captos, juvat ad ipsum fontem promissæ voluptatis properare. Et meritò quidem properatis, ô fortunati! Quid enim morari longius inter hæc

hæc terræ nostræ jejunia delectet, quando cælum jam epulas suas, suæque immortalitatis falernum propinat? Ite alacres aliquando, animosq; mulso cælesti irrigate; illo vos epulo pascite, illis cupediis saginate. Nos interim siti fameque lassos, unâ vel stillulâ mellis vestri, vel guttulâ beatoris, vel miculâ felicitatis, appoti vos saturique, reficite. Nihil ea de copiis vestris, nihil ex annonâ, quâ fruimini, diminuet: neque enim ipsum convivii florem audaces appetimus, sed crustulis de mensâ excidentibus contenti, reliquias cum famelicis affectamus.

75. ECCE autem! hæc ipsa dum absentes inter nos conferimus, & abeuntes convivas ultimis votis appellamus, interim, qui præsentés aderant alii, rem intuentur, incæptu eventuque admirandam. Vident hinc BERNARDVM, hinc vident clientulos BERNARDI, cum in arâ hic facere, hi servire, commodum desiissent, genibus flexis supremas preces nuncupare: & uno omnes sopore demultos, cadentibus sensim palpebris, lumina condere; mox languidas cervices humi, velut in molli pulvino, reponere, aramque ante ipsam suavissimè condormire. Condormire, inquam; sed
somnia,

somno, post homines natos, in primis felici ac beato. Somno, quem nemo certe mortem, sed exoptatæ quietis soporem, vitæque tranquillioris originem appellaret. Accurrunt tamen, qui tum aderant, confertim omnes; & turbam jacentem, ut in re subitâ, circumstant, quid acciderit, explorantes. Sed enim, quos consopitos fortuito crediderant, dum excitare nequicquam student, deprehendunt, gaudiis occupatos, felices animas expirasse. Oritur, juxta ac debuit, festa populi admiratio, tollitur multorum clamor; nulla, ut in funere solet, comploratio, sed gestiunt omnes, & opertos injectis floribus, rosisque contumulant; nemoque jam mortuos credit, quibus hæc immortalium fortuna concessa tam liberaliter fuisset.

76 ADDAMVS & nos aliquid huic tali, si vacat, spectaculo: addamus, novisque his cæli inquilinis non lessò mortuali, neque funebribus exequiis parentemus, sed tanquam triumphantibus gratulati, plausum demus; & quorum secundissimos eventus optare sibi quisque nostrum incipimus, eorundem auspicatos ingressus, morumque candorem, & pios in *Iesum* puerulum, matremque Pueruli affectus;

E

quantis

quantis maximis obsequiis studiisque possumus, æmulari, quoad vita suppetet, contendamus.

V I.

CHRISTVS in corde piæ VIRGINIS descriptus.

Ex Ioanne Majore v. Dilectio, exempl. 2. & Speculo magno.

77 **N**EQVA olim vel ætas hominis, vel sexus, conqueri de Cælitum parsimonia possit, si aut senibus solis, aut juvenum fortè nonnullis, fieri hanc copiam putent, ut ad Christi pueritiam, cominus venerandam, cum Simeonibus Franciscisque admittantur: necesse habeo, non modò parvulos jam aliquos, qui pari prærogativa gloriarentur, produxisse; sed etiam puellas virgines de hinc, quibus eadem felicitas, annuente cælo, per liberaliter acciderit, commonstrare. Audite, si qui adhuc nesciistis, & rem scitu non indignam, addiscite; aut, si qui jam antè meministis, tamen auscultate, & placidi libentesque recognoscite.

78 IN earum virginum catu, quas cum ceterarum virtutum cura sollicitas, tum autem castimonix tuendæ studia vigiles in paucis & attentas habebat, unam comperimus, præter ceteras eximiam, sic olim eminuissè, ut quamquam tredecennis, omnium ætati concederet, animi tamen ornamentis & cultu una alias omnes longè anteiret. Quo quidem in studio, gnara nec præstare aliis, neque perstare diu se posse, ni majoris tutelæ præsidii inniteretur, cæpit ad Virginem virginum omnium præsidem patronamque spectare, atque ut hanc sibi, ejusque divinissimam prolem, arctius devinciret, impensè modis pluribus laborare. Ubi sanè puella, quocunque se aliò convertisset, nusquam terrarum neque sapientius consilium, nec præsentius erat auxilium repertura: siquidem brevè post compertum fuit, plus opis eam his officiis impetrâsse, quàm ejus ipsi verecundia permiserat principiò postulare. Quid enim & prius modestè petierit, & deinde spe majus obtinuerit, utrumque, ni piget, otiosè compatemus.

79 LONGO jam tempore non obscurè puella senserat, caelesti patrocinio se, animique sui & corporis integritatem egregiè

defendi; usque adeò, ut earum rerum amores, quibus venire in discrimen pudor Virginis posset, ultrò omnes facerent. Ea propter institit cum animo suo reputare, ecquid aliud usquam exstaret, dignum, cui tutò addicere suum amorem, etiam virgines, possent. Neque hæsit ambigua diu. Nam simul atque mentis oculos ad Virginem Dei parentem advertit, commodum in ejus gremio sinuque residentē, (ô quali & quàm venustâ specie?) Christum etiamdum infantem, & à cunis adhuc recentem, & radiis mille relucentem, conspiciatur. Quo vix etiamdum conspecto, cum ter quaterque exsiliens plausum ingeminasset, & verò teneri jam, quod unum unicumque amanti conveniret, exclamasset; non destitit, à pulchræ dilectionis pulcherrimâ parente, cum precibus crebris, tum urgentibus lacrimis expetere, ut prolem divinam, quæ diligi etiam à virginibus castissimè posset, venerandam sibi amandamque præ ceteris præberet. Potuissent aliæ fortassis alia rogare, & quæ multarum stultitia est, sibi vel patritiam dotem, vel oris formæque gratiam, vel mundum certè muliebrem, humili & pudendo voto deprecari. Verum ista, non nesciens, quantum inane sibi quæreret,

quæreret, si ad viles has indecoresque merces curam demississet, elegit unum Christi amorem, posthabitis Regum cimeliis, efflagitare; quo vel solo si felix potiretur, nullius voti veniam de cetero videbatur precatura.

80 Qvis hominum ingenuorum usquam en, hæc hujus puellæ sapientissima postulata non cum ipse miretur, ut etiam laudibus apud alios, allenda continud putet? Immortales autem, benignius de iisdem precibus arbitrabimur censuisse? Ego profectò, utut alii senserint, certum habeo, adedò duram atque inexorabilem huic tredecenni virgini virginum Reginam non fuisse, ut quod illa nobis, etiam abnuentibus, ultrò liberaliterque obtrudit, id ei tam piè religioseque flagitanti fuerit negatura. Quo enim pacto negasset? Ultra imò quàm quod petere ipsa erubuerat, libentissimè concessit, dedit, donavit. Rursus hìc importuni, quid dederit donaritque expectatis? Quid imò non ei dederit donaritque, interrogate. Nam ea, quæ solum Virgineæ sobolis amorem impertiri sibi cupierat, non id modò est consecuta, ut, quod adhuc semper fecerat, Christum Dominum Deumque suum

tenerrimè diligeret ; sed ut eundem, quod nunquam adhuc licuerat , oculis quoque subiectum, in sua sibi brachia deponi ; totumque à matre prodigâ donari conspiceret. O donum Virginis illustre ! unumque omnibus & unicè expetendum ! Quis tredecennem, pænèque infantem puellam , in rebus non modò amandis , sed etiam ^{1^a} delectandis , hunc habere ~~delectum~~ ^{delectum} ? Eunt alii , & ~~quicquid~~ ^{quicquid} conditum est, interque omnia, quas terræ quisquillas, qualesque fæces, miseri, reperiunt & repertas tamen peiori delectu, cæcorum instar, arripiunt diliguntque ? Hæc interim una quid universis prudenter contemni, quid optari sapienter feliciterque amari posset, exemplo monstravit.

81. Atque utinam hîc illa referre nobis & posset & vellet, quid ab eo Christi conspectu felicitatis suavitatisque ad se dimanarit, quid animus gaudii persenserit, quid ultrò citroque colloquii fuerit. Nisi enim omnes me calculi fallunt, aliquis etiam ad nos indidẽ sensus redundaret. Quamquam dabis hanc illi veniam , ut magnitudine consolationis occupata , vacare nobis, remque gestam narrare per se ipsa non possit : poterit certè jamque adeò potuit, narravit.

narravitque) alius. Is *Ioannes* est, cognomento *Major*, vir in veterum monumentis probe versatus, & historiæ gnarus. Eum, si pro virgine hac ipsâ hodie loquentem auscultare non tædet, (quem autem rei tam sanctæ, nec auditu injucundæ, tæderet?) efficiam, uti rem omnem, velut in acta relitam, ex bonæ fidei tabulis breviter perspicueque cognoscamus.

82 ETENIM, ubi nactam sese puellam tam optatum cæli spoliū vidit, sibi quæcum virgineo Infante agendi familiariter & colloquendi copiam esse; nihil prætermittendum, ac ne differendum quidem censuit, quod ad aucupandos majoris gratiæ favores, dici fierique conveniebat. Quo in studio, ut cetera fuerit indiserta, facundam faciebat amor. Neque abnuī divinus Puer, cum ad pias ejus interrogationes quædam respondere, tum verò novis identidem interrogationibus, animi ejus sensa explorare. Quid enim, si te percontet hic, inquit, mēne tu, Deum Dominumque tuum, planè vereque diligas; quid mihi ex animi tui sententiâ es responsura? Non segnis illa; Quid aliud, inquit, ego sim responsura, quam ut prolixissimè annuam, vereque diligere, & porro dile-

cturam esse, vel jurata confirmē? Responsum præclarè, & ad rem, quâ de quæritur, aptè prorsus ac congruenter! Sed quid nunc autem, in tam beatâ quæstione, tu puella annueres? Ambularet per omnem cæli regiam hæc quæsitio, audires ubique tu nunc mentium purissimarum liquidas voces, nunc Virginum æmulantium cantus, nunc Cælitum omnium consonos clamores, sese propalàm æstimare, diligere, amare, profitentium. Fac, per terras etiam nostras hanc à Pueri suavissimo quæstionem haberi: dabit & terra hæc nostra, qui annuant; dabit, qui diligere se, quiq; amare Pueri hujus venerabile Numen vociferentur. Et magnum interim tu, ac nescio quid novum, præstare te credebas, cum idem istud interroganti responderes? Erubuisset oratio seipsam, quâ aliud aliquid respondisses.

83 ITA profectò est: non fallimur, ita est. Nam neque ipse etiam, in responso tam parco, Puerulus conquievit: sed ab eâ Virgine, quæ una præstare ceteris volebat, liberale quiddam planèque eximium expectârat. Quare altero congressu, quo luculentum veri amoris periculum faceret, hanc iniit viam; ut non dubitare se quidem

Quidem diceret, quin Deus pro eo, ac ipsa
respondisset, diligeretur: in eo tamen am-
bigi adhuc posse, quanto opere, quamque
impensè supra res alias diligeretur. Hic
tu, puella, quid iterum dicas, etiam atque
etiam, si sapias, attende. Agitur rei magnæ
comparatio. Veniunt in litem hanc, aurum
& gemmæ, veniunt parentes, & cognati
sanguinis umbræ: veniunt honorum vo-
luptatumque illecebræ, veniunt vitæ cor-
porisque curæ. His omnibus conferas tu,
præferasne, hoc Pueri Numen, specta-
mus. Multas olim, nec tui dissimiles, sci-
mus, cum hæc pugnanda pugna propone-
retur, meru perculsas, constantiâ mutasse;
dum ab Dei amore alias divitiæ divulsere,
alias favor transverfas, alias calamitas ege-
re; nonnullis demum vanissimæ spes, ac
somnia divortium persuasere. Tu, talium
exemplis territa, quid respondebis? Videor
hic mihi audire exclamantem: Quid mi-
seram hac lite cruciatis? Probrum hoc Vir-
ginis est, interrogari: quantò turpius,
etiam dubitari? Tanquam aut ita cæca sim
ego & demens, ut apinas ego tricasque
cum Deo? aut ita stolidè improba, ut
etiam præ Deo? Tollite convitiū, molesti,
Monstrata s'q; Mida Cræsiq; recondite gazas:
E 5 Omnis

Omnis in hoc puero condita gaza mihi est.

Et viles, quater ampliusque viles

Isto præ Puerò valete gemma:

Tuque ô tu genitor, mei que quotquot

Usquam sanguinis estis, & fuistis,

Vni cedite: plus amamus unum

Vobis omnibus omnibusque JESVM.

Teq₃, ô blanda nimis, teq₃, ô quacunq₃ voluptas,

Charior est omni te meus iste Puer.

Charior iste meo Puer est mihi corpore, & ipsis

Mi Puer est oculis charior iste meis.

84 DIXIT hoc illa, seque omni examine defunctam rata, non dubitavit, quin Christo ad alteram ejus quæstionem satis jam superque fecisset. Ceterum, ut hoc tibi tu persuaseris, Puella; mihi profectò nondum, ne sic quidē, persuasisti. Itane enim, præparca? nihil uspiam tu pretiosius reperiebas, quicum præstantiam amati Numinis comparares, quam caduci corporis vitæque tuæ mortalitatem? Multi sua quondam corpora oculosque parvo vendiderunt, multi ultrò projecerunt, multi nunquam ne adamarunt quidem; & rursus magnum tu tibi amorē professā videbere, si præ corpore tuo oculisque, cæleste Numen diligere te proficere?

85 Sic ego fortassis perorassem, si litis
captus

captus arbiter fuisset. At Puella, quasi jam arbitrum interpellantem audisset, ad novam, ecce, deliberationem animum inducit; & secum ipsa, ecquid oculis etiam suis pretiosius possideat, anxie requirit. Reperitque sagax in corpore suo, quod & oculis præferre haud dubie posset. Inde lætior, *euennæ* profectò, *euennæ*, quod diu quæsitum ieram, habetur, exclamat:

Quæsitum est oculis aliquid mihi charius ipsis.

Charius est oculis cor mihi, corde Puer.

Nam quid charius homo pensiusque sibi de se toto reservet, quam cor suum? Hoc tamen ipsum, quantulum id cunque est, ego tuis amoribus postpono. Et, ô aliquid mei, vel corde adhuc ipso propinquius mihi conjunctiusque restet! illud omne quantis intervallis ego post te relinquam? Sic illa. Et quis nostrum, Puerulo cælesti vel hic tandem satis esse factum negaret? Negavit ipse: & quò majus adhuc amoris indicium eliciat, tertium instat percontari. Nam, Ut multum, inquit, iudicio tuo tu dixeris, cum Deum plus oculis tuis, plusque ipso corde diligere te dictitasti; nondum tu tamen, quantò plus istis etiam ipsis illum diligas, ostendis. Etenim si non modò æquè, sed paullulo quoque amplius dili-

Omnis in hoc puero condita gaza mihi est.

Et viles, quater ampliusque viles

Isto præ Puerò valete gemma:

Tuque ô tu genitor, mei que quotquot

Usquam sanguinis estis, & fuistis,

Vni cedite: plus amamus unum

Vobis omnibus omnibusque JESVM.

Teq₃, ô blanda nimis, teq₃, ô quacunq₃ voluptas,

Charior est omni te meus iste Puer.

Charior iste meo Puer est mihi corpore, & ipsis

Mi Puer est oculis charior iste meis.

84 DIXIT hoc illa, seque omni examine defunctam rata, non dubitavit, quin Christo ad alteram ejus quæstionem satis jam superque fecisset. Ceterum, ut hoc tibi tu persuaseris, Puella; mihi profectò nondum, ne sic quidē, persuasisti. Itane enim, præparca? nihil uspiam tu pretiosius reperiebas, quicum præstantiam amati Numinis comparares, quàm caduci corporis vitæque tuæ mortalitatem? Multi sua quondam corpora oculosque parvo vendiderunt, multi ultrò projecerunt, multi nunquam ne adamarunt quidem; & rursus magnum tu tibi amorē professā videbere, si præ corpore tuo oculisque, cæleste Numen diligere te proficere?

85 Sic ego fortassis perorassem, si litis
captus

tus arbiter fuissẽm. At Puella, quasi arbitrum interpellantem audisset, ad eam, ecce, deliberationem animum in-
it; & secum ipsa, ecquid oculis etiam pretiosius possideat, anxie requirit. peritque sagax in corpore suo, quod & illis præferre haud dubie posset. Inde ior, *εὐγεννα* profecto, *εὐγεννα*, quod diu esitum ieram, habetur, exclamat:

*Quæsitum est oculis aliquid mihi charius ipsis.
Charius est oculis cor mihi, corde Puer.*

nam quid charius homo pensiusque sibi se toto reservet, quàm cor suum? Hoc enim ipsum, quantulum id cunque est, tuis amoribus postpono. Et, o aliquid mihi, vel corde adhuc ipso propinquius mihi conjunctiusque restet! illud omne tantis intervallis ego post te relinquam? illa. Et quis nostrum, Puerulo caelesti hic tandem satis esse factum negaret? egavit ipse: & quò majus adhuc amoris licium eliciat, tertium instat percontari. nam, Ut multum, inquit, iudicio tuo tueris, cum Deum plus oculis tuis, plusque corde diligere te dictitasti; nondum tamen, quantò plus istis etiam ipsis il-
lum diligas, ostendis. Etenim si non modò
què, sed paullulo quoque amplius dili-

geres, quantuli demum amoris ea mensura foret? Indicanda sunt excessus intervalla: quæ nisi totis non dicam plethris iugerisque, sed parasangis, etiam dimetiariis, usque quàm longè hîc Dei amor amoris cordis antistat, ostenderis, parum amasti.

86 HÆSIT hîc perturbatâ difficulti questione virgo: & cum certi, quod pro se diceret, nihil invenisset, ad capiendum cordis sui testimonium provocavit. Habent suas, inquit, etiam corda linguas: habent, cum necesse est, & voces, sed tibi, & tibi soli, intelligendas: aliquid & scribere fortasse norunt, ut quicquid verbis eloqui nequeunt, litteris characteribusque significant. Age sis ergo tu, priorque cor ipsum, ut pro testimonio in hanc rem dicat, interroga. Tu verò cor meum, si quid potes, causam perora, meque obmutescente, disertè, quantis intervallis te ego post divinos amores meos reponam, effare. Egit hoc illa, dixitque; sed longè ardentius potentiusque, quàm referre vobis hæc mea possit narratio. Et tamen audite, quid ex templò, cum hæc vix dum finiisset, acciderit: audite rem oppidè novam! agnoscite litteras, verba, vocem, quâ loqui de cælesti amore etiam corda didicerunt. Nam confestim,

confestim, ut hæc dicere Puella desit, ecce miraculum! Languescere continuo vires, mutari vultus, deficere sensus, humique defluere corpus, & medio in corpore, COR innocentissimæ virginis, ingenti miraculo disruptum, cæpit pro pulcherrimo castissimoque amore, gravissimum testimonium dicere.

87 NON potuit Virginem mors tam properata opprimere, quin alios in tempore adverteret, qui conspicati lapsantem, animamque inter gaudia exhalantem, certim accurrunt, & obsequiis, quibus æquum est, insperatum cadaver attollunt. Latent rei mirificæ signa: odor ambrosius, color in mortuâ, quem magno sibi meriti etiam vivi cupiissent: denique habitus corporis talis, ut nescio quid immortale tam in morte assimularet. Quæ omnia tamquã per se ipsa non ignobilis causæ, & mortem accersisset, indicium prodedit; evicit tamen multorum iusta curiositas, ut latentes abditaque origines, quæret, oculis indagarent. Eam ob rem, res, (inquit Historicus) viri religione trepidantes, & S. Dominici sequaces, solleter vigilant, ut, quicquid causæ fuerit, veruatur. Ita dato mox negotio, præ-

cordia Virginis ferro tenui modestè honesteque recluduntur, & quid intus repètè turbaverit, inquitur. O rem, iterato miraculo, sed ab omni memoriâ inaudito, stupendam! Inveniunt COR nullâ acie ferri, nec morbi contagio violatum, sed amoris impotentiâ violentiâque ruptum, crepuisse, & bipartitò diffusum, hiatu memorabili fatiscere. Spectatorum hîc alii, ut in re subitâ, exclamare; aliqui attoniti, panè diffugere, nisi mox tertium illos prodigium retraxisset: tertium, inquam; sed per fidem vos vestram, cognoscite paulisper, quale. In ipso disrupti cordis meditullio, litteris aureis, inscriptum dicam an cælatum? Dicam utrumque: inscriptum cælatumque litteris aureis inveniunt hoc Epigramma: *Sic diligo mi JESV te, ut diligam plus te quam me.*

88 O nobilem Epigrammatis aurei poëtriam! ô & ingenium subtile, quò lucubratum, & manum elegantem, quâ exaratum est tam illustre carmen! Erubescite vos Nalones, vestrosque abesse Pyramos ac Biblides jubete: tuq; alter passeris tuos, tuque tuas Cynthias expunge; & si qui alii Délias quondam Lesbiasque scripsistis, habete pudorem aliquando, & præteritos furores

furores spongiâ castigate. Vos verò Adol-
lescentes, hoc vestri carminis argumentum
sumite, merosque (non pugnamus) amores
scribite; sed scribite tales, quales in hoc
Virginis libello expressos legitis; eosque
pari & pennâ & chartâ lucubrate; si in cæ-
lestis bibliothecæ forulis reponi, si in pre-
tio ibi haberi, si lectitari à divino Puerulo
vestra olim poemata desideratis.

V I I.

CHRISTVS Puerulus ab Agnâ Poli-
tiana despoliatus.

Ex Philippo Ferrario de SS. Italia, &

P. Stephonio de Agnâ.

REM annis abhinc ferè trecentis, in
terrâ Italiâ celebrem, gravibusque
testimoniis, uti gesta est, exploratam, af-
fero: quæ, quando ad excitandos rerum
ternarum amores, animique non inanes
licias comparandas; quodque caput est,
maiores Christi glorias hæud dubiè va-
leat; estque cum à ludicro cælesti sanc-
tiva, tum eventu memorabili admiran-
ti; tam ego non committam, quin bre-
viter, qualicet, ordiar narrare.

90 Mons in provinciâ Hetruriâ est, Politianus; Agnæ, de quâ dicemus, solum natalè. Is locus, uti cetera jam olim non obscurus, ita ab AGNÂ præfertim, hac virgine, recentibus est ornamentis mirificè illustratus. Erat ei puellæ, si generis splendorem censumque exceperis, ingenii rerumque aliarum abundè; at opes animi, virtutesque suppetebant tantæ, ut eas crederemus non patriæ soli nobilitandæ, sed vel toti Provinciæ locupletandæ suffecturas. Vix fari dum ea per ætatem quiverat, jamque sponsi nuptiis maturefcere, eoque magnis assiduè desideriis ferri, quamquam infantula, incipiebat. Ubi tamen, cum nuptias auditis, nolite, quæso, profanos mortalesque thalamos somniare, sed nuptias Agni, felices illas beatasque cogitate, quibus Virginum pudicitia non sanè delibatur, sed fovetur castimonia & exornatur; nec iis lectuli geniales instrui, sed vota mortalia fastidiri, mentesque à gaudiis labentibus divertere, & voluptati bellum indicere, & veris æternisque bonis insistere docentur. His talibus Agni nuptiis, hisque thalamis, AGNA se Politiana jam inde præparabat.

91 De quo ipso apparatu, si rursus ego, quis

quis qualisq; fuerit, interrogâro ; rursus
ego neminem fore arbitror, cui in men-
tem hîc veniat, aut colli monilia, aut anu-
los armillasq; manuum, aut crinium onera
uniones suspicari. Faceſſite ab hiſce nuptiis
hæc procorum illicia. Potuerunt hoc olim
lenocinio Thaides fortè Bacchidesq;
placere , & tot ſibi mendaciis perituros
amores nundinari : noſtra hæc neque tor-
quium mæandros circumdare , neque di-
gitos gemmis accendere , neque ab auri-
bus inſuevit baccas ſuſpendere , dota-
les Veneris appendices . Has enim formæ
conciliatriculas , ne ipſa haberet , paren-
tum felix inopia ; & ne etiam habere cu-
peret , felicior ejus modestia ; ac denique
ne iis indigeret, ſponſi opulencia liberali-
taſq; faciebat. Cultus igitur ornatusq;
non alius illi, quàm à virtutibus erat. Hac
ſolâ ceruſſâ genas formamq; inſtruxerat,
hac purpurâ veſtem ſibi mundumq;
muliebreſ compararat ; gnara , ad ſponſi
amores adſpirare ſe meliori artificio non
poſſe , quàm ſi ſuus innocentiaſ vigor ni-
torq; ſervaretur. O factum puellæ ſuprà
quàm ætas poſtularet, maturũ ac ſapiens !
Fuit enim id ejus inſtitutum non rationi
magis religioniq; conſentaneum , quàm
exitu

exitu lato successuque comprobatum. Atque ut intelligatis, quænam his inceptis eventa responderint, auscultate.

92. POST quàm hac Virginis indole, hisque tot ejus studiis Christus non potuit non vehementer delectari, cœpit paulatim etiam ipse ad consuetudinem, propè familiarem, descendere; tantisque argumentis mutuum amorem proderè, quantis optare clariora, neque mortales à Superis auderent; nec polliceri mortalibus Superi possent. Nam istud, quæso vos, cujus amoris indicium dicetis fuisse, quando suam ipse matrem Virginem, cum pulcherrimo, quo licuit, comitatu, ad AGNAM jussit invisere? ei que, ceu felicem pronubam auspicatorum filii sui Hymenæos gratulari? Vidissemus ad hunc ejus comitatum, omnem cæli regiam exciri; & astris ancillantibus, hinc Lunam infra pedes subire, inde Solem caput ambire: hic virginum choros stipare latera; hic aligeros ephebos legere vestigia, dum ad clientem puellam gratulatura Mater descendebat, ut sponsi propediem adfuturi sive spem ei faceret, seu certè desiderium leniret. Et leniri profectò, quamvis ingens desiderium, ex hoc prænuntia Virginis aspectu debuisset, poteratque

ratque moræ cujusvis tædium hæc oculis
objecta venustas superare. Nam nos, opi-
nor, si quâ guttulâ roris istius mellei per-
spargeremur, omnes continuò fieri im-
mortales à liquore tam ambrosio videre-
mur. *AGNA* hujus pertinacissimâ sitim,
iive fas est appellare infinitam cupidita-
tem, non modò temperare hic Virginis
adventus conspectusque nequirit, verum
auxit etiam, & acrius inflammavit.

93 *JAM* ex adverso puellæ, sed vicina
restiterat, vultu habituque tam divino, ut
luce verendâ mortalis acies suavissimè re-
tunderetur, utque ne *AGNA* quidem jam
posset, quin cunctam cæli venustatem in
oris unius lineamenta consensisse judica-
ret. Postquam verò sagacibus oculis bra-
chia sinumque Virginis perlustrare, & va-
cuas videre ulnas contigit, ita ut nusquam
in materno complexu filius, sed orbatum
cognato pondere gremium appareret:
enimverò tum vocem non tenere impa-
tiens amor, sed in querelas & lamenta pa-
lâm erumpere, inque rei formosissimæ spe-
ctaculo divinius adhuc aliquid formo-
siusque desiderare. Desiderare autem? imò
signis haud dubiis, ac pænè etiam verbis,
præquam liberè audacterque flagitare.

Itane

Itâne verò, Puella? Tu formam hanc talem, delicatula, fastidire? tu serenissimioris immortalem elegantiam rejicere, & quam inquilini Cælites unam omnes inueneri mirarique non desistunt, eam tu oculis mortalibus impare? Circumspice te prius, & quantam ignara fortunam repudies, perpende. Invitat augusta Virginis species, nec advertis? ultrò sese adspectui tuo subjicit, neque tu avertis? & quousque tandem iussa suspicere non obedis? Non impero mihi, Puella, quin accuserem. Tu crimen hoc tuum ut purges, aut alibi quære patronum, aut hîc per te ipsa, si confidis, cælo iudice perora.

94 Quid enim, si Virginem nunc audias ipsam (quæ quidem adhuc modestissimè tacuit) sic tecum exoptulantem? Ego te, AGNA, mortalem adhuc & imparem, immortalis diligere; ego cæli terræque Domina, in clientelam te meam suscipere; ego meæ te familiæ adscribere, ac demum (quod quantis aliorum desideriis negatur?) intervîsere ad te dignata; hoc amoris meritiqûe mei præmium abs te reporto, ut à conspectu, veluti contempta, jubeam facessere? ut plebejum in modum repudiata dimittar? ut fastidita propemodum repellar?

Equidem

Equidem si clientis ope operâque egerem, nondum à Cælestibus ita sum deserta, ut emendicanda mihi homuncionis obsequia crederem. Sunt Gabrieles adhuc, ad meos mihi nutus intenti: sunt aligeræ purissimarum mentium legiones, meis imperiis assuetæ: exspectant Catharinæ, adsunt Cæcilix, circumstant Agathæ; ac ne tuum te nomen efferat, præstolantur aliæ jam nunc Agnæ; & mille Virginum unum hoc votum est, mihi semper adstare, nusquam à latere meo, nusquam ab ore nutuque discedere. In hac ego tam amplâ familiâ, quam hominis aut operam Domina, aut obsequium Regina, aut honorem amoremque Mater desiderarem, ut huc me demittere necessarium foret? Demisi me tamen, & animi sponte (quod multis ne rogata quidem soleo) tibi conspicua fio, te ad congressum admitto, in colloquium invito, prope etiam in comitatû adiscisco. Et his tot meritis meis delusa, quid modò profeci? Nempe, ut quæ omnium desiderii credebar sufficere, puellæ unius fastidiis dicar non suffecisse.

95 Hæc, & his graviora, si conqueri Virgo instituat, tu quid dices? quid consilii, ad purgandâ injuriam hanc, tibi capies?
quo

quo patrocinio causam afflictam defendes? Interim hæc ipsa dum pluribus hic disputo, & mecum, ecquid causatura sit AGNA, exspecto; audire Puellam ultrò nunc videor, cetera non valde verbosam, hac unâ in causâ orandâ, supra sexum disertam & eloquentem. Reperit enim acuta, quod non modò in Virginis aspectu requireret, sed in ejus etiam oratione refutaret. Nam, Gestiant, inquit, optentque cæli Proceres hos tuos venustissimos vultus intueri; pendeant ab oculis Gabrieles, sociæque mentes; insuper & Magdalena cum cæli gynæceo inhient, tuque omnibus formosior in parthenone tuo triumphes: non abnuo, multis me causamque meam testibus oppugnas. Ego tamen, cum ab his tot tantisque dissentio, & in hoc formæ tuæ nitore (dâ veniam Virginum pulcherrima) requiri adhuc aliquid affirmo, majoribus exemplis & testimoniis me tuebor.

96 ETENIM, si adèò te ego non contemno, ut in hac ipsâ lité tuum unius arbitrium, cunctis aliorum judiciis longissimè antepōnam; quid erit, in quo factum meum consiliumque reprehendas? Certè autem, quid tui de temetipsâ judicii sit,

adèò

atque nunc tu dissimulasti, ut illud cognosci facile deprehendi que non solum ab aliis potuerit, sed à me quoque proferri palam objici que nunc possit. Nam cujus tu unquam artificis voluisti aut penicillo pictam imaginem tuam, aut cælo elaboratam statuam, probare; in quâ steriles tibi ulnas, orbosque sinus, & otiosas à filii complexu manus reliquisset? Quod uspiam sigillum tibi, tametsi gemma faberime cælatur, & vel Lysippi ingenio, vel Mentoris artificio clarum, non evuluit confestim, ac prope (si fas est dicere) fordui, simul atque insidente hac filii tui sarcinâ caruisset? Et pridem hæc tua vel excepta mihi vox est, vel credita non absurde, acceptaque pro tuâ, quâ clamitaras,

*Absque meo quicumque voles me pingere nato,
Me sine me potius pinge, dolebo minus.*

Paterere jam vocis hujus vel sensum conjectare nos, vel causam certè suspicor. Fallor enim, aut nunquam poteras ne tu quidem satis placere tibi, nisi in gremio filii circumferre te videres. Ignosce proin, Virgo, trahimur exemplo, & Dominam clientes imitatur. Si crimen est, in pulcherrimâ parente pulchriorem filium, id est, inter Virginis brachia Deum infantulum

lum desiderasse; accusa, ut, ut voles, confidentem, sed imitantem absolve.

97 PERORAUERAT Puella, & Virgo jam placatior, ut accipere se argutam excusationē ostenderet, cœpit renidenti vultu blandum annuere: &, testandæ munificentiae suæ, tres è sinu gemmantes uniones, quos AGNÆ dono memorabili impertiret, expromere. Isti verò ut primùm è sublimi reluxerunt, potuit illicò & adamantis candor erubescere, & smaragdi viror perire, & totus pyropi fulgor exstingui; cum se viderent omnium gemmarum pretia à tribus unionibus triumphari. Saltem hîc jam vultus erige tuos Puella; protende sis manus, explica confestim sinus: quid languida cunctaris? accipe, inquam, & conde gratuitum donum. Nemo Regum olim tam satur fuit, quem accipere has opes piguisset. Tu sola nec gemmas æstimas imprudens, & uniones pertinax recusas? Imò enim accipio libenter hos, inquit, & verò multimodis omnes exosculor. Nam hujus

*Qualiacunq; manu dentur mihi Virginis, illa
Vilia sint quamvis, mihi erunt tamen omnia
gemmae.*

Interim, ne quid veri dissimulem, est, quod etiam in hoc tam liberali munere, avara,
mihi

mihi requiram. Sentiunt oculi, dolentque, unam adhuc in tot unionibus abesse gemmam: sed gemmam, ô & unionibus istis, ô & pluribus aliis, & omnibus denique omnibusque gemmis chariorem! Neque exspecto hîc porrò, dum sciscitare, Mater, ecquam mihi gemmulam adhuc requirā: occupo quæstionem, clareque, tuum in ulnis tuis infantem ajo requirere. Quidni enim illum? Ibi meri pyropi in oculis, ibi adamantes in genis, ibi chrysolithi in capillis: quid multa? ibi omnia mihi, & omnia gemmæ. Hanc unam mihi munifica gemmam trade, atque has alias alteri, cui placebunt, omnes elargire: aut unam hanc mihi si negare perseveras, ignosce fastidienti, abduco & istas.

98 NONDVMNE, (vestram fidem!) non-
dum hîc obstupescitis , cùm hunc hujus
tantum amorem, tot documentis comper-
um, & adversus omnes Virginis molitio-
nes invictum videtis? Ego profectò, ut de
ne confitear, immutatus , transeo in par-
es : & cujus AGNÆ pertinaciam adversa-
ius incusâram, ejus constantiam patronus
admirari porrò, tueri laudareque insistam.
Quânquam, quid etiam égeat hoc defen-
sor, non video, cùm ipsam ei Virginem
F ultrò

ultrò reconciliatam, & repulsæ prioris oblitam, patrocinari jam, susceptâque causâ favere, manifestò deprehendam. Favit omnino: idque quàm liberaliter ac prolixè, ex eo licet intelligatis, quòd, cum repudiata paulisper divertisset, haud multò post ad eandem instructior comitatioque rediit, gestato in ulnis, monstratoque, ut AGNA desiderârat, Infante filio: & alterum formæ suæ periculum factura, ecquid vel ita jam placeret; an aliquid puella fastidians etiam nunc in se requireret, expectavit.

99 AGNA, conspecto maternis in brachiis Infante, excitata, confestim occurrere, & genibus advoluta, modò Virginem blandè, modò Virginis prolem, modò utramque supplex ambire: multa jam huic jam illi promittere, omnia movere, nihil non agere, ut ad osculum pedibus libandum, ut ad colloquium ferendum, ut ad oculos præsertim intuendos (nam horum immodicâ luce verberabatur)mitteretur. Nec abnuir fortuna. Quid enim ultrà posset tam importunæ violentæq; clienti aut mitissima Parens, aut suavissimus Infans, denegare? Admittitur AGNA. Quæ votis omnibus damnata, cum licere sibi

grandia videret, quid omnium primum, quid secundum tertiumque eligere, ambigebat; propè ut inopem se fieri à copiâ quereretur. Nam ubi oculos ad divinissimi venustatem adverterat, gestaque ebori Libyco, malisque marmorario certantes, & labella minio purpurae & crines atro radiantes viderat; puella, spectu rei formosissimæ capta, omnium ceterarum immemor, tota esse oculus delectabatur. Tum ut manus deinde licuit orare, ut pedibus osculum imprimere, primoribus labris plantas contingere; & rursus omnes corporis partes unumquodque labellum fieri gestiebant. Certè autem, ubi cum Puerulo sermones illa contingeret, ubi imò Puer ipse blâdissime respondere, & mellitis cœpit vocibus in aures inuolare; credam equidem, membra iterum omnia modò in linguas converti, modò in aures mutari æmulâ contentione voluisse. Quid dicemus, si etiam sinu excipere, si in ulnas sustollere, si manibus, brachiis, complexu involvere hanc Numinis infantiam contigisset; quid omnia iterum membra, dicemus, aliud quàm sinus, ulnas, manus, brachia esse cupiisse?

100 O æmulationem verè amicam &

suavem ! In quâ utinam & nos, si nondum oculos sinusque nostros (quibus in hæc comitia sese ingerere negatur) saltem animos esse competitorēs sineremus ! Nam permittite, quod sæpè jam feci, etiam hîc intempestivè conqueri) quousque nos inter AGNÆ hujus studia torpescere segnes, & stertere perseveramus ? Quàm lentè ad hæc spectacula non dicam intuenda, sed eminus saltem cogitanda adrepimus ? neque ut hæc aliorum gaudia pauxillum degustemus, aut in partem consolationis aliquam adsciscamur, laboramus ? An ergo nos, qui æquè Virginis nostræ clientuli sumus, nullum nobis jus aditumque ad hanc ejus Prolem vindicamus ? Matrem imò jam ipsam plerique sibi devinctam habemus; ejusdem familiæ adscripti, inque nomen ejus jurati pridem vivimus : cur alienos adhuc à filio extraneosq; esse nos, malo pravoque judicio, reputamus ? Nisi fortasse, quò pervadere studium puellæ potuit, adolescentium conatus ne adspirare quidem audebit. O iterum ergo nos, non jam ridendos, sed multò justissimè deplorandos, qui sexu tam debili victi prostratiq; desperamus.

— 101 VERVM intereâ ut in viam revertamur,

mur, videte, quid adhuc majus hæc sive audacia puellæ, sive impotentia, in Deum infantem sibi sumpserit. Pendebat à niveâ Pueri cervice, & ad umbilicum defluebat gemmeum admirandi operis pretiiq̃ue monile, in Crucis effigiem faberrimè cælatum. Id AGNÆ constantiam, quâ dudum uniones opesq̃ue spreverat, omnem momento temporis labefecit, ut mutatâ sententiâ cœperit primùm oculos adjicere, deinde animum advertere, mox pretium artemq̃ue mirari, tum prorsus appetere, & manus adeò quâ parte clàm injiceret, cogitare; ac postremo (quid enim verum dixisse reformidem?) pensilem ornatum, crucemq̃ue gemmeam, rupto catellæ vinculo, de Pueruli collo surripere; & verbo denique unò furtum in oculis divinæ Parentis manifestum consciscere. Facinus, à puellâ novum, & nescio an post homines natos alibi factitatum! Quò te iterum hîc, AGNA, præcipitas? Huccine rerum audacula progredieris, ut etiam furti, furtiq̃ue talis, alligare te non erubescas? nisi tu sola fortassè furtum hoc esse inficiaris, quod quisquis alius designasset, sacrilegium esse propemodum vociferaremur.

102. At enim intelligo, quam facinoris

purgandi rationem afferas. In joco, inquis, ludoque id feci. Itane, simplex, excusas? Quid ergo faceres seria, quæ jocando etiam ludendoque perpetrare furtum didicisti? At amor certè, ut hos mihi animos sumerem, audacem fecit! Accusas iterum, non defendis, puella. Nam ad quæ non audenda furor iraque impellerent, quando potuit ad sacrilegium amor movere? & hostibus, oro, quid irata relinqueres, quæ etiam sponsi tui spolia, hæc inquam monilia, impunè sublegenda tibi existimasti? Igitur aut culpam nobis ingeniosius purga, aut causâ cecidisse te confitere. Quanquam si consilium non aspernaris, annitere paulillum adhuc; reperiemus fortasse colorem, quo pallentem hanc possis causam animare. Dic enim audacula, amantium fortunas partibus communes censerî: nega, scienti volenti que irrogari injuriam posse: causare, monile quid aliud fuisse quàm crucem. Atqui Crucem ab ejus cervicibus pendere posthac non debuisse, qui dudum illam in humeris suis bajularit, æquum videri, ut hoc onere sublevatus, aliis aliquando portandum id relinquat. Adde, non decuisse, ut recessurus Crucem cælo secum inferret: idque adeò ne fieret,

operam

operam hanc illi dedisse te ; & patrocinnante manu cervicem ejus despoliasse. Horum tu , inquam , si aliquid ingeniosè , prætexeres , facti injuriam credulo Infanti fortassis excusares.

103 SED ista nos utique vani , nec valdè ferii , certè autem feri , quid exprobramus ? AGNA interim pretioso monili potita , quàm id innoxie religiosèque surripuit , tam præ sanctèque furti crimen , furto hoc ipso , excusavit ; accusanda prorsus à nobis & increpanda , ni rapuisset. Mihi profectò , ô utinam par hodie aut facultas peccandi , aut voluntas suppeteret ! Non contentus ego sola Pueri hujus monilia sublegere , ipsum in Matris complexu Puerum invadere , ipsum abstrahere , eripere , deripere conarer ; nullo quondam sacrilegio magis impunito. Interea loci tuo , AGNA , & exemplo , quod video ; & patrocinio , quod spero , defensus , votis saltem desiderisque optare non erubescò , quicquid reipsa fecisse te , cum felicissimo successu , adverto.

VIII.

CHRISTVS Puerulus cum Cruce, &
cruciatûs sui insignibus.

Ex Veteri nobiliq̃ue Tabulâ.

104 **Q**VI Servatoris, etiamdum infantis, ora habitusq̃ue penicillo figurarunt, operâ in eo multam posuerunt, ut, quod de Timante proditur, earum imaginum color plus animis impressisse, quàm oculis subicere crederetur. Specimen hujus alii aliud sibi sunt facilè reperiuri; mihi nunc istud, quod hîc percenseo, jucundum in primis est observasse.

105 IN pinacothecam fortè, picturis insignem, bonæ mentis adolescens intraverat: in quâ cum veluti meditans obambulasset, & modò supinus expictum lacunar suspiceret; modò parietî adversus, quædam præter cetera mirari se probareq̃ue ostenderet, in aliis, quasi addubitans hæsitaret; opportunè factû, ut eum Senex, homo non illiteratus & pius conspiceret. Is applicat lateri sese, & comiter, ecquid videatur, interrogat. Ille, Captus hac artis, inquit.

inquit, operisq̃ue formâ, & vel maximè
pictorum hîc amulantium pugnâ otiosè
me delecto; ubi tamen nullo neque
Zeuxidis ego nec Protogenis labores vi-
deo (quid enim aliud isti, quàm aureos
imbres, & Ganimedes, adulterosq̃; Joves,
olim pinxere?) colores tamen hos, si quid
intelligo, nullo neque Apelle nec Parrha-
sio censeo indignos: eoq̃ue visu jucundio-
res, quò longius à fabulis illis probriq̃ue
animandis recellere. Nam, ecce, quo me
cunque converto, vèrecundiam pictoris
cum colore suo, & manum artemq̃ue cum
naturâ hîc video decertantem. Et quantò
proinde honestius his tabellis suis cuique
artifex, quàm Cœ Veneri suus, inscribe-
retur? Nunc plerique ignorantur hi nostri,
dum alii per operum suorum dedecora in-
claruerunt.

106 At eos ego non omnes patiar, in-
quit Senex, ignorari: certè aliquos faxo,
judicio meo tu noscas. Inde tabulas alias
ex aliis commonstrat: &, ut quæque ob-
viàm erant, cujus illa artificis ingenio vi-
veret, quid ætatis illa famæq̃ue haberet,
quantiq̃ue fieret, ostendit. Erant, quibus
pretium penicillus *Urbinas* fecerat: erant,
quæ suo sibi *Bonarctæ* gloriarentur; doctâ

manu, & nulli veterum concessurâ : non-nullæ ad *Tyreros*, & *Titianos* ; aliquæ ad *Rubénios*, clari nominis artisq̃ pictores, aliæ ad alios sese, non pudendâ origine, referebant. Sed iis insuper habitis, adolefcens, In unâ, inquit, hac tabellâ (ut aliis suæ cuique laudes seruentur) mirum est, quàm vel artificis ingenium, vel ipsum rei argumentum blandiatur. In ceteris, quas adhuc demonstrasti, fateor nec artem mihi nec inventionem displicere ; verùm ad hanc tamen omnes illæ, cum primùm respexerint, nescio quid erubescunt : ut adeò hæc sola, dum ceteras intuemur, etiam loqui nobiscum, clareq̃ audiri videatur. Et credam, ejus ego inventorem aliquid supra reliquum vulgus sapuisse ; nec solâ manu & arte, sed animi præsertim affectu, usu in hoc opere fuisse. Nam vide sis, ut extrema hæc lineamenta ad vitæ similitudinẽ, non magis penicillo, quàm naturâ conformantur ! & minimum est, quod ipsa quodam modo vivunt ; etiam oculos sensusq̃ ; nostros animant, transfusâ, quam simulant, vitâ.

107 Ego tecum, inquit, hîc sentio, Senex : & ipse plaris hanc alius jam tum feci, cum coemptam huc olim intuli ; dignam,

gnam, cujus auctor inter has alias proderetur. Neque cura defuit ut indagarem, sed omnia perquirentem, via destituit: nisi quod hanc ejus qualemcumq; originem, ex hospite Belgâ, qui hujus inspicundæ copiam rogarat, novissimè comperi. Eam ipsam tu, cum audies, scio, vehementer apud probabis. Ego verò audiam, & lubens. Simul Senex, In Athenæo, inquit, principe Poëta nobilis versus tragicos, dramaticum, & ad hos animorum motus per idoneum, lucubrarat. Argumentum ei erat Christus, qualem hîc vides, parvulus adhuc, ultimæque infantiae propinquus. Hunc prodeuntem in scenam, alites ephēbi ferè æquales, magno numero comitati, quid ille fieri ab unoquoque vellet, expectabant. Vestis erat, togula pura: quam ipsam ad latera, ne laxius efflueret, paupere cinctu funis adstringebat; reliquum togæ, etsi ad talos defluens, tamen extrema pedum nudabat. Ad hæc apertus capitis vertex, & effusa per humeros cæsaries: deinde frons, oculi, vultus, ac denique incessus, quales sibi & occulti Numinis majestas, & pueruli spectati modestia requirebant. Hic ergo talis, ubi sese in proskenio theatri circumspexit, vocem (ut ego accepi) in-

hæc verba, aut horum similia, placidissimè resolvit.

108 QVOD magnis hominum querelis postulatum esse vos meministis, ut roraret cælum aliquando, ruptisq̃ue nubibus illum in terras imbrem effunderet, quem unum tot annorum sæculis omnes expectarant; id impetratum nunc esse concessumq̃ue mortalibus, clarissimè videtis. Valüere assiduæ preces, meq̃ue cælo deductum, hîc, ut morem volentibus gererem, openq̃ue laborantibus ferrem, pertraxere. O quantis illi se sentient gaudiis cumulari! & quid eos illiq̃d dicturos, simul ac venisse me audient, quid credam esse acturos? Scilicet alii super alios certatim occurrere, unumq̃ue omnes ad sese rapere, & hospiti desiderato loca lautiaq̃ue decernere, quanta nulli alteri dedêre, contendent. Nam quid aliud aut velle jam eos, aut etiam posse censeatis, quos cælum avarissimi voti, veniente me, reos compotesq̃ue jam fecit? Nisi de hoc fortassis uno conqueri sibi posse videantur, quòd afferre tam lætum ipsis nuntium fama segnior adhuc moretur. Et certè, ne, si fama cunctari pergat, conqueri hoc illi meritò possint; ite, clientuli vos mei, & terras longè lateq̃;
omnes,

omnes, quantum potest, peragrate; de quæ adventu meo, ut omne genus homines certiores confestim fiant, nulli operæ laborique parcite. Præstò jam esse me, eorumque causâ velle quæ postulèt omnia, significare. Tum deinde reduces, quid illi responderint, & quantis ubique lætitiis gestierint, huc ad me fideliter referte.

109 Ad hæc ejus imperia, mirum dictu est, quàm faciles continuò promptique Cælites rem quisque suam aggrediantur: fervent studiis legatisque viæ. Et vidisses illicò tu, hac Michaëles evolare, hac Gabrieleles discurrere: illac alios aliosque certatim in diversa, ut nuntium celerrimè perferrent, abire. Pudebat quemque, in obsequiis primum non esse. Pergit intereà loci divinus Puer, & solus in theatro, multa secum volutans, inambulat, horæque momentum omne, quoad nuntii revertantur, horam putat; avidus, quantâ cum omnium gentium gratulatione excepti dimissique fuerint, audire. Legati porrò cum hac illac profecti, mandata, quæ acceperant prolixè omnibus diserteque exposuissent; addidere de suo, quod cuique visum, cumulandæ lætitiæ, gratiæque conciliandæ opportunum. Venisse de cælo

jam illum quem exoptarint ; sed venisse parvulum , & tenellum ; eaque propter majori omnium amore favoreque dignū : darent operam, ut venienti frequentes vel per se ipsi obviam prodirent, vel absenti munusculum, quod hospite tali dignissimum ducerent, perferendum pararent : summa eum omnia mereri : tali indole puerum esse, eaque morum ac verborum suavitatem, ut dicta ejus æquè ac facta melle fluere omnia videantur. Maturarent proinde, & omnibus eum studiis occuparent.

IIO FINIERANT commodum hæc illi, & porro taciti, quid responderetur, expectabant. Sed triste apud plerosque silentium : & aliqui vix etiam quid nuntiaretur, intelligere ; aliqui palam abnuere, & nullum se hospitem invitasse dicere. Pauci alii, qui invitatum olim & expectatū esse meminerant, admodum frigide, quis hospiti venienti habitus esset, quis eum auri purpuræque splendor ambiret, quot equi currusque comitarentur, quantæ clientum vernarumque cohortes stiparent, & alia his plura, sciscitabantur : nam talem se solum, nec alium, desiderasse, At isti continuo quod res erat, ingerere : Paternas ei divitias esse immensas, quibus domi suæ
laustissi-

Tautissimis circumfluat: ibidem familiam alere tantam, ut Reges in eâ Principesque pro pedisequis numeret. Sed eum, dissimulato jam splendore, nihil opulentia hujus in præsens ostendere: quin etiam seminudum, nulloque ne servulo quidem sibi adjuncto, circumvenire: paratum tamen, amicos omnes, assis paterni cohæredes, dum ne detrectent, sibi adsciscere. Tantisper autem voluntario sese exilio multasse, ubi de omnibus bene mereri, eosque sibi associatos, paternis possit laribus unâ secum inferre. Æquum videri, ut etiam ipsi facere paria contendant, & adversus hospitem gratos intereâ humanosque se monstrent.

III JAM dudum haud æquis hæc animis accipiebantur; nec obscure, quò evasura esset legatio, indicabant. Nempe, qui Regios sibi fastus, & ambitiosi comitatus insignia finxerant, aliosque fortunæ tumens affeclas expectarant, in schemate plebejo suum agnoscere hospitem erubuerunt. Quare aliqui, legatos nullo ne responso quidem dignati, longè refugere; alii tamē, collatis inter se capitibus, quid agerent, consultare: dum res eò denique recidit, ut dona se missuros aliqua dicerent, quibus

bus adventum inermi nudoque Puero gratularentur. Ergo operas, ut placuit, partiti, paucis post horis sua singuli munera, jam probè adornata parataque, proferunt, & ea legatis, ut intacta integraque ad Puerum deferantur, veluti res apprimè pretiosas, magnisque à se studiis conquistas, verbis amplissimis commendant.

112 ENIMVERO cælestes ephēbi, quam & barbaram gentis indolem, & muneris absurdi novitatem mirabantur; tamen imperii memores quæ traditæ cuique partes fuerant, eas, quā decuit reverentiā, susceptas, maesti secum dolentesque asportant. Quid ni enim illi & suam ipsorum, & Pueri divinissimi conditionem, in re tam adversā, miserarentur; cum inde quidem, ab eo se legatos esse cogitarent, qui tot seculis expetiturum se fuisse crediderat, ut, quanquam impensissimè properasset, serò tamen venire se autumaret; hinc verò ad belluas eum magis quàm homines pervenisse viderent; à quibus ipsi tam illiberalia, non munera solum, sed responsa quoque retulissent? Quid nī, inquam, hæc illos rerum insolentia perturbaret? Ibant tamen, & verba secum ipsi, quibus res utcumque gestas exponerent, meditabantur.

113 Post igitur quàm illuc omnes, unde legati fuerant, sunt reversi, continuò in theatrum alii super alios effusi, & adoratam Numinis majestatem in Puerulo venerati, quid apud suos quisque effecerint, quamque comiter accepti auditique fuerint, & quid responsi, non pro eo ac res postulârat, abstulerint, ad amussim omnia renarrant; denique dona in medium prolata, quæ à diversis acceperant, deponunt; alius quidem proceram, & opere quadrato exasciatam, gravique pondere ac mole trabem, quam cives aiebat agnatosque hospiti suo præparasse, ut eâ Puer in lectulum pulvinumque, cum olim meridiari luberet, abuteretur: nam molliores id loci grabatos sterni non solere, eaque propter insuescere his plumis culcitisque hospitem debere, si degere cum inquilinis locis decrevisset. In eo tamen strato ut honestius cubaret, tabulam aiebat supernè affixam esse, quæ regium ipsi titulum præferret. Denique ne difficilis in lectum ascensus foret, scalas itidem missas esse, per quas eodem facilius eniteretur.

114 COMMODOVM hæc iste renuntiârat, jamque alius cum coronâ se suâ tristis inferebat, non illâ tali, quam fulgentibus auri

auri laminis gravem, gemmisque & unionibus factam, Regum vertices amarent, quamque allaturum ipse non immerito sperarat; sed quam undique spinæ sentesque implexis aculeis horrendum in modum armarent, quam nemo sine vulnere nec manu tractaret, nec pede calcaret; quid dicam, capiti impositam impressamque sustineret? Hanc ille talem coronam, à propinquis amicisque textam, multa subinde & gravia conquestus, ostentabat. Nempe hoc illos diademate suum sibi Regē hospitemque censere exornandum: ac ne quod regni surgentis insigne desideretur, formatū ē palustri calamo cannaque sceptrum eidem offerre, quo manus olim, cum in folio regali locaretur, armare decentius posset: aliud gestamen, aliamque coronam Regi suo non polliceri. Uteretur istis intercā, daretque operam, ut capiti suo diadema bellum arctè presseque inhæreret: quam ad rem, si administris egeret, promittere illos, officio se suo non defuturos.

II. JAM & iste perorārat, cū alius ē vestigio subit, qui modestè præfatus, latiore à suis rediturum se fuisse, si vacuus reverteretur; quædam haud lati ominis
ferre-

ferramenta exponit, forcipem aduncam, rudemque terebram; malleum deinde fabrillem, tresque insuper clavos, prægrandes illos, & vel trabalibus majores: cum iis, quid adeò sibi gens barbara voluerit, posse quidem, ait, non obseurè conjici, se tamen rem infandam tegere silentio malle, quam verbis aperire. Secundum hos, ut alii deinceps aliique prodire, sub unum conspectum munera demum omnia venerunt. In iis & spongia quædam erat, mollis illa quidem, sed etiamdum sicca; quam Puerò dicebant usui fore, cum olim sitiret: tum enim felle modico, & rubentis aceti sæce (cujus heminam ei mitterent) imbui posse, labrisque admotam salubriter exsorberi. Atque id genus promulsidem si amaret, fore propediem qui totos illi congios miscerent: nullius poculenti apud eos uberiores proventus esse. Erant ibidem torti nodosi que funes & vincula, quibus velut armillis brachia, cingulisque latera stringerentur. Erant scuticæ, lora que crebris mucronibus aspera: erat oblongum hastile, idque & ferreo acumine sævum, & rimando pectori aptum, & omnia militari lanceæ gemellum. Quid multis? erat nihil neque hospite divinisimo dignum, neque

neque ab ingrata feraque gentis indole abhorrens aut alienum.

116 Igitur postquam hæc hujusmodi dona, cum paribus responsis, omnia exposuerunt, aliud expectandum sibi jam Cælitres ephebi non putabant, quàm ut Infantem suavissimum viderent, obortis continuo lacrimis ingratos hominum animos, immanemque & plus quàm barbaram hospitalitatem, accusantem. Jam utique perditam sibi, maleque locatam apud improbos operam esse, quàm cælum terris postponere, & præ immortalibus deliciis, mortalium amores habere; aulamque paternam cum exilio mutare, plus nimio properarit. Irent proinde omnes, & quas mali ominis merces undique attulerint, postliminò ad suos quamque dominos, additis minis, reportarent. Videri ea, non munera sibi ut hospiti, sed mera ludibria ut insensissimo hosti, transmissa. Vindicaturum has propediem injurias cælum, gravesque ab ingratis clientibus pænas sumpturum. Hanc ejus lamentationem audituros illi se non immeritò, cogitabant; sed nihil tamen pro eo, ac rei indignitas postulaverat, auditum.

117 ETENIM erant Puerulo, contrà
quàm

quàm nemo credidisset, omnia, quæ legati attulerant, tam accepta, ut videri potuerit, non modò non alia quondam expectasse, sed hæc sola sibi donari afferrique concupisse. Nec satis habet aspexisse ea semel omnia, nisi iterum iterumque singula contempletur. Lustrat oculis flagella, jam ictum plagasque meditantia, nec fugit; videt clavorum acumina, malleique pondera, nec expavescit; spectat coronæ senticetæ, jam capiti minantia, nec divertit: ac ne diu parvis hinc istis immoremur, videt lanceam in vulnera jam intentam, & impavidus occurrit; videt crucem supplicio paratam, & lætus ultrò gestiensque prehendit, invadit, incumbit. O spectaculum, nullis antehac mortalium oculis usurpatum! Quæ alios, vel procul audita, metu percellunt, hunc ea cominus etiam aspecta alliciunt attrahuntque; & ad quorum umbras viri quoque contremiscunt, horum minas Puerulus infans suas esse delicias illecebrasque arbitrat.

118 ITAQUE non quibus modò administris, qui munera tam expetita detulerint, gratas gratias habiturum sese; sed illos etiam ipsos, qui miserint, prolixè remuneraturum, pollicetur. Simul in genua submissus,

incipit

incipit singula, ut humi jacebant, tenerâ manu cum curâ colligere, seduloque alia in fascem alligata, alia in canistrum imposita, humo attollere: tum fascem omnifidum, quod is grandiusculus esset, succollantibus humeris excipere, corbem verò, clavis & reliquo id genus instrumento onustum, pendente lævâ sustinere: tum porrò, cum eadē crebris osculis, verbisque blandissimè salutasset, hac illac ostantis in morem circumire, opesque suas non ipse solum assidue contemplari, sed ad easdem inspiciendas alios item aliosque invitare. Venirent, viderentque omnes, & curiosè clientum suorum obsequia numerarent, quibus advenientem excepissent. Gratularentur hos sibi flores, quos hospita prætata uberrimos protulissent, quibusque liberaliter corbes totos & canistra impleissent; nullos olim neque Pæstans in hortis, neque Hybleis in campis provenisse gratiores. Suspicerent denique felicem hanc arborem, quam ipse sublatam in humeros, & brevî mirabiles fructus portaturam, alacrior lætiorque bajularet, quàm si Regum purpurâ ostroque & auro circumdaretur. Hæc æterna sibi insignia, hæc sui exilii solatia, hæc amicitie pactæ fœderisque fore monumenta.

119 CVM hoc ornatu Puer amabilis & scenâ jam discedebat, ni abeuntem Cærites ministri, novis magnisque precibus adorti, retardassent. Etenim isti, postea quàm attoniti senserunt, quanto in pretio illa munera, quæ ipsis despiciatui fuerant, haberentur; circumfusi, de genibus supplicant, ambitioseque unum hoc omnes allaborant, ut inde partem sibi aliquam singuli capessere, & sive pondus id esset, exonerare Domini humeros tam gravi sarcinâ; sive voluptas ea foret, etiam olentulis degustare aliquid ejus illecebræ liceret. Nam æquum videri, ut qui illi hæc seu tristitia tandem seu lata attulissent, ipsi met neutrorum abirent immunes. Ceterum, quantò hæc illi maximè urgebant, tantò Puer omnia cupidissimè retinere, sinuque toto involvere, & pectori apprimere, & humeris tenacissimè affigere perseverabat: dum denique victor, cum eâ sarcinâ, non aliter quàm si spoliis opimis potitus triumpharet, è proscenio discessit, magis oculis spectatorum, quàm animis hominum memoriisque subductus.

120 AUDIT hæc sibi Adolescens, quo de exorsi sumus, accuratè copioseque, uti res ferebat, explicari: & Eò me minùs, inquit,

quit, jam poenitet oculos in hac præcipuè picturâ fatigasse. Nec deerat suspicio, quæ plusculum aliquid sub his coloribus latere diceret; sed absque te fuisset, ad hanc argumenti suavissimi medullam equidẽ non penetrabam. Quapropter ut oculi mei plurimum tabulino huic tuo debeant, cujus aspectu suavissimè sunt oblectati; animus tamen plus orationi se tuæ fateretur debere, quàm interprete fecisti, ut non solum intelligentior quàm veneram, sed etiam melior me ipso, aut certè adversus hæc divinissimi Pueruli merita gratior attentiorque discedam. Hæc optimo seni cum non pessimus Adolescens respondisset; actis humaniter, quas in digressu solemus, gratiis, de tabulâ porticuque velut deliberabundus recessit.

121 Nos autem, qui quanquam in pinacothecâ tam nobili tabulam hanc archetypam, suis, id est, pulcherrimis coloribus expictam, ipsi non vidimus; ejus tamen apographon non semel & vidisse nos, & circumtulisse, plerique recordamur: quid, inquam, hîc agimus, dum suavissimam Numinis infantiam cogitamus, hisce donis tam illiberalibus esse ab unoquoque nostrum exceptam? nos enim hunc illi
corbem

corbem merce tam funestâ tragicaque in-
struximus; nos funes hos nodosque infor-
mes texuimus, hos ferrugineos flores, &
hoc è vepribus diadema nos illi concinna-
vimus; nos illa trabis horrendæ pondera,
illa hastæ lanceæq; ferramenta, illa sceptri
ludibria commentum sumus: nostra est hæc
myrrhæ felliisque phiala; nostra hæc aceti
spongia; nostra hæc omnis, quâ seu hu-
meri gravantur, seu scapulæ premuntur,
seu manus lacerti que fatigantur, est sarcina.
Hæc infanti nostro Deoque dona mi-
simus, hæc hospiti lautia, crudeles & bar-
bari cives, hæc studii nostri indicia, perfidi
clientes obrulimus. Quorum omnium
donorum, si meritò nos pudet hodie pæ-
nitetque; quid causabimur ignavi, ne
dona nobis nostra postliminiò asserere, &
ab innocentibus humeris in nostras cer-
vices illicò transferre laboremus? Certè si
quis adhuc nobis est rubor, non patiemur,
suavissime Puer, ut nostro te fasce, tam
iniquo & gravi, pressum oppressumque,
nos oneris immunes & desides, posthac
intueamur. Neque nos illa, quam Cælites
tui nunc tulerunt, repulsa deterrebit: me-
liori quippe, quàm ipsi, suffragio, in hoc
ambitu, juvamus. Nam in sarcinâ tam tristi

invadendâ alienas ipsi exterasque sibi præ-
das, nos verò nostras nobis opes proprias-
que vindicamus : quas hoc ipso nos, quòd
in fonti donavimus, fontes recipere , cælo
terraque iudice, meremur.



DELICIA RVM

LIBER SECVNDVS.

I.

B. VIRGO Joannis Patritii ex
asse heres.

*Ex Breviario Romano Nonis Augusti, Baronio
ibid. & in Annalibus anno 367.*



QVOD Deum immortalem,
Deique optimam maximam
Parentem, & nos & majores
nostri diu multumque pre-
cati fuimus; quodque impetraturi vix
unquam credebamur, ut eum aliquando
locum Parthenoni vestro attributum con-
spiceremus, quem cælitum Imperatrix sibi
suisque honoribus sacrum, & Sodalium
votis opportunum, & excitandis clientum
studiis esse proprium jure perpetuo vellet:
id, aliis quidem, ut fieret, metuentibus;
aliis, an futurum esset, ambigentibus; qui-
busdam, fieri etiam posse negantibus, ho-
die tandem consecutos esse nos nostris

oculis intuemur. Habetis enim Sacellum, situ aspectuque amœnum, conditione percommodum, veneratione religiosum, amplitudine ne majori quidem hominum frequentia angustum. Et habetis id, nullâ exterorum ope, sed vestrâ liberalitate impensaque magnificè exornatû; qui omnes, ut loco suus hic splendor addi, arisque & subselliis, & parietibus sua facies, velut vestis elegantior, induci posset, vestris fortune parcendum esse non putastis; sed, prout cujusque copiae erant, opem afferre singuli aliquam & domicilium à situ senioque in hanc novitatem vindicare laborastis. Quo in studio non est consilium mihi, quantam facti vestri memoriam ad posteros reliqueritis; sed solum (si conferri se magna cum mediocribus patientur) quàm laudabiliter, veteris cujusdam viri primarii vestigia servaveritis, percensere.

2 JOANNES is erat, Romæ quondam, inter Urbis Principes clarus: cujus si genus requiritis, omnem Quiritium nobilitatem inter avos ejus proavosque reperietis: si seriem imaginum, atriorum ceras, columnasque magnis viri insignibus plenas videbitis: si opes & aurum, hoc verò non ad Senatorios census, sed regios luxus, nec
ad

ad Patritii sumptus, sed Cæsaris fastus cre-
detis suffecturum: si denique mores vir-
tutesque, jam cetera ei omnia defuisse, ha-
rum omnium copiam superfuisse, jurabitis.
Ut adeò in homine uno nobilitas cum
fortunâ, dignitas generis cum mentis præ-
stantiâ, splendor ordinis cum virtute ani-
mi, prudentia cum indole comitateque
decertarint: quæ cum collata inter se sin-
gula vinci nequaquam possent, omnia ex
æquo visa sunt vicisse.

3 VERVM in hac fortunæ prærogativâ
non deerat, quod hominem, cetera omnia
saturum ac felicem, assidue adhuc maleque
sic discrucicaret, ut inopem ex opulento, &
ex fortunatissimo reddere miserum videretur.
Quid autem id fuerit, video ple-
rosque vestrum expectare; eaque propter
diutius ego vos non morabor. Erat JOAN-
NI conditione non impari conjux, lecta in
primis femina, & viro Principem digna; sed
liberi deerant, nepotesque, quos e divite
thalamo sterilis sibi senex frustra pollice-
batur. Nullus illum in aulâ comitari Asca-
nius, nusquam Astyanax per atria vagari:
nemo qui patrem referret, qui matrem
agnosceret, qui murmure blæso familiam
oblectaret. Hæc sola orbitas, quamcumque
G 3 aliam

aliam potuit ubertatem, velut accisam illi excisamque abolere: hæc una & modum ceteræ felicitati ponere, & animi lætitiæ, ne qua purior interdum pleniorque afflueret, inhibere.

4 Et usuvenerat sæpe, ut servulis officiosè succollantibus, nunc in hortorum viridaria, nunc per umbrosa nemora, nunc ad amœna prædia, sublimis gestaretur, quò ægritudinem animi ex orbitate crescentem, rerum studiorumque vicissitudo leniret: inter quæ tamen omnia, suspirans identidem gemenisque exclamabat: Nihil agis ingeniosa varietas, neque temperas senis dolorem, sed acuis infesta morbum, dum mihi aut Milvios pontes, aut Aricia clivos prætereunti, confertos Iri Codrique nepotes occurrere; dum in paupere turbâ tot jubes parvulorum agmina salire, tot vagire infantium ora, & matris famelicæ lactentia tot pignora, orbo mihi divitiisque, velut illudens ostentas. Quem in finem opes immensæ me gravant? quorsum atria me porricusque tam vastæ? quorsum ædes aulæque solitariam senectam obvalant? aut cui bono, congesta de Gargaris tot horrea, & arata per Campaniam tot jugera, & in Afro littore exigenda tot

portoria, & per Urbes populosque tot uni vectigalia laborant, si hæc omnia sunt herede caritura? si nullum, qui patris decessuri oculos claudat, qui defectæ matris senium foveat, qui utrique exsequias eat, olim sunt habitura?

5 INSVLTAT opibus meis felicior egestas, & plena mihi tuguria deridens exprobrat: ubi puerorum greges frigentem focum inquietant, ubi ex asse heredes longam mendicitatem reportant, ubi denique maciem à fertili matre, & famem pro patrimonio expectant. Mihi interim palatium solitudo est: aurum, vel Regibus ambitum, heres fastidit: patrisque nomen, quod in hanc sportularum fabulam prodigitur, Patritio negatur. Daret unam hæc omnis opulentia mea sarcinam, parentum ulnis excipiendam: cum foeta paupertas omnes suorum sinus impleat, tergique gibbum vagientibus cunis oneret, & abstemias mensas hiantibus pullis coronet. Dicebat hæc sæpenumero JOANNES, neque clam uxore suâ, quam & ipsam pares in questus exemplo trahebat. Verùm dicebat hæc etiamdum junior vegetiorque, ratus adhuc flecti convitiis talibus, aut lacrimis certè emolliri posse orbitatem,

pertinaciâ exorandam : sed aliud cælo consilium erat, sterileq; palatium magnis olim herediûs servabatur.

6 ETENIM, ubi fusæ diu multumque preces in irritum recidere, atasque duorum melior in senium postremo desuit; abjectâ liberorum spe Patritius cœpit se-
eum, ecquem alium sibi heredem adoptaret, cogitare. Hic omnia reputanti, nemo neque de familiâ clientulus occurrebat, nec in Italiâ cunctâ peregrinus, cui suas moriens fortunas commendaret. Itâne verò? Etiam terra, inquit, aliquando contemnere opes, & fastidire divitias didicisti? & neminem mihi, ne tu quidem ostendis, qui ad auri venientis fulgorem aut manum protendere, aut sinum explicare, aut oculû adjicere jam concupiscat? Inveniam ego supra terram aliquos, qui flaventem hanc terræ glebam non æquè omnes pertinaciter contemnant. Ad vos imus, Cælites magni (nam ut eamus, felici necessitate nos provocatis) date vos parentibus orbis, date senibus copiosis, date opibus nostris, non jam liberos, quos hîc brevî morituros relinquamus; sed date heredes, quos æternûm victuros morituri propediem invisamus.

7 TVM autem, ut si cælum omne ad vota JOANNIS sese diduceret, ingens Cælitum accurrit numerus, sui que copiam Partitio facit; & quemnam unum ex tot millibus heredem velit, expectat. Hic tu quid tecum, felicissime, cunctaris? An, datâ tot heredum copiâ, flere tuam adhuc orbitatem, & quærere porro liberos perseveras? An ipsa potius hæc copia rursus inopem te facit, ut huc oculis, huc mente tractus, quem ex tam multis optimū adoptes, ambigūus expendas? Atqui nihil hac quidem in re, cur hæreas, est necesse: age modò, & audacter elige. Errari non potest, ubi ex omni numero quisquis eligitur, optimus invenitur. Et Petrum hîc opportunè, cæli clavigerum vides: placet hic? Hîc Paulum tu, alterum patriæ tuæ parentem habes: placet iste? Hunc adoptes, an hunc, juxtâ erit; idoneus uterque, uterque dignus, uterque optimus tibi heres succedet. Quid multa, in re liquidâ dubius moraris?

8 Vis illum fortasse tu, quem sagittis hîc arcu que conspicuum miraris? Sebastianus est. Vis illum, qui sartagine pruna que affatus hîc adstat? Iberæ originis Laurentius est. Hunc tu heroëm qui de ense, an

illum tu mavis qui de igne flammaque triumphavit ? Alium hic rursus à leone victorem, alium à cruce, & alium à carcere hic vides : quem istorum tu probas ? nulum in his competitoribus errandi periculum est. Etiamne tamen hic differs, & in eligendo timidus hæres ? Cogita senex, non patrimonium hos sibi, sed te tibi heredem quærere. Invenisti sexcentos, & adhuc odiosè perquiris ? Quamquam intelligo jam, quid perplexus adhuc triceris. Vides ab aliâ cæli parte, Virginum illustrium Parthenonem, atque inde Cathedras existere aliquas, rotis, & rotarum aculeis interritas ; inde Agnas prodire, stridentibus rogis, & victis tortoribus claras. Jam & Agathas forcipe suâ, & Cæciliâs vulnere non uno insignes : & has denique tot alias heroïnas confertim obstare vides, quas universas esse tu intelligis dignas.

9 O Fortunatam hominis sterilitatem ! quæ nullo inter mortales habito delectu, omne patrimonium dispensaret ! Ecquos tandem heredes his talibus illustriores tu expectas ? Enimverò expecto, inquit : & tamen si fortunis meis dignos esse tam istos video, quàm istos & istos ; tamen heredem
adhuc.

adhuc alium, & istis ego digniorē & istis, requiro. Hic intelligitis, opinor, quem sibi vir magnus heredem alium expectarit. Intellexit certē illa ipsa, quæ adhuc sola expectabatur. Quare prodiit novissimē Virginum omnium Regina; prodiit, inquam, hæc competitrix, suoque adspectu, Virginum ceterarum Cælitumque præsentiam facilē omnem extinxit; ac ne JOANNIS animus dehinc fluctuaret, momento temporis in se unam cunctas ejus curas cogitationesque convertit. Ipse quoque simul illud cæli jubar, quo licuerat, obtutu suspexit; hanc certē se Virginem, hanc imò se unam, & opum, & rerum, & facultatum suarum heredem adsciscere professus, ambiguum diuturnæ consulationis litem feliciter diremit.

IO NAM ceteros ejus loci competitores veneratus, cum ad Virginem respexisset, non distulit, quin gaudii plenus exclamaret,

Et Petre dignus eras, & dignus Paulle (fatemur)

Vosq; alii, nostras ut caperitis opes;

Sed placeat vestrum quamvis mihi quilibet, una,

Parcite, p'æ vestrum quolibet ista placet.

Inde suam sibi orbitatem fuissē optandam; inde divitias, paullo ante ingentes, nunc parvas censuit & angustas videri,

totoque Imperio Romano, omnibusque terris licitari se talem heredem debuisse: acciperet modò facilis ea lubensque; & quò abdi condique argentum, in quæ cimelia referri hoc aurum, aut ubi locorum asservari totum hunc assem vellet, ostenderet. Nec omisit continuò Virgo, quin ibi adituram hereditatem se responderet, ubi locum illi, suis opibus idoneum, esset monstratura.

II ERANT Romæ per id tempus immodici calores, cum Nonæ Sextiles plus quàm Siriiis ardoribus flagrarent. Ubique æstuarè valles, fumare colles, ardere montes. Sitebant arentia prata, irritisq; votis suam sibi & tellus pluviam, & homines auram, & pecudes optabant umbram. Inter hæc urbis anhelantis incendia adest iterum opportunè Virgo, & JOANNI per quietem indicat, quid opus sit facto. Eum in Urbe locum requireret, cujus aream nive undique opertam, glacieque & gelu prope hiberno rigentem invenisset: nam eo se loco sedem capere, templumque sibi conspicuum ædificari velle, in cujus fundum cultumque sua sibi hereditas omnis magnificè impenderetur. Hic enim verò JOANNES, quid aliud sibi quàm jocantis

Somnii

somnii ludos objici putasset? Scilicet ullas usquam in æstuante viciniâ nives Augusto mense quæreretur, quas nullas ibi ne Decem-ber quidem promississet? Quærit tamen, & plenus spei, fidem ostenti non segniter explorat; cubituque ut primo diluculo surrexit, in omnes Urbis partes familiam dimittit; ipse ad Esquilias, non sine Numine, contendit: atque ibi cum facili clivo in summum collem evasisset, videt, (ô gratum seni felixque prodigium!) videt insolito gelu canescere verticem, & non pruinâ tenui, sed altâ multaque nive occupatum. Nec tamē nix illa se totis Esquilis superfuderat; sed (quò conspectius rei miraculum foret) eam duntaxat areæ partem insidebat, quam Virgo sapiens & fundando amplissimo templo, & profundēdo JOANNIS patrimonio parem designarat.

12 JAM porrò non erit, opinor, hîc quisquam, qui secum ipse, quid, accepto tam luculento Virginis prodigio, JOANNES decreverit, ausit dubitare. Vixdum enim nives eæ, solis caloribus solutæ, collem Esquilinum nudaverant, jamque operas ille fabrosque, ære conductos, confer-
tim adducere, jam humum, quàm late miraculum patuit, omnem fodere, magnisq;

molaribus substructiones & fundamenta locare, tum ædem ipsam properatis studiis extruere ; dum in hanc demum amplitudinem, quâ hodieque Romæ visitur , excresceret, & in magnæ Heredis titulo, immortale senis orbi nomen conservaret. O consilium viri, factumque memorabile ! ô laudabilem divitis Patritii orbitatem, & fecundis aliorum thalamis invidendam ! quâ unâ se longius perenniusque propagavit, quàm si omnem Priami Danaique propaginem inter liberos nepotesque recensuisset. Quis enim sterilem possit hujus senectam reputare, qui tantæ compos heredis, opes cetera mortales & caducas, hac unâ successionem stabiles effecerit, & nullâ temporum injuriâ perituras ?

13 AUDISTIS hoc viri magni facinus illustre, Sodales ; & in eo vestros audistis non impares conatus laudari, quibus & heredem quæsiistis, in quem beneficentiæ vestræ unciam certè aliquam, si nondum & assem, plerique transcriberetis. Et reperistis opportunè ex omnibus Cælitum copiis hanc eandem Virginem, quâ majorem melioremque adoptare vos nullam aliam potuissetis. Quoties enim auditæ exceptæque vestræ sunt voces, quibus ani-

mi flagrantis desiderium prodebatis, ad Virginis hujus præsidisq̃ue rempublicam, modo quo optimo liceret, exornandam? Locus ad hunc usque diem defuerat, & cum loco defuerat occasio. Rogastis, postulastis, efflagitastis. Atque ecce, locum assignat hunc vobis ipsa, nivibus inter medios anni calores oblitum. Nivibus, inquam: nisi fortassis in hoc Mariano Parthenone, vos soli dubitatis, nivē conspici; in quo tot innocentissimæ vitæ, summæq̃; indolis ingenuo candore insignes adolescentes nunc videtis; qui noxium juventæ primæ calorem, omnemq̃ue vitiorum æstum, cælesti rore, & Virgineâ nive, non temperare, sed frangere, perimere, extinguere, assiduè laborant. Date porrò vos operam, intendite nervos, & animi vires, quotquot adestis, & quotquot etiam non adestis, omnes impendite; ut ne hanc hujus aræ purissimam nivem, unus aliquis nostrum, aut turpiter olim deformasse, aut labe maculâve inquinasse, cum æterno posterorum convitio, arguatur. Quin id magis unusquisque studete, uti & Virgo sese coloniam hanc deduxisse gaudeat, & alii ex vestris moribus perspiciant, vos loci non indecores colonos fuisse.

II.

B. VIRGO Alberti Magni Magistra
& Mæccenas.

*Ex Annalibus Dominicanis apud Hieronymum
Platum, 2. Stat. Relig. 33.*

14 **N**IHIL equidem hodie neque primæ pueritiæ tam persuasum, nec adolescentiæ provectiori tam certum arbitror haberi; quàm, esse Cælites, qui scientias nostras litterasque, velut auctores earum præfidesque, singulari patrocinio fovendas sibi sumptierint ac protegendas. Ceterum nescio quid, malè decepti, humanas ferè disciplinas iis consecremus; tanquam profanis illi studiis, ac non potius Christianis, soleant suffragari. Quam tantam injuriam ne cælo faciamus, vehementer adolescentibus censeo cavendum. Amant enim superi litteraturam, mihi credite; sed amant præcipuè sacram & Christianam. Quod ego, dum Virginis magnæ testimonio confirmatum eo, quæso vos, oppidò brevem non orationem, à quâ volens abstinco, sed (quod plerique mavultis) narrationem auscultato.

15 IN iis Annalibus, qui gentis Dominicanæ primas origines tradidere, sedecennem fuisse adolescentem legimus, qui memorabili ostento, res olim maximas consecutus, claram ad nos sui memoriam, nomenque in paucis nobile, transmisit. ALBERTVM parentes dixere; nos, siue virtutis in eo lucem, siue eruditionis famam admirati, MAGNVVM hodieque nuncupamus. Hujus indolem præclaram cum multa animi decora commendarent, sola ingenii remora, & memoriæ natalis quædam ignavia, deformabat. Quo naturæ vitio fiebat, ut minimos adolescens, ac propè nullos in litteris progressus facere; sed ceteris longè omnibus concedere, scholæque jocus, & æqualium ludus esse, perpetuò videretur. Neque enim tam hebes ne ipse quidem tum erat, quin, quantum & relinqueretur post alios, & unus præ aliis rideretur, intelligeret. Inter quas scholæ ærumnas quid cum cogitasse vos autumatis? quibus convitiis aures quotidie flagellari? quibus animum macerari tædiis? & quantis inde lacrimis ora perfundi sibi rigarique identidem sensit?

16 ET, Has ego tot, inquit, injurias quousque tandem ferreus sustinebo? Laccellor

cessor undique, & alternis convitiis jam ora jam aures verberantur, dum semper ego vel stuporis mancipium appellor, vel tanquam inertiae patrimonium objurgor: & æquales interim mei quantis me passibus antecedunt? vix libros eminus adspexere, & omnia continuò sciunt: quicquid legunt, dociles capiunt: quosque heri condiscipulos acceperam, hodie doctores meos repentè admiror. Solus ego neque Musas ad favorem flectere, nec placare mihi Apollinè queo. Et quamdiu demum hæc feram? Nunquàmne aut videre ego illa desinam, aut illa me torquere? Incundus aliquando vel modus remedii est mihi, vel certè fastidii finis. Nam cui bono vires ego nequicquam attero, si stupiditas ne sudore quidem vincitur; & conatus ipse, quamvis improbus, deridiculo habetur?

17 CVM hæc adolescens magno animi æstu secum sæpius agitasset, id postremò consecutum est, quod fieri plerumque in tædio solet, ut æumnas, quas vertere consilio nequierat, exsilio vitare cogitaret: pugnæque longioris impatiens, ad fugam (infame remedium) temerè verteretur. Miserum hic te, ALBERTE, qui malis auspiciis jam antè litteras aggressus, nunc pejoribus

pejoribus averſaris! Cogita paulisper tecum, quid inconſultò moliaris? Tūc ingenium hebes & rebelle ſperas corrigi per fugam poſſe? Tu ſaſtidia ſcholæ, hac deſperatione vitæ? tu notam probrumque ignaviæ, tam pudendo facinore vindicare? Conſidera unde temerarius recedas, quò præceps & quàm miſerè ruas. Quacunque effugere voles, primus tu te ipſe impedies, & alia tibi aliaque viam præcludent. Sive enim familiæ tuæ religioſiſſimas leges conſulis, ex fugam hanc prohibent, & pœnis graviſſimis coërcent: ſive commilitones tuos eorumque judicia requiris, illi conſilium demens univerſi damnant & execrantur: ſive denique te ipſe tu arbitrum legis, audacter ajo, tu ipſe te nunquam abſolves. De Numine ſempiterno, quam facti veniam tibi promittas, tu videris: nam illud ego iratum tibi, quaquà evaſeriſ, occuſurū promitto; daturumque operam, uti te vel à cœpto nefario abducatur, vel in improbo, quod nolim, conatū elidat.

18 NEC feſellit me futuri prædictio. Nam ALBERTVS his cogitationum fluctibus interdium colliſus, dum noctem ſomnumque impatiens opperitur, inſperatè

ad

ad rei mirificæ spectaculum abripitur. Simul enim ac sopor oculis obrepserat, visus sibi per quietem est, jam scālas parietibus admove- re, per quas furtim evasurus, ad exitium properaret; jam ad fugam sese accingere, & gradus conscendere; jam animosè ad usque murorum fastigia eniti; cum ex improvise quatuor illi Virgines (at quales, Superi, & quo aspectu Virgines?) uno se agmine obviā ferunt. Quas ego si pro dignitate jubeat hīc laudare,

Non mihi si lingua centum sint, oraq; centum,
 unius earum sperē aut vultum depingere,
 aut habitum memorare. Omnia, puto, intelligetis, cum Cælites fuisse auditis. Stabant ea tot cæli sidera, & in summis gradibus, an sui conspectu desertorem percellerent, expectabant. Verū ut in incepto pergere, fugæque consilia peragere senserunt, aggrediuntur etiam manu vim parare, deque gradibus hominem semel iterumque seriō deturbant.

19 POTVISSET ferream ea vis audaciam exarmare: sed cœptam ALBERTI temeritatem adeò non retudit, ut etiam animārit. Unde tertium, infelix, per easdē scālas, à quibus iteratò jam ierat præceps, enitur; tertiumque, nullā jam cujusquam violentiā,

lentiâ , sed facili solum mitique alloquio deturbatur. Nam duabus , quæ præbant, Virginibus , ab adolescente inhumaniter repudiatis, cœpit tertia illum soror, ceteris non paullò blandior, compellare; & comiter, ecquid hoc tandem tam stulto consilio velit, requirere, causasque desperatæ molitionis percontari. Hic enim verò erumpere in voces indignatio; sui que ingenii cladem adolescens; quam natura odio propè novercali intulerit, deplorare. Et nimirum id infortunium fugitare se dicere, quod cum assiduo ceterorum risu perpetuaretur; ubi non litteris operari, sed inundari lacrimis; non disciplinis erudiri, sed obrui injuriis quotidie; nec fructum denique laboris capere, sed operam omnem, sed vires, sed ætatem sese perdere experiretur. Igitur quam invenire quietem in ludò nequirit, eam in exilio se quæsiturum: ubi, ut parum certè commodi solatii que reperiret, plurimum tamen incommodi injuriæ que sit amissurus.

20 CONGEMVIT ad has hominis querelas clementior Virgo; damnatoque fugæ noxiæ decreto, mentem jubet meliorem sanio rem que capere. Nam cui bono se ipse præcipitaret? Et, Quin hoc prius agis, ô bone,

bone, opemque, ait, aliunde huic malo tu quæris, quam ad hæc ultima desperationum descendis? Hæsitanti etiam dum ALBERTO, & neganti, in terris quemquam esse qui opitulari etiam rogatus possit; illa, digito indice, in quartam Virginem intento, Hanc imò tu, inquit, si rogare potes, patronam haud dubiam invenisti. Tollit ille, velut detersâ nebulâ, languentes oculos, videtque augusti habitûs Virginem; quæ oris ambrosii venustate, comitû suarum formas una omnes exstinguebat; neque radiis undique diffusis, aliter splendebat, quam solet *inter ignes Luna minores*. Vidit hanc, inquam, & neque quid jam ageret, attentus, continuò tam fugæ prioris quam mœstitiæ immemor, ultrò substitit; id modò sollicitus, ut omnibus omissis, Virginem posset usque dehinc & usque contemplari. Senferat enim haud obscure, agnoveratque, (quis autem non agnovisset?) eam orbis utriusque Reginam, eam Cælitum Imperatricem, eam Numinis æterni felicissimam parentē esse.

21 VIDEOR hîc mihi, Sodales, egomet ipse rei spectator interesse, videor vultum atque ora Lunæ illius contueri; videor sermones tacitus arbitrari, quibus ALBER-

TVM illa perterritum excitârit, crexerit, confirmârit. Sed videor mihi duntaxat: utinam verè adesse, propiusque hæc omnia liceret explorare! Eorum fructus aliquis etiam ad vos, auctore me, non dubiè perveniret. Neque enim ulla totius colloquii vox meam curiositatem immunis effugisset. Interim, quando verba sermonesque referre non possumus, certè autem quæ res evenerint, auscultemus. Nam opem adolescens petere nondum à Virgine inceperat, jamque exorata, preces ultrò ipsa occupabat, votumque oblato munere prævertebat: præparcam se difficilemque interpretata, si, donec rogaretur, expectasset. Et poterat sanè liberalitas adhuc non modica videri, si supplici prius diuque flagitanti, atque adeò lamentanti, morem denique gessisset. At illa & citius multò quàm ipse oraret, & plus quàm peteret, & majus aliquid meliusque quàm speraret, liberaliter non promisit, sed obtulit etiam, obtrusit, donavit. Quid autem illud, interrogatis? Memoriamne, quâ pridem omni caruerat? An ingenium, quod prætenue habebat, ac propè nullum? an eloquentiam, & rerum æquè ac verborum copiam, quâ præcipuè destitutus, miserabilera

bilem se apud ceteros esse agnoscebat? Profectò, Sodales, si cui alteri vel horum singula obvenissent, luculento se munere donatum, unusquisque judicasset. At huic hodie fortunato, à beneficâ Virgine, propè insperanti, simul universa felicissimè, quod audietis, obtrigere.

22 O beatam adolescentis conditionem! & ex misero quàm repentè felicem! Jubetur finum omnem expandere; jubetur optare, & quicquid datâ optione malit, confestim tollere. Tu intereà nondum evigilas, ALBERTE? tu fortunæ huic tantæ patefacere aditum moraris? Unus, ecce, jam labor est, non quid impetres contendere, sed quid postules cogitare. Sacrorum re disciplinarum arcana delectant?) uno dic verbo (quid pendes?) & impetrasti. Geometriam mavis, & Euclidis mæandros, & Archimedis labyrinthos vestigare? Patent per hanc Ariadnam omnia; succede. An lubet cum Stagiritâ parturientem naturam inspicere, causasque rerum & effecta mirari? an potius cum Platone mores, & leges, & Rempublicam condere? In Virgine, mora non erit ulla: elige solum, & omnia comparasti. Obstupuit liberalitate non expectatâ ALBERTVS: &
inani

inani captus earum rerum illecebrâ, quas in ludo cum æqualibus id temporis tractabat, præceps, ad illas sibi comparandas, animum applicat; & dum infima consecratur, omittit meliora: nempe, quod ætas improvidè suaserat, hominum scita divinis, profana sacris, mortalia sempiternis, pueriliter præoptat: sat opimum divitemque ratus, qui voto gratuito primas sibi partes in Philosophorum comitiis vindicasset.

23 Imprudentiam adolescentis miserandam! cæcamque opum maximarum æstimationem! Non tu dudum, maxima Virginum, non hîc, inquam, tu indignaris? non istud ipsum tu, quod ultrò promiseras, offensa jam irataque ALBERTO negas? Imò enimverò habeat, inquis, opes ingenii quas flagitavit: impleat se litteris humanis, quas concupiit: addam insuper ego divinas, quas illis posthabuit. Non patiar, liberalius aliquid ille petierit, quàm dicar ego præbuisse. Ceterum, quando in tam ubere copiâ aut parcior fuit quàm ego jufferam, aut imprudentior certè quàm debuerat; neque eo loco rerum pretia duxit quo convenerat; sed Filii mei scientias infra Aristotelis categorias abjecit, artesque

mortalium præ cælestibus exoptavit ; ego Filii contemptum mater vindicabo, fax-
que, in eandem ut hebetudinem olim nec
opinatò relabatur, quam beneficio nunc
meo se sentiet exuisse. Commodum hæc
erat elocuta, excussoque sinu, donis clien-
tem congruentibus implerat, cum Ado-
lescens videt omnem illum Parthenona
rarefcere, Virginesque cælo receptas ex
oculis abisse.

24 HIC ALBERTVS poterat fortasse,
atque adeò poteramus & nos, subvereri, ne
quæ sopor hanc insomniorum fabulam com-
mentus, adolescenti, quod solet, imposue-
rit. Sed metum hunc eventa mox ipsa li-
quidò confutarunt. Rediit enim ad se ille,
& rediit ad suos: sed jam nullus in toto AL-
BERTO ALBERTVS. Adest omnium, quæ
legeret audiretque, tenax memoria; adest
linguæ verborumque affluentia; adest in-
genii vis & perspicacitas miranda; & de-
nique quid non? Mirantur magistri, con-
discipuli cedunt; & sive jam interroget,
auscultant; seu disputet, laudant; seu do-
ceat, acclamant. Repentinam, Sodales,
mutationem, ac propè incredibilem; ni à
tali Magistrâ legeremus profectam! Quis
nostrum in hujus disciplinam dedere se,
studio-

studiorumque rudimenta ponere apud hanc, detrectet? Quis subsidium in hoc ludo adversus ignavia venena reperire, & sub hac Pallade progressus in omni litteraturâ memorabiles efficere non speret?

25 ATTAMEN, ô rerum nostrarum ludibria! ô deplorandam felicitatis, quâ plerique nitimur, inconstantiam! Hic ille tam insperatò fortunatus, & jam omnium famâ; etiam inter ingeniosos litteratosque, MAGNUS: hic ille ALBERTVS, inquam, cum scholas jam omnes cathedrasque multifariam nobilitasset, litterisque posteros, & libris bibliothecas instruxisset, orbe terrarum ad sui admirationem converso, quam postremò gloriæ suæ metam invenit? Nempe, quò sublimius ad scientiarum fastigium in dies evehebatur, hoc propius ad priorem infantiam identidem revolvebatur. Ecquid hîc subsistis oratio: quid invita lentaque progredieris? Dicendum utique semel est, & quod prius quàm accideret, dictum à Virgine jam fuerat, hîc, velis nolis, est repetendum. Cum senio quondam & labore fessus, in frequenti scholâ doctissimè; ex more, disputaret, nihilque adversi, tum quidem, metueret; ecce tibi! medio in conatu omnis illum memoria

inopinatò destituit, unoque temporis momento, cum illa divinissimi ingenii vis defecisset, elapsa, quam expetierat, Philosophia est, rupta Archimedis Sphæra, Appollonii Conica, Euclidis Elementa; quodque tristius fuit, simul omnis illum Theologia, & comparata eruditionis copia, velut ex compacto dereliquit. Stetit ALBERTVS seipse primùm, rei que insolentiam admiratus, cum in publico suum silentium erubesceret, aliosque casum miserari, alios etiam fortunæ suæ illacrimari conspiceret: ac tum denique, qui cetera omnia per oblivionem amiserat, hoc unum profectò non æquè etiam dimisit, quin adhuc recordaretur, eam sibi linguæ mentisq; infantiam, à vaticinante Virgine prædictam, in temerarii dilectûs ultionem divinitus evenisse.

26 QUANTVM ea res illi dolorem pepererit, quis divinabit? Quoties suam adolescentis amentiam senex incusavit? quibus suspiriis lacrimisq; præposterum sciendi amorem expiavit? Et fingite vos, earumdem rerum alteram ei nunc rursus optionem deferri, nunquid hoc dicturum non existimatis: Ite vanissimi mortales, atque ut profanis litteris operemini, studia divina socordes intermittite; ut curiosi

naturæ vires coram indagetis, æterna futuraque negligite; ut fabularum commenta per otium evolvatis, sacra volumina pertæsi præterite, contemnite, abjicite. Veniet illud tempus olim, veniet, cum stulti vos consilii mecum pœnitebit: quando ipsi Platones vos vestri accusare, quando arguere Cicerones, quando damnare Marones (nam Nasones, amorumque triumviros quid dicam?) incipient, quorum libellos auro soletis ostroque includere, & manu sinuque ferre, & nunquam, nisi osculo prius adoratos, deponere; dum interea loci chartæ cælestes domi in pulvere squallent, dum blattis tineisque relictæ, rarò in oculos, rarius in manus veniunt; ad animos certè nunquam perventuræ. Quo vos olim vultu hanc virginum Reginam, quo ore Præsidem, in cujus clientelâ degitis, fere-
tis? Fallimini, adolescentes mei, fallimini, si ejus patrocinium stabile sperabitis, cujus studia tam frigidè amatis: si sæpius Phœbum sonare quàm Christum, sæpius Jovis Palladem implorare, quàm Christi Virginem, assuescetis. Diceret hæc aliquibus ALBERTVS; nos certè, ne dici nobis à quocumque possint, cavemus.

III.

B. VIRGO adolescentuli ludentis
annulo devincta.

*Ex Vincentii Belluacensis Speculo lib. 7. cap. 87.
Ioanne Majore dist. 4. ex. 2.*

27 **N**ON facilè nos ullius, opinor, spectaculi major voluptas teneret, quàm si quà fortè contingeret, ut ludentes cum homine mortali Cælites aspicere-
mus. Nihil enim posset, ut equidem existi-
mo, in ejusmodi ludicro, nisi elegans cum primis & venustum apparere: sed essent universa piis gratisque motibus referta, quibus suos spectatores vel ipsa ludi materia, vel ludionum certè peritia, mirificè oblectaret. Verùm hos ludos quamquam oculis subicere jam nequeo, auribus tamen animisque vestris ut exhibitos sentiatis, præstabo.

28 STABAT in suburbano parvum opere, sed cultu formaque celebre sacellum, quod, pro eo ac erat antiquæ religionis, & ad Virginis parentis honores eleganter ex-
structum, magnam habebat apud loci ac-
colas

colas advepasque venerationem. Soli viridis uberisque planitiem umbra circum undique omnem opacabat, à tilieti foliis ramisque superfusa; Zephyri statio nativa, & nusquā tutior ab irā caniculæ recessus. Alluunt vicinas crepidines undæ; & in frondibus garriunt volucres, murmurant auræ, redolent flores. Ad hanc loci prati-que elegantiam adolescentū aliquot condixerant, ubi fallendi temporis, corporisq; exercendi, pilā luserent. Omnes, uti convenerant, venire: abjicitur in medium pila: fit juvenum, ut solet, sortitio, & auctorati bifariam in partes discedunt. Jamque adeò fervere opus, & hi vibrante manu pilam expellere, hi venientem excipere, iterumque petere alterni, & alterni eludere: alii suos clamoribus urgent, alii adversos provocant stimulantque: & si quā manus unius fefellerat, multi promiscuè occurrere, omnes fremere, nemo ferre.

29 IN eo certamine, dum utrinque partium studia quàm maximè calent, Adolescentulus erat, paullò quàm ceteri tersior delicatiorque: quem ut nondum voluptas transversum egerat, ita, quin ejus tamen insidiis peteretur, nec ætas illum sua, nec

adhuc forma , fecerat immunem. Is ejusmodi Adolefcēs cū pilam ſemel iterumque non malè redditam expuliſſet , ſenſit ab eo repercuffu manum inſordescere , & paulatim à pulvere cænoque trahere labem. Ac fortè anulum in digito tum geſtabat , quem auro faberrimè factum , & palâ gemmâque venuſtum , à neſcio quâ Parthenope incautus acceperat ; eoque impenſè charum , ne quâ in ludo rumpe-
ret, aut certè cum manu reliquâ contami-
naret, decrevit exuere quidem illum , ſed
quo tamen in loco reponere , & cujus cu-
ſtodix committere tutò poſſet , aliquam-
diu ambigebat. Ita deliberanti venit in
mentem denique, ſi ludum interjungeret,
atque ad ſacellum tantisper à ſociis diver-
teret, reperturum ibi latebras, quibus anu-
lum anuliſque gemmam tutò commenda-
ret. Nec aſpernatus conſilium, curriculo è
turbâ ſe viaque ſubducit, ac ſolus in ſacel-
lum, quâ proximè aditus patebat, ſubit.

30 COMMODYM ſubierat, cū eminus
conſpectum aræ pegma, arte opereque cæ-
latum , oculos vagantes rapuit : atque ut
accedere luberet propius , ingens animo
deſiderium injecit. Circumſtabant ibi ſi-
gilla Cælitum multa, cū alia viſu perpul-
chra,

chra, tum verò VIRGINIS unum ex omnibus insigne, in cuius amplexu divinissimus Infans, hiantibus labellis, suavissimè renidebat. Ergo Adolescens dum ibi non perfunctoriè, ut in obviis; sed sollerter in singulis naviterque, ceu pertinax, inhæret; simul inter manus gemmantem anulum versat creber rotatque; videt opportunè, digitum indicem in sigillo Virgineo, præter ceteros arrectum, ita rigere, ut videretur ejus articulis inferi gemma percommodè posse. Hic ille jam sui, quis esset, & quorsum venisset, oblitus, de nullo neque pilæ amore, nec anuli custode cogitare; sed ab imaginis adspectu paullatim ad meditanda cælestia abreptus, cæpit ibidem in genua procumbere, & calculis mutatis, alias curas de aliis amoribus versare.

31 NAM quas, inquit, ego res ago, qui ludicris istis vanisque studiis captus, ætatem tamdiu traho? Anxii nos per omnes terræ angulos, quid oculos pascat, quid animum teneat, quid tempus otiumque fallat, aucupamur: & cælum ecce vecordes negligimus, quod unum hæc universa, si rogemus, pollicetur. Equidem certè hunc ipsam, quem amo, anulum, cui rei circumfero amens, & ne inquinetur, hic

tam cautè asservo, nisi ut vanâ me pulchritudine vanus ipse delectem? Nempe donum id hominis est; & hominis cujus? mecum unque, aut etiam ante me perituri. Tum autem tantillo teneri me vinculo sinam, eoque velut hamo impediri, ne ad libertatem adspirem? ejicienda semel est hæc animi mollities, & anuli, quamvis amati æstimatique, facienda jactura. Quanquam ne jactura quidem: nam ubi cælum ego suspexero, quos ibi mihi quantosque amicos comparabo? Memini fuisse, qui projectâ teruntii stipe, aut propinato frigida calice, Cælitum sibi favores mercarentur: quid si mihi amicitias & hæc forlasse gemmula conciliabit?

32. DIXIT: & aspecta miratus Imaginis
era,

Hæc, ait, hæc auro est digna Puella meo.

Simul anulum sibi detractum expedit, eoque subjectum Virginis, digitum gaudens induit. Nec anulum duntaxat suum commendat, sed se quoque totum in custodiam ei clientelamque tradit. Addit discretus preces, miscet affectus, affundit lacrimas, nihil prætermittit, quo demereri sibi & obligare custodem possit. Quin etiam ferunt, eorum ardore rem omnem confecisse,

cisse, ut repudiatis nuptiis (ad quas fortè jam tum invitabatur) illibatae pudicitiae florem in ejus Virginis tutelâ conservare decreverit. Facinus Adolescentis præclarum, & ad æquales posterosque cum laude transmittendum. Perierat anulus illi, si alteri fuisset custodiae commendatus: & meritò felicem tu tuum pilæ lusum judicabis, qui hanc tibi necessitatem imposuit, ut, quam gemmulam vanus profanusque assumpseras, eam religiosè glorioseque abdicares.

33 NISI in eo fortassis adhuc disputas, an existimari debeat gratum id etiam Virgini donum accidisse? Certè autem si dubia hæc tibi res videtur, attolle sis paullisper oculos, & tuo te dubio absolve. Fidem vestram! Sodales. Vix etiamdum digito Virginis anulum, uti monstravimus, indiderat; cum Virginis sigillum primores manus articulos (quos arrectos prius rigideque extentos gesserat) cœpit paullatim, velut adductis nervis, contrahere; digitoque introrsum inflexo, anulum acceptum sic includere, ut nisi vis fieret, indexque rumperetur, elabi manu eximi que porrò nequiret. Quod insigne spectaculum ut oculos Adolescentis insperatò rapuit, facile

persuasit, ut animū induceret Adolefcens, donum Virgini placuisse. Igitur nihil ultra cunctandum ratus, depositi fidem elatā voce ratam esse æternamque jubet, & mirificè lætus,

Serva aurum, ait, optima, serva;

Pulchrior in digitis fit mea gemma tuis;

quæ ipsa, si prius gemma non fuisset, jam certè contactu tuo disceret smaragdus, jaspis & adamas esse.

34 PLVRA quædam in hanc sententiam, quæ impetus ferebat, elocutus, cū opinione diutiùs hæreret, ab sociis reditum præstolantibus, moramque pertæsis, obruitur; atque ut intempestivas preces arumpat, pilæque ludicro se reddat, non instrenuè urgetur. At ille, veluti si rupes tunderetur, ad omnia surdus, nec voces audire, nec socios attendere, nec aliud curare, quàm quod in suæ Virginis simulacro conspexisset. Scilicet huc abreptus, animum sentiebat melioribus studiis operari, quàm si pilâ volatili, aut alio ludicro tempus miserè fefellisset. Quamquam ne istud quidem, in hac, inquit, arâ defuit, ut ludo prorsus omni carerem. Etenim dum inter æquales meos, interque pueros ludere adhuc me arbitrabar, inexpectatò vidi,

Non

Non Pueros mecum ludere, sed Superos:

nisi vos ludum fortasse, ludiq̃ue genus eximium hoc esse non putatis, si mutas Cælitum imagines improvisò animari, manuq̃ue prolatâ micare digitis, & ultrò non ad incerta fortunæ, sed ad opima gratiæ lucra, invitare videatis. O felicẽ hunc meum errorem, quo insciens, cùm à vobis secederem, huc sum delatus! ô sæpius utinam citiusq̃ue sic errassem! Et vos tamen hinc me abducere? vos ad vèstra rursus diludia pellicere speratis? Miseri jam planè vos, qui talia suadetis; quantò miserior ego, si persuadere vos sinam? Quin agitis autem, ipsiq̃ue transire in has potius partes maturatis? meq̃ue in ludo meliori aut studetis omnes imitari, aut certè, si alia mens est, cessatis remorari?

35 Hic mihi, Sodales, compertum adhuc non est, an commilitonibus suis in causâ æquissimâ persuaserit Adolescens. Profectò autem si animus nobis sensuiq̃ue est, qui Virginis esse clientibus debet; nos ii libentes erimus, quibus ille persuasisse se gratuletur. Circumfundimur vanis, ecce, & magno inani passim laceessimur: neque tam ludimus pilâ nos, quàm pilæ in modum ludimur ipsi trudemurq̃ue. Alium

idque, si mortalia inter se sola componantur, vulgo non absurdè credimus; tamen esse nihilominus in cælo saltem aliquid, quod omnibus homo velit oculis posthabere, nulli nos quidem dubitamus, qui tot Heroum & Heroidum millia scimus nullis olim corporis artubus ita pepercisse, quin illos, ubi res posceret, in Dei causam unâ omnes cum oculis audacter impenderent. Sed retinere quædam etiam alia cælum, quæ singula (quanquam longè Deo sunt minora) digna tamen sint, ut ea nos toto luminis oculorumque impendio licitemur; appositâ, nec, ut opinor, injucundâ narratione demonstrabo.

37 MAGNÆ sunt & eximiæ laudes, quibus quotidie Dei sanctissimam Parentem non modò nos ejus alumni prædicamus, sed sacri etiam Vates, loco non uno, mirificè magnificeque attollunt. In quo enim alio argumento possent ullæ se laudes aut uberius effundere, aut sublimius attollere, aut latius explicare, quàm in eâ Virgine, quæ una post homines natos

Nec similem sibi visa aliam est, nec habere sequentem?

& quæ itidem, quicquid ornamenti per universos Cælites dispersum est, id omne velut

velut in se unam congestum esse collatumque, cum nullius injuriâ gloriatur? Neque enim in aliis virtus ulla laudari sic potest, quæ continuò ad hujus aut modestiam, aut pudicitiam, aut prudentiam, non erubescat. Nec usquam in terris tanta exstitit vel adversus Deum religio, vel in adversis fortitudo, vel in prosperis moderatio, quæ ad aliquam ejus comparationem ausit adspirare. Quid? quòd ne mentium quidem beatarum charitas in tantam adhuc flammâ proruperit, quin præ istius incendio tepere se totam & algere confiteatur? Quare meritò divini Vates, quod cundo per singula virtutum ornamenta, finem modumque desperabant, invento compendio, totam utique pulchram, mulierumque pulcherrimam, & neque maculæ consciam, neque nævi ullius suspicione contactam, pronuntiarunt.

38 RAPUIT hæc tanta Virginis formositas non Superos duntaxat omnes, ut suos in eâ cuperent obtutus jam olim defigere; sed hominum quoque sensus oculosque laudata pulchritudo læcessivit. Ecce enim in desiderio tam felici nos soli aliis omnibus concederemus? non adeò luscii hebetesque cæcutimus, quin ad tanta formæ miracula

miracula etiam nos convertamur. Et verò ut aliqui nostrum sint, qui excitari hac hujus Virginis venustate, ad oculos olim attollendos, tergiversentur; non æquè tamen & ille se Adolescēs continebit, quem veterum mihi monimenta produnt, admirabile nobis, cum in colendâ demerendaq; Virgine, tum in ejusdem aspiciendæ desiderio, exemplum reliquissè. Nam ut ejus in paucis erat studiosus, ita cum incredibilia quædam, ac pænè divina lætitasset, quæ de singulari ejus splendore ferebantur; non temperavit, quin audacior aliquando erumperet, votisque conditione humanâ majoribus indulgens, eam, cujus obsequiis se totum emancipasset, oculis mortalibus intueri desideraret. In quo quidē conatu, tametsi non deerant quæ detertere spem immodicam possent, animum tamen obfirmavit Adolescens, ut omnia sibi de propitiâ Matre polliceretur. Nam quid illa supplicibus, inquit, suis negaret? Aliquis ingenium sibi artesque bonas postulârat; & biduo post, plaudente Lyceo Philosophus prodiit. Alius suam ei valetudinem, moriturus, commendârat; & stupente Machaone revixit. Alius hac patronâ in libertatem è vinculis evasit. Alius, quos

hostium

hostium mucrones, & jam strictos in jugulum enses viderat, hac imploratâ, retudit illicò territòsque disjecit. Et quid singula persequor? nemo irritâ prece hanc ejus aram oneravit. Quare neque me finet unum inexorata repulsam ferre.

39 NIHIL his precibus Virgo, quamquam audacibus pæneque violentis, offensa, pium candorem libens excusavit; ei que, quòd ita meritum de se videret, morem statuit gerere. Decretâ legatione, datur negotium ephebulo cælesti, qui prænuntius eat; & Juveni, valuisse preces, quibus cælum importunis fatigârit, significet: simulque quando, & quibus conditionibus in conspectum ventura sit Virgo, ostendat. Accingitur itineri nuntius, & quo decuit ornatu ad Virginis clientem descendit. Fortè Adolescens etiam tum de genibus supplicabat: cum videt ex adverso subeuntem hunc alitem legatum, cujus

Aurea velabant generosum vellera pectus,

Fluxerat ad niveos serica palla pedes:

Cæsaries radiis, vertex erat æmulus astris,

Inq; oculis Lunæ flamma duobus erat.

Obstupuit visu, & insolitâ oris honestate percussus, quid inciperet Adolescens, aliquamdiu nesciebat. Quid nî enim istud in

cælite tam radiato? Nimirum, ex famulo pronum erat conjicere, quis Imperatricis ipsius habitus, quæ formæ dignitas, quantumque splendor esset.

40 CETERVM ubi se animus denique collegit, etsi vehementer hominem etiam is ejusmodi aspectus tenuit, implere tamen desiderantis expectationē adeò non potuit, ut in querelas effusus, cum cæli parsimoniâ liber expostularit. Aliud certè se suis tam ardentibus votis à cælo contendisse, aliud modò concessum videre. Illam cernere unam optasse, quæ cæli terræque posita, lunam pedibus substernere, lateraque ambire radiis consueisset. Nec dum sensus ita sibi omnes hebescere, ut imponi oculis tam facilè sinat; quantisque intervallis à Cælitum Reginâ cælites alii distent, penitus ignoret. Quas quidem querelas non eò spectare, quò fastidire se nuntii cælestis pulcherrimos vultus ostendat (quæ enim censura supercilium tam arrogans non damnet?) sed quò doceat, in cælo quoque delectum sese habere; & ignavæ eum indolis esse, qui ex tanto deliciarum divitiarumque emporio, si optio permittatur, mediocria nundinari, quam optima sortiri malit.

41 VERVM his adeò querelis opus non fuisse, brevì pòst ipsa res aperuit. Nam commodum iste, quem diximus, Virginis minister in loco substiterat, cùm Adolescenti, quem qualemque ab exoratâ Præsidente nuntium afferret, gratulans exponit. Auditas esse in cælo preces; & quicquid avidissimè petiisset, id impetratum abundè concessumque ad assem esse. Videret modò ipse, quanto id bono suo petiisset. Nam velle omninò Virginem ei dare se videntam; quâ quidē conspectâ, propemodum omnis seu optandi curiositas, seu videndi voluptas, seu retinendi cupiditas possit exsatiari. Sed caro tamen hunc ei statutum Virginis aspectum: ea propter deliberaret secum in se, quantas quasque profunderè opes eam in rem placeret, ne, audito pòst impendii sumptu, sera voti pœnitudo sequeretur. At Adolescens injuriam ratus si deliberaret, audacter instat, jubetque hoc metu nuntium supersedere, & pretium, quantum id cunque esset, edicere. Nam mercem mihi hanc, inquit, vel regni, si quod sit, jacturâ prodigus emam. Indica tu pretium, & vendidisti.

42 QVIS in Adolescente tenero hanc animi vocisque magnitudinem non admiraretur?

miretur? In discrimen hîc ei totum patrimonium devenerat; senseratque se & corporis vigor, & ingenii acumen, & voluptas, quamvis honesta, jam periclitari; quippe abdicanda confestim, & ex pacto, si poscerentur, amittenda: nec tamen animum hæc horum jactura perturbabat. Interim, quò exploratius ea virtus constaret, rejicit ambages nuntius, hominiquè palàm, quid eventurum sit, prædicit. Velle quidē indulgere se oculis mortalibus immortalē Virginem, sed eâ tamen lege, ut oculi ab eo deinde aspectu mortale penitus nihil intueantur. Nec enim æquum videri, ut oculus semel ad tam sublime cæli spectaculum admissus, postliminium habeat ad terræ cœniq̃ue sordes contemplandas, quarum obtutu inquinetur. Igitur, Quos tu oculos, inquit, in Virginis ore semel defiges, iis captum illicò te, simul illa recesserit, senties: ita quidem, ut exinde cæcus, nullam lucis usuram sis habiturus. Hoc tu dispendio si neque dum etiam moveris, mactæ animi Adolescens, die crastini feliciter simul & votis te Virgo damnabit, & oculos tu tuos in aspectâ dilectâque Virgine funerabis. Dixit hæc aliger ephebus; nec expectato hominis responso,

sponſo, ex oculis reſeſſit.

43 FVLMINATAM hoc edicto ſuã conſtantiam ſenſit Adoleſcens. Quem enim vos magnificè loquentem, & cum cælo, quod ajunt, Attalicis conditionibus paciſcentem, ſuprà audiſtis: ille (quis noſtrũ crederet?) cum diſerte, quanto impendio ſtaturum ſibi votum eſſet, è nuntio reſciſſet, cœpit anxie mala futuræ cæcitatſis, longæque noctis caligines, ſecum reputare. Et quid occipies tunc miſer? aut quò te cæcus deinde convertes? nempe ut brevſis quædam oculis voluptas obtingat, oculis æternũ carebis? Aut gratius te facturum Virgini credis, ſi nobilem ſenſum, quo uti quondam ad Dominæ obſequia etiam ſenex poſſes, in hac juventũ præmaturè exſtinguas? Reſerva, quoad ſine ſcelere potes. Erit olim ut fortasſe tu non poſſis, quando te hos oculos aut fides jubebit ſodiendos tyranno dedere, aut alia neceſſitas coget pro civibus patriaque impendere: tum enim verò tu liberaliter, quicquid ſanguinis animæque ſuperabit, cum oculis profundes: nunc dum retinendi parcendique libertas eſt, quid, intempèſtivè prodigus, amittis?

44 DVM hæc apud animum ſuum perplexus

plexus assiduè volutabat, oculorumque jacturâ hæctenus terreri se sentiebat, ut amor tamen aspiciendæ Virginis nihilo minus perseveraret, incidit ex improvîso consilium, quo uno Juvenis simul & suum impleri desiderium, & vitari cæcitatem credebatur posse. Adeon' ergo tu, inquit, incogitans es, ut oculos te duos habere non recorderis? aut eos tibi ambos æquè necessarios arbitrare, quibus Virginem expectatam contempleris? Utrovis imò, & alterutro potes: quid utriusque tu cladem de nihilo formidas? Age sis ergo, manuque objectâ lumē sinistrum occlude; dextrum verò simul & spectaculo impende, & periculo, quodcunque est, audacter committe: honestius hoc illi funus erit, quàm alteri sua salus & vita. Deliberari jam porrò non debet. Inventa tibi est via, quâ neque à Virginis adspectu excludare, neque lucis hujus solisque usurâ spoliare.

45 PLACUIT in hoc sibi commento Adolefcent, nunquam æquè ac modò ingeniofus. Jamque intereà momentū suberat, ut virginum Virgo pulcherrimo cum comitatu intuemdam se juveni fisteret. Venit: & , ô formæ formam elegantem! ô frontis serenæ! ô oris ambrosii! ô lineamento-

mentorū omnium venustatem ! Quid hīc calami rudes , quid infantes linguæ , quid verba imparia nequicquam laboratis ? Succumbe omnis oratio , palamque confitere , hīc neque Apelli penicillum , neque Praxiteli cælum , neque Demostheni colorē sufficere ; ac tibi præsertim omnia deesse , quibus umbra pulchritudinis hujus possit adumbrari. Certè autem , simul huc Adolefcens destinatam aciem convertit ,

Omnia sunt uno sidera visa loco :

Lunaq; se lunam , solem sol esse negavit :

Virginis os oculo lunaque solque fuit.

Potuerē quidem & comites ephebuli , & quotquot Gabrieleſ cum Virgine aderant , non ad eò deformes putari , quin ad eodē oculus Adoleſcentis ex intervallo diſſerteret : ſed hi omnes dedere veniam , etiam neglecti & contempti : in unā enim Virgine contemplandā fixus & occupatus , non habuit cauſas oculus felix , cur in ſtellulæ ſcintillā quæreret , quod ubertim ipſi Solis radii miniſtrabant.

46. VERVM enimuerò , ut magnam , ac prope dixerim immenſam ab eo conſpectu voluptatem hauſerit Adoleſcens , longam tamen eam ac diuturnam capere haud potuit perinde. Nam objectæ lucis , qualem

antè

antè non viderat, impatiens, visum omnem illicò sic hebetavit, ut offusis repente tenebris, nullum oculi illius usum deinde reservarit. Quòd ipse tamen, cùm oraculi fidem evenisse jam sentiret, tantum abfuit ut lacrimis hanc oculi unius jacturam prosecutus, miserum se infelicemque clamitaret, quem voti damnosi temeritas præceps fefellisset; ut ter potius quaterque miserabilem se crediderit, quòd formæ celestissimæ alterum duntaxat lumen præparcè avareque admovisset; & alteri oculo, dum timidè nimis stulteque pepercerit, famam gloriosissimi funeris invidisset. Atque oculum, inquit, ô jam denique dignum, qui nihil posthac videas, postquam videre hanc cæli faventis elegantiam noluisti! Nempe ut putidum terræ cœnum spectare triduo, fecesque has pedibus calcatas inspicere adhuc posses; tu ad hos lunæ solisque radios erigere te attollereque directasti? Dabis ipse tu pœnas tibi; & socio feliciter jam tumulto, ad hoc solum vi-
ves, ut semper semperque lacrimeris.

47 Tvm tu autem, virginum Virgo pulcherrima, ab hoc oculo tam stolidè stulteque cauto, quin pœnas irata sumere festinas? Expectat jam ultrò, seque reus ad

dandum supplicium, quod meretur, accingit. Nam occæcari & exstingui, hoc ipso quod noluit, debebit. Debebit inferias has gemello suo, ut suo illi occasu parentet; & quem comitari generosâ morte noluerat, eum subsequi saltem & imitari jam denique addiscat. Nec verò tibi operosum fuerit, hac illum parte vindicare. Exhibe te duntaxat illi, lucemque tuam offunde, & continuò excæcasti. O supplicium mihi optabile! ô necem oculi beatam, quam exstincto invidere omnes superstites possint! Irata videbere, si distuleris punire. Clementiam Virginis exacta supplicia comprobabunt. Neque metue verò, ne rursus ignavâ manu scutum oculo superstiti obtendam. Ipse ego palpebras illi, si etiam renuat, diducam: ipse, ut venienti sideri inconnivens occurrat, impellam: ipse demum, si Argus adedò, hoc est, oculus totus sim, unum ex tot oculis meis reliquum mihi non faciam, sed omnes spectaculo tam amœno prodigus impendam, lubensque

*Perdam lumina mille, deinde centum
Perdam millia, dein secunda centum,
Deinde usque altera mille, deinde centum,
Dein post millia multa, multa rursus*

Optem

*Optem millia luminum, in cupito
Visa perdere Virginis theatro.*

48 SECVNDVM has querelas, alteraꝫue Adolescentis vöta, quid evenerit, audite, Sodales, & rem novam in Virgine nostrâ plenam suavitatis agnoscite. Ea enim cum hæc Adolescentis postulata non immeritò posset aspernari, oculoꝫue jam altero visi, nullam dehinc sui videndæ copiam facere; nihilo tamen minùs, ut si lege teneretur ad bene ei faciendum reversa: se verò cum primis redituram, atque oculo etiam alteri delicias facturam, humaniter promisit. Jam proinde pruriebat in scenam oculus superstes: & volens libensque ad suas ipse inferias intentus, alterum Virginis adventum expectabat: cum, ecce tibi, iteratò illa, & jam seipsâ (quis credat?) formosior illustriorque prodiit; diceret, pyropis undique & smaragdis & adamantibus coopertam, siderum omnium splendorem extinxisse. O conspectum admirabilem! ô frontem iterum! ô speciem! ô formam denudè elegantem! Quis colores de cælo, mihi præstet? quis artem commodet? quis penicillum manumque ducat, ad os habitumque Virginis informandum? Nam ut nihil de reliquo corporis ornatu dicamus,

ipsæ adeò vestēs, & vestium tot uniones ac gemmæ, omnibus locis intertextæ, vel solæ retundere suâ luce superstitem oculum, eique diem & vitam eripere omnem potuissent. Quod quidem uti fieret, oculus ex conventis pactisque præstolabatur. Sed non æquæ & Virgo propositi tenax fuit, ut in alumnum jure suo rursus duceret utendum, alteroque, ut meritum ejus erat, oculo multaret. Quid enim? adeòne triste sidus & grave sibi ego, ut aspici sine noxiâ non queam? Adspiciat imò, sentiatque non modò superstitem oculum hac luce meâ non obtundi, sed alteri quoque jam antè extincto lumen suum vitamque postliminio reddi.

49 DATE veniam hîc mihi, Sodales, si in hac Adolæscæntis fortunâ contineo me, ut nondum exclamem. Juvat enim, si usquam aliàs, hîc cæte obmutescere. Refugit linguæ officium lingua; hæretque hebes omnis oratio. Solæ aures nimirum vigent, & inter hæc Virginis spectacula, quid Adolæscens iteratò beatus agat, dicatque, curiosè auscultant. Quamquam ne ipse quidem aliud jam potest, quam ut magnitudine miraculi sui oppressus, unâ nobiscum feliciter obmutescere se dicat.

V.

B. VIRGO, Adolescentis apud Filium patrona.

Ex Relatione Ioannis Salleri.

SUMLTA quidem majorū & illustria
exstant documenta, quæ animos
nobis non mediocres faciunt; ut erecti, in
spem veniamus, fieri nunquam posse, ut
clientes in magnæ Virginis fidem tute-
lamque recepti, de capite saluteque sic
periclitentur, quin ejusdem auspiciis &
auxiliis denique respirent, inque tuto ite-
rum collocentur. Hæc tamen ipsa, si omis-
sis veterum historiis (quibus plena sunt
librorum monimenta) unico probissimæ
notæ exemplo aggrediar confirmare, erit,
opinor, consilium meum nec à temporis
hujus locique rationibus alienum; nec vo-
bis, Sodales, quorum omnium vel maxime
interest, injucundum.

SI APUD Ubios, Rheni veteres nobi-
lesque accolas, Adolescens erat, loco na-
tus, ut ajunt, perhonesto, & parentibus ap-
primè copiosis; à quibus infans ad omnem

vitaæ honestatem, morumque elegantiam formatus, institit ipse dein animum ad litteras mansuetiores applicare. Eà fini Coloniã petiit Agrippinã, celebrem Musarum sedem, bonisque studiis & jam olim inclytam, & novã gloriã tum insuper florentẽ. Nec erubuit suum locus alumnum; sed brevĩ tot ejus præclara specimina vidit, ut in illo cum indolis bonæ præstantiam, tum ingenii felicitis copiam, & maturæ virtutis uberem proventum sæpè suspexerit, magnoque opere commendaret. Eminebat è reliquarum virtutum gloriã, luculentus erga Virginẽ hanc nostram cultus & amor; qui cetera ejus ornamenta, quanquam seipsis conspicua, unus tamen facilè omnia, ceu major illustriorque, obruẽbat. Nullus ibi æqualium, qui Adolescentem piis erga superos obsequiis vinceret: pauci, qui propius concertare; multi tamen, qui imitari præeuntem, & ducta per eum lineamenta, suis in se coloribus exprimere laborarent. Trahunt enim socios exemplã; atque id, quod, an fieri possit, ambigitur, non fieri solum posse, sed & factum jam esse ostendunt.

52 NEC tamen extulit hæc Adolescentem, quã valere apud suos se sentiebat, existi-

existi-

existimatio; sed, quod ipsum modestiæ præclarum argumentum est, ad majora melioraqué studia quotidie incitabat, ut adeò clientem se instrenuum desidemque crederet, ni melior seipso, Virginiq̃ue in dies familiarior redderetur: eam unam sibi fieri injuriam arbitratus, si officium clientis adversus patronam argueretur omisisse. In hac morum optimorum virtutumque palæstrâ etiam istud observatè retinebat, ut pro eo ac leges domesticæ sanciebant, diurni nocturnique temporis rationes à se ipse gnavè severèque reposceret, & ut quidque conturbasset, id per, exomologeses, octavâ quaque luce, identidem cum lacrimis expiaret.

53 Accidit fortè, ut in eâ consuetudine, cùm ad Sacerdotis pedes abjectus, animum noxiis probè exsoluisset, ad aram inde rectà contenderet; & ex more in lacrimas effusus, Virgini patronæ impensius ibi supplicaret. Impositum aræ pulcherri-
mum Virginis signum erat, & in virgineo sinu Christi pueruli sigillū, arte auroque, ut mos est, fabrè concinneque laboratum: quæ Adolescenti causâ fuerat, cur precaturus illuc plerumque libentiùs, quam aliò quoquam, se conferret. Hic inter preces

aliquantò vehementiùs exarserat, Matremque, ut filio se suo commendaret, anxie proluxeque obsecrat: cùm interim oculis in aram sublatis, videt insperatò rem dictu audituque terrificam, plenam ominis & consternationis. Etenim unde amoris argumenta solatiaque sibi poposcerat, ibi aduersa, infesta, funesta, miser omnia conspiciatur. Videt, Pueri placidissimi frontem repentè in rugas coire, videt serenos olim oculos ignis in modum candescere, videt ora vultusque torvum abnuere, videt Pueri sigillum (quid enim ipse me differo?) circumactâ cervice, faciem ab Adolescentis adspectu avertere; & utique nec aures jam precibus accommodare, qui oculos impendere precanti recusasset.

54 Quid homini in hoc tam prodigioso spectaculo fuisse animi vos putatis? Nempe quod quisque nostrum continuò faceremus, si cælum Deumque iratum incumbere, si non fulmina, sed tartara minitari conspiceremus: id facilè & illum in hoc ominoso conspectu fecisse conjicimus. Credam ego totius oris colorem evanuisse, & infuso gelu. capisse sanguinem consistere, rigescere artus, compavescere

scro pectus; sensus, vires, animum defluere; & si quid his tristius natura solet in terrore tragico ostentare. Quid si etiam ab insolenti portento amens resiliit? Quid si metu exanimis humi concidit? Certe autem vel perterritus, illicò exclamavit, vel attonitus ipsum ad querelas sensum vocemque amisit. Potuit enim hæc omnia tunc infelix; atque ut adeò posset, materies ei gravis ac multa suppetebat. Quamquam hæc cum omnia factitasse non perendo: quin potius est, ut putem, strangulatum intra se dolorem fuisse, cum nusquam esset, quâ parte totus in libertatem erumperet.

§§ INTERIM in hac animi tempestate, cum Adolescens ab ipso portu, quem in Virginis patrocinio quæsierat, rejici se videret; proximum habuit, infelix, ut rectâ ad Sacerdotem regressus, suas ei querelas oculis humentibus deponeret; & miserum utique se deploratumque ingeminaret, quem Cælitum hominumque favores averfari; à quo, velut à pestilentiae contagio, omnes refugere, quemque Numen ipsum oculis atrocibus, & vultu stomachante, & fulminante supercilio degenerem projicere, abdicare, condemnare vi-

deretur. Quid reliquum sibi fieri, quàm ut ætatem æternitatemque infelix incœreret, qui mitissimæ Virginis suavissimæ proli odio contemptuique jam esset? Rê deinde omni, ut erat, cum lacrimis explicatâ, quid capiendum consilii, quamque opem implorandam sibi suaderet, expectat.

56 PERTVRBATUS hoc quidem infortunio Sacerdos, quid adeò responderet, vix inveniebat: tamen, quòd indolem hominis innocentiamque sibi crederet esse exploratam, jubet, quicquid id ominis foret; mactè animo esse; & secum, ecquid facinoris olim noxięque abstrusum ferret, seriò cogitare; nam eò fortassis hæc rerum prodigia spectare. Verùm Adolescente, inspectis omnibus animi latebris, & nullius labis celatæ consciunt se professo, cœpit non abs re suspicari, aliorsum hæc averse imaginis indicia tendere: & indagari reliquum ex ipsâ Virgine debere. Monet igitur, ut eòdem, unde venisset, opportunè redeat, iterumque Virgini cum instauratis precibus supplex fiat: pertexeret ipsa telam quam cœpisset, sibi que bono, infaustum ænigmatis omen, vel propitia tolleretur, vel exorata planius apertiusque declararet. Paret impigrè Adolescens monenti;

nenti; cujus nunquam, ne aliâ quidem in re, imperium detrectarat. Trepidè ad aram recurrit; nuper amabilem sibi, & suavitatis ac solatii compertam, nunc horroris & consternationis plenam. Ibi miser ad misericordiæ tribunal prosternitur, & quâ summâ contentione potest, veterem Patronæ clementiam adoritur; certus, nulli eam fuisse unquam inexorabilem, ac proinde nec sibi uni difficilem fore, quæ omnibus aliis mitem se facilemque præbuisset.

57. IN hanc sententiam dum perorat, miscet optimos eloquentiæ colores, lacrimas, quibus solis noverat in eo foro causas appositè in primis apteque perorari. Verba amplificat gemitibus, exaggerat suspiriis, iterat singultibus, desideriis exornat. Denique cum hæc omnis dicendi copia sese in exorandam flectendamque Virginē effudisset, voxque suprema Adolescentis in hoc epiphonema desineret, percontantis, ecquid illud foret, quod in cliente abdicato aut Mater adeò horreret, aut filius odio implacabili refugeret: tum, ecce, novum aræ majusque prodigium! Statua Virginis paullatim animari, reserari imaginis ora; formari, pronuntiari, audiri loquentis & increpantis verba. Verba tri-

stia, feralia, funesta! verba, qualia nobis olim ne sint audienda, Superi boni! satius sit, mortem, quamvis tragicam barbaram-que, oppetere. Quæ tamen hæc tandem, & qualia verba? auscultemus.

§8 NAM si facessere ab arâ supplicem, temploque excedere Virgo jussisset; si hominum conspectus & ora vitare, si vota precesque omittere, dissimulandum sibi dolorem, & ferendum utcunque convitium putasset: si etiam in ultimos terræ angulos aliquò refugere, ibique aut oculos fletu conficere, aut corpus inedia vexare, & potu sibi victuque interdicere; accipiendam & hanc fortasse conditionem, patienter, censuisset. Ut verò à Virgine totus abesse, ut à filii conspectu abscedere, ad neutrius amores favoresque adspirare porrò juberetur, id enim verò nemo, quamquã ferreus sit, vel audire æquo animo, vel dissimulare patienti silentio sustineret. Et audiit tamen hoc infelix: audiit, inquam, causæ genus atrox & lamentabile, cur suum ab illo vultum animumque suavissimus infans alienarit: causam profectò, ut Adolescenti novam & inexpectatam, sic ipsi etiam Virgini gravem & odiosam. Quid enim, inquit, Adoles-

lescens

lescens incaute, quid hæcenus miraris, quodque venire te filius in suum sibi conspectum nolit, conquereris? Temetipse tu reum perage, ut qui tesserâ signoque legitimo destitutus, huc viam audax affectes, Christianum prius insigne tu indue, quàm hic ullas clientum meorum prærogativas expectes. Nam quoad symbolo signoque filii mei carebis, tu notorem habere filium non potes.

- 59 Hoc elocuta Virginis effigies, obmutuit, novoque Adolescentem fulmine, non tam afflatum ibi, quàm exanimatum, reliquit; quippe qui perplexus eò magis anxiusque jam stupebat, quò minus, ecquod suum in se signum Puerulus requireret, intelligebat. Certè enim, sive fides & religio familiam ejus insignit, ego me domesticum & familiarem, audientibus tyrannis, confitebor: sive amor clientulos distinguit; ego nemini in hac tesserâ concedam: capiat experimenta quæ volet, jubeatque, sive cum Stephano saxorû grandini caput subicere, lapidabor; sive cum Laurentio super sartagine & prunas incumbere, ardebo; sive aliud malit, nullum ego clientis symbolum detrecto; dummodo quid ille signi desideret, palam aper-

teque edicat. Igitur anceps, obscuram oraculi vocem ad eundem interpretem refert, cum quo cetera animi arcana jam antè communicarat. Atqui is, ubi de Christi signo accepit, quod esse impressum adolescenti Virgo pernegasset, haud de nihilo conjectans, hominẽ suspicatur sacro fonte nondum esse legitimè lustratum. Quamobrem animo constare, & benè de cetero sperare jussum, sciscitatur, ecquo tandem indicio compertum habeat, undis olim salutaribus fuisse initiatum. Adolescens, quæ visum est, respondet. Negat, sese argumentum, cur eâ in re dubitet, ullum videre, ut qui inter Christianos parentibus optimis natum se meminisset, quos utique officio non defuisse, quin filio, in summâ re, cum per ætatem ipse sibi non posset, consultum irent. Injurium se adversus progenitores futurum; si de hac illorum voluntate industriaque duceret ambigendum.

60. PERSTAT nihilo minùs in proposito Sacerdos, ut hominem fonte piaculari ablutum fuisse inficietur: id enim & Christi, & alumni Christiani princeps symbolum atque insigne videri. Ad hæc, fieri facile potuisse, ut aut parentum studia, aut nutricularũ officia, aut familiæ obsequia,
tempo-

temporum injuriis circumscripta , non perinde ac oportuit advigilarint ; sed humanum aliquid passa , per ignorance[m] offenderint. Et credin' tu inanes has mutarum imaginum voces & minas fuisse ? Incumbendum scilicet operi est, & ratione, quàm sollertissimâ potest, naviter ad primos infantiæ natales recurrendum, indeque latentis mali scaturigines petendæ. Sunt domi tuæ notores adhuc superstites ; & ut parentes in vivis esse desierint, erunt obstetrices certè, aut nutrix aliqua, & gregula anus restabit, ex quâ verum vel precario cognosci, vel pretio exsculpi possit. Bonis igitur auspiciis ad patriam nullâ interpositâ morâ contendes ; ubi cùm rem omnem, ut gesta est, pervestigabis, hoc, quicquid prodigii fuit, non tetrum tibi adversumque omen, sed lætum scias salutis initium fuisse ; magnæ Virginis faventiâ clementiaque præmonstratum.

61 Quid denuo multis hîc ego vos suspendo ? Non petendi audiendi que consilii, quàm exsequendi, avidior Adolescens, animum inducit, rei cognoscendæ, ad patriam, tametsi longinquam, illicò revisere. Accingitur ad iter, ingreditur, incertum, spei propior an timori. Denique quò ire insti-

instituerat, pervenit. Ibi felicibus indiciis anum reperit, superstitem adhuc, illam ipsam quæ se nutricem ejus fuisse & ferret, & (nondum gnara quæ res ageretur) liquiddò testibus probaret. Eam ille, quâ licuit, de turbâ seductam, blandè primum amannerque, mox compressè violentis precibus adoritur, per suavem alumni lactisquæ impensi memoriam obtestatus, atque insuper patrimonii sui (quod parentibus jam functis haud contemnendum aderat) semissem pollicitus; si quid, se factum, ab ipso statim partu, meminisset, dolo nullo, quàm verissimè planissimequæ recenseret. Menti aut dissimulanti, nullum à se neque pretium, nec præmium poni: candidè, quicquid foret, confitenti, summa omnia reservari. Eam in rem pignori opponit fidem, Deumquæ & sidera testes.

62 FEMINA & suo pte ingenio minimè mala, & monstrato auri hamo magis illecta, facilè ad omnem rei seriem ab ovo renarrandam adducitur: & quando statuere secum non potuit, utram in partem mendacio suo proficeret, officeretve, maluit rem fide ordinequæ, ut evenerat, commemorare. Matri se adfuisse parturienti, suisquæ ipsum, ut primulum editus infans fuerit,

rit, manibus sustulisse, quæque alia ex usu fuerint, fecisse: postremò, (quòd ea tunc temporum injuria esset, ut urbs omnis Anabaptistarum furore non clanculò infecta, sed per vim apertam obsessa, nihil liberum neque immune Catholicis, ad sacra patria palàm obeunda relinqueret) parvulum suâ se manu clàm domi aquis lustricis abluisse; ne, si quid humani per moram accideret, puer æternitatem infelix esset. Ita se & piæ matris voluntati, & prolis saluti consultum iisse. Exhilaratus narrationis candore Adolescens, cùm intelligeret orationi fucum dolumq; abesse, collaudat feminae studium: eaque propter tantum illi se deberé confessus, quantum adhuc nemo alumnus suæ nutrici debuisset: instat callidè, ecquo autèm ritu, quo liquore superfuso, quibus verbis, & inquam formulam conceptis, rem saluberrimam peregerit, sciscitari. Illa, quo quidque modo perfecerit, eâdem simplicitate, gestiens recenset: E sacris legitimis nihil à se prætermissum esse. Nam aquâ ter super infusâ, caput respersisse; ter preces salutares, ac patrium nescio quod carmen ter pronuntiasse, quo puerum Deo Deiq; Matri consecrarit. Tantum esse, quod factum

ctum meminisset. Inde infantem, cæli securum, ad cunas retulisse; eiꝛue se, quoad ætas poposcerit, lac pultesꝛue ministrasse.

63 *AVDITA* rei gestæ historiâ, facile habuit intelligere *Adolescens*, ita se quidem ab anu sedulâ procuratum fuisse, ut verbo tenus in Christi Virginisꝛue nomen adoptatus, re tamen verâ ad Baptisma Christianum non pervenerit. Quare ut ea cognitio quemvis alium prosterne potuisset, ita hanc generosæ mentis indolem, diuturno mœrore jam antè haustam absorptamꝛue, feliciter in pedes, magniꝛue eventûs exspectationem erexit. Pòst enim quàm adcò comperta testataꝛue omnia vidit, ut dubium nemini jam esset, quin aniculæ confessio cum Virginis oraculo planissimè consentiret; & Baptisma legitimum, quod in puero neglectum per inscitiam fuerat, jam demum Adolescenti instaurandum esse: rebus omnibus domi, quò per tempus licuit, compositis; actisꝛue; indici, quas pactus fuerat, gratiis, postliminio Coloniam revertitur, æquè gaudii nunc immodicus, ac paullò antè mœroris. Ibide felicibus eventis nuntiat, quæ ipse ei Sacerdos, haud vanâ conjecturâ vaticinans, prædixerat. Ex eo crebrescere fama,

& ad plures differri; paucis diebus demum undique magno numero concurrere, & Adolescentem frequentes circumflare, rei que seriem, ut cuique propior ille notiorque erat, perquirere. Eum unum Virgini parenti in primis utique curis fuisse, quem prodigio tam insolenti non deiecerit illa aut abdicarit, sed erexerit verè atq; adoptarit. Periturum fuisse, ni tali fuisset ostento consternatus.

64 ABREVNT secundum hæc dies complusculi, dum & loci Antistes ritè consulti-
tur, & Baptisma solenne, quæque alia ad pompam opus erant, adornantur. Quo toto tempore quos illum intra sese æstus, & quantos credibile est amoris ignes persensisse? Cùm enim ad salutarum fontem candidatus proximè duceretur, cùm tingi jam abluique cælestibus undis inciperet, cùm Christiano tandem insigni vestiri se, jamque non illo anili nutricis carmine initiari, sed in Patris Filiique & Spiritûs æterni nomen auctorari ritu legitimo videret; quos, inquam, animi motus, quæ gaudii exuberantis incendia, tum ille censendus est habuisse? Tum utique redire in suam sibi infantiam, tum primævam innocentiam repetere, tum abolere universam & culpæ

culpæ fuliginem , & pœnæ formidinem deponere videbat licere. Quoties per eos dies ad aræ suæ pegma recurrere ? quoties ibidem, jam lætior, in genua procumbere ? quoties Puerulo cælesti , jam nihil , ut olim, abnuenti, supplex fieri perseveravit ? Quas ibidem Virgini matri gratias, quamque crebras, quamque impensas, putandus est ideò solvisse, quòd quem clientem filius infans rejecerat , matris clementia conservavit ? Neque in hoc conquievit æstuans animus; sed semel his cæli favoribus occupatus, exarsit (ô factū sapienter!) illicò & alterum patrimonii semissem relinquere; abdicatisque opibus, illices voluptatum cupidines excutere, tum etiam mendaces honorum titulos, quibus invitari se senserat, æternū abolere, & ad servitutem Deo serviendam, in religiosi nominis familiam, gratulante cælo, concedere.

65 TANTI nimirum fuit, Sodales, in Virginis nostræ clientelâ vitam semel instituisse, tanti Marianum insigne circumtulisse: ut, quanquam filii tesserâ signoque destitutus, per matris tamen symbolum immunis defensûsque servaretur. Quo uno argumento, si ullo antehac alio, comprobatur

batur

batum id esse videtis, quod olim ac sæpè quidem à majoribus nostris audieramus, & in hoc demum Adolescente nostris propè oculis intueri cœpimus, posse capite vitæque periclitari multos, jactari quoque & fluctuare non paucos, sed interire mergique nullos, quos patrocínio suo Virgo tuendos fovendosque suscepisset. Ut vos ego proinde, qui præsidem hanc præstitemque vobis sapienter optastis, benè jubeam de salute non immeritò sperare. Nam (liceat hîc mihi cum bonâ Numinis veniâ liberius quiddam gloriâri) sive Patris irati fulmina desuper incidant, sive Filii offensi tela capiti ingruant, sive Cælestes unâ omnes adversi iustique minari insistant; si boni clientes alumnique vos estis, adversus hos omnes securum impetrabile, in hac magnæ Virginis, magnæ Matris, magnæ patronæ, tutelâ vobis invenistis.

DELICIA RVM

LIBER TERTIVS.

I.

P A T R I Æ cælestis voluptates.

Ex Isaiâ cap. 64. v. 4. & 5. Paulo I. Corinth. cap. 2. v. 9.



QVI Christum ab inferis , vi
virtuteque expugnatis , re-
ducem , hodiernâ luce de
mortis imperio triumphare
conspiciamus , Sôdâles , multas habemus
gravesque caussas , cur è luctu pristino ad
amissa pridem pæneque desperata gaudia
revertamur. Quarum ego caussarum dum
unicam haud prolixè recenseo , quæso
vos , obtestorque , eam hîc unam ita nunc
audire sustineatis , ut reliquas tamen vo-
biscum ipsi tacitè , me etiam nihil sugge-
rente , cogitetis.

2 MAIORES nostri , cùm olim de victis
hostibus triumphos agerent , consueve-
runt urbium ferè regnorumque imagines
præferre,

præferre, è quibus amplitudinem eorum pulchritudinemque cives conjicerent, opumque bello partarum magnitudinem in picturæ compendio mirarentur. Sed eo nimirum persæpe fiebat, ut vastissimæ quæque provinciæ, regnaque immensa, brevibus tabellis inclusa, se ipsa vix agnoscerent, deque spatii angustiis & penicilli injuriis haud immeritò quereretur. Talem hodieque & nos urbis cujusdam expugnatae tabellam videmus, qui in redivivi Servatoris triumpho, formam immortalitatis, vitæque cælestis imaginem, etsi nondum suis planè coloribus illustratam, lineamentis tamen quibusdam velut adumbratam, conspiciamus. Diu mortalibus illa se regia negarat, magnis sæpe machinis, admotoque ariete verberata, vim omnem contumax retuderat, ingenium eluserat, conatum fatigarat : nunc tandem felici strategemate in potestatem venit, & quò vix animos antehac licuerat adjicere, illuc jam oculos attollere, manusque injicere, illic & pedem sistere, & sedem figere palam universi jubemur.

3 O diem proinde mortalibus memoriâ cultuque perenni venerandum ! diem diebus omnibus omnibusque annis anteferendum!

ferendum ! sine quo fuisset, capti vinctiq; consenescere in tenebris, & pressi servitute miserrimâ, longum mœrere, pallere, squallere cogeremur: at nunc in libertatem gratuitò asserti, ad amplissimas regni fortunas, mirabili felicitate simul omnes invitamur. Quod equidem regnum, si, quale quantumque est, coràm adspicere, cunctamque ejus amœnitatẽ oculis subjicere concederetur; profectò intelligeremus, in quantæ beatitatis possessionem jam essemus restituti. Ceterum quando nondum hoc, in præsentia quidem, valemus; id certè, quod adhuc absentes è longinquo possumus, interea tentare aggrediamur, ut regni hujus, quod memorabili victoriâ partum accepimus, simulachrum elegans tantisper contemplemur.

4 NAM in eo primùm omnium, vivis coloribus, sed velut in nebulâ quadam, expressam intuebimur cladẽ stragemque, cum extremo hostium excidio factam; & alibi mortem exarmatam, fractis abjectisque fascibus jacere; alibi Stygem superatam procumbere, irritasque Orci molitiones omnes labare; alibi jugulatam Orbis superbiam expirare, & longè lateque hostile agmen, aut ruere, aut fugere.

Superi

Superi boni! in quantulâ picturâ quantarum rerum molem videmus? Atque hæc tamen nondum ejus regni sunt propria, quod restitutum nobis esse gloriamur; sed sunt hostilis imperii, quod extinctū eversum excisumque gratulamur, quædam duntaxat monimenta & trophea. Vultis porro (& omnes haud dubiè vultis) quale etiam quantumque regnum non diruerit nobis hic dies, sed stabilierit ac fundarit, cognôsse? Oculos mecum in hanc tabulæ partem, quam peritus olim Timantes de regni archetypo ingeniosissimè lucubra- vit, convertite.

Et eapropter, ageſis, inclyte Vatum Isaia, priorque, cedò, tu tuam, tuque alteram tuam Paulle, aut unam imo potius uterque exhibete tabulam, quâ regiam nobis illam regnumque, eruentâ Dei victoriâ comparatum, olim depinxistis; date copiam inspiciundi, tabulæque vos vestræ, quæ aut muta, aut minùs per se diserta est, interpretes boni accedite.

Nam meministis adhuc, & adhuc memorare potestis.

Agite, inquam, & nobis, benevoli, quæ aded sint illa, & quàm gloriosa, quæ de hac Dei civitate jam antiquitus à vobis

prædicantur, explicate. Illâne vos curis mortalibus studiisq̃ue digna censeatis? dignâne oculis nostris? digna, quæ nos homines præ humanis opibus adamemus? digna, quæ etiâ curiosè nobis ambitioſeq̃ue expectemus? Avidi dudum, ecquid reſponſuri vos ſitis, præſtolamur. Etenim, ſi quid humile plebejumq̃ue afferetis; verëbimur, ne multi irritos fuiſſe ſudores ſuos vociferentur, quos plurimos, ob rem non maximam, parvo cum operæ pretio exantlarint. Quanquam nihil eſt cur iſtud vereamur: reſpondiſtis enim vòs ad hæc interrogata jam palàm, regni illius eſſe bona memoraviſtis, quæ nullus olim nec oculus viderit, nec auris audierit; quorumq̃ue ſimilitudo in cor hominis nulla unquam aſcenderit.

6 Nos verò libentes accipimus veſtram hanc, ô beati, deſcriptionem, quàm verbis tenuem, tam reiſpâ uberem & copioſam: in quâ, tanquam parvâ rei maximæ tabellâ, plus affectuum inſit, quàm apparet colorum. Et quantam vobis, Sodales, voluptatis materiam hi duo pictores, in quàm brevi anguſtaq̃ue imagine incluſam objecerunt? Examine oculos uni-verſi, conſulte aures, ſcrutamini mentes: quicquid

quicquid istæ vel elegans & pulchrum usquam viderunt, vel suave gratumque audierunt, vel admirabile fortunatumque cogitarunt; id omne, quantumcunque est, ad regni nostri delicias divitiisque nondum attollitur, ac ne comparatur quidem; sed inter carceris hujus & exilii, vel solatia quædam, vel remedia numeratur. Quare, si propè sunt innumerabilia hæc sensuum oblectamenta, quibus vita (quid nisi calamitatum ærumnarumque sedes ac patria!) ceteroquin haud parcè fascinator: quam, Christe sancte, quantamque felicitatem arbitrabimur, in illo Cælitum perenni domicilio nobis reservari?

7 **M**ULTA ubivis gentium ac terrarum visuntur illustria oculorum sensuumque irritamenta; multa magnaque nativæ pulchritudinis miracula; quis nescit? Alibi spectantur nemorum amœnissima viridaria, & hortulorum gemmantium prata, in quibus passim aut rosarum ardentium purpura, aut violæ vernantis gratia, aut uvæ viventis vindemia commendatur. Alibi pubescentium florum areolæ, aut nives liliorum, æstimantur. Hic auri gratissimi pallores blandiuntur: ibi argenti divites venæ fodinæque adulantur. Jam & unio-

num candentium pondera, & gemmarum
 lucentium pretia, & siderum ipsorū amœ-
 na lumina, quid vobis aliud videntur,
 quàm uberrimæ venustatis voluptatibusque
 argumenta? Et hæc tamen omnia, qualia-
 cunque tandem sint, oculis mortalibus
 persæpe usurpantur, quotidie sensibus ob-
 jiciuntur, à miseris improbisque passim lu-
 strantur, habentur, possidentur. At ejus ur-
 bis, quâ de nunc agimus, ornamenta, oculi
 mortales nondum ulli metiuntur; nullius,
 quamvis perspicax acies, ad ea dispicienda
 penetrat: ut proinde aliquid ibi nescio
 quid eximiè elegans & venustum, præut
 hæ nostræ sunt illecebræ, delitescat.

8 QVAPROPTER agite, felices oculi,
 aciemque vestram in hoc æternitatis spe-
 ctaculum reservate: hunc rerum intereun-
 tium, non nitorem, uti vos putatis, sed
 verum merumque squalorē ac pædorem,
 generosi contemnite: neque fugientibus
 umbris, soles æternos posthabete. Ibi flo-
 rum omnium colores, digni quos ameris:
 ibi pratorum gemmantium amœnitates,
 & amplium crepidines quas optetis: ibi
 vallium umbrosa, ibi collium aprica, ibi
 nemorum opaca, ubi quiescatis: ibi ada-
 mantes & pyropi, quorū pretia æstimetis:
 ibi

ibi palatiorum series, & turrium moles,
 quas suspiciatis. Quid multis? ibi rerum
 pulcherrimarum ideæ, quibus nullò tædio
 dejecti perpetuū inhiæris. O loci condi-
 tionem planè beatam! ô fortunatos patriæ
 talis non modò cives, quibus ibi jam vi-
 vere quiescereque contingit; sed & viato-
 res, quibus illuc tendere, & olim longo
 post intervallo pervenire continget! Li-
 ceat mihi jam nunc oculis illorum hanc
 felicitatem gratulari, unaque cum ipsis ad
 has eorum delicias assurgere, atque alios,
 ut mecum eodem strenuè enitantur, ad-
 hortari. Liceat è contrario & illorum mihi
 cæcitatem miserari, qui tristibus edictis
 proscripti, dum lacrimis perennibus suas
 ærumnas deplorant, nunquam porrò ad
 hanc oculorum felicitatem adspirare per-
 mittuntur. Habent illi, Sodales, habent
 profectò, quod luminibus suis irati infe-
 sti que jam exprobrent; quòd, cum in terris
 adhuc nostris degerent, moræ parvæ im-
 patientes, præcipere intempestiva gaudia,
 & brevibus illecebris oculos pascere ma-
 luerunt, quàm eos ad hæc regni patriæque
 oblectamenta reservare.

9 VERVM enimverò ut hæc admiranda
 loci regni que felicitas; oculis ante hunc

diem nullis fuerit usurpata ; certè tamen an per alios sensus explorata fuerit, posset dubitari ; nisi iisdem testibus controversia finiretur , qui tantam ejus suavitatem nobis memorarunt , quantam aures hominum nullæ unquam fuerint expertæ. Jam proinde, finge hîc aliquis, modulatas aviû voces audire te, eæ omnes ad illam suavitatem continuò sordebunt. Puta , nervos chordasque testudinum sonare ; plorabunt. Cogita, liquidi gutturi artisque musicam promitti, adeoque illam,

*Quâ vel Threjicius Poëta motis
Feminas rapuit tigresque filias ;
Vel quâ Strimonias ligavit undas,
Et verti refugum coëgit Hebrum ;
Vel quâ marmora, Caucaſique tractas
Secum jussit obambulare rupes :*

Huic qualicumque musicæ simul alteram illam tu opposueris, ocyus & Bisthoniæ testudinem cessare, & Lesbiam citharam facessere, & pertæsus tacere Amphionis lyram jubebis. Quæ quidem ego si promptius alicui viderer quàm certiùs affirmare, gravissimæ rei testes alios hîc aliosque excitarem : quos tamen, quando in aliud tempus mihi opportunius reservo, tantisper hîc quieturos meâ fide vos arbitrabor.

IO SED erunt hîc vestrûm aliqui, qui ægrè laturi non sint, si has Cælitum voluptates, iis quidem gaudiis antecellere omnibus contendero, quæ sive oculorum auriumque officio, sive sensuum nostrorum ministerio comparantur: ceterum, ut nihil à nobis, ne animo quidem prælibari hîc præcipique possit, quod illam felicitatis ubertatem repræsentet; in eo fortassis non æquè faciles assentientur. At istis præclusa jam oraculo nostro, ne hac elabantur, est fuga. Quid enim disertius effari oraculum potuisset, cum regni illius beatitatem negavit in cor hominis ullius ascendisse? Nōne hoc nobis dicere visum est; Mentis aciem, quantam potestis, intendite, animumque indefessi ad illas delicias metiendas exercete; nunquam tamen, quoad vivitis, cō vos evadetis, ut ad ejus gaudii magnitudinem cogitando sitis perventuri. Et quantum est tamen id gaudium, quod animo subinde cogitationeque versamus? Quas Hesperii nemoris delicias, quas Pæstantæ amœnitatis illecebras, quæ hortorum spectacula, quæ regum palatia non cogitatis? Occurrunt animo theatra veterum, & ludicra scenarum, & pompa triumphantium. Veniunt in men-

diem nullis fuerit usurpata ; certè tamen an per alios sensus explorata fuerit, posset dubitari ; nisi iisdem testibus controversia finiretur , qui tantam ejus suavitatem nobis memorarunt , quantam aures hominum nullæ unquam fuerint expertæ. Jam proinde, finge hîc aliquis, modulatas aviû voces audire te, eæ omnes ad illam suavitatem continuò sordebunt. Puta , nervos chordasque testudinum sonare ; plorabunt. Cogita, liquidi gutturis artisque musicam promitti, adeoque illam,

*Quâ vel Threjicius Poëta motis
 Ranimas cepit tigresque silvas ;
 Vel quâ Strimonias ligavit undas,
 Et verti refugum coëgit Hebrum ;
 Vel quâ marmora, Caucasique tractas
 Secum jussit obambulare rupes :*

Huic qualicumque musicæ simul alteram illam tu opposueris, ocyûs & Bisthoniâ testudinem cessare, & Lesbiam citharam facessere, & pertæsus tacere Amphionis lyram jubebis. Quæ quidem ego si promptius alicui viderer quàm certiùs affirmare, gravissimæ rei testes alios hîc aliosque excitarem : quos tamen, quando in aliud tempus mihi opportunius reservo, tantisper hîc quieturos meâ fide vos arbitrabor.

IO SED erunt hîc vestrûm aliqui, quî ægrè laturi non sint, si has Cælitum voluptates, iis quidem gaudiis antecellere omnibus contendero, quæ sive oculorum auriumque officio, sive sensuum nostrorum ministerio comparantur: ceterum, ut nihil à nobis, ne animo quidem prælibari hîc præcipique possit, quod illam felicitatis ubertatem repræsentet; in eo fortassis non æquè faciles assentientur. At istis præclusa jam oraculo nostro, ne hac elabantur, est fuga. Quid enim disertius effari oraculum potuisset, cum regni illius beatitatem negavit in cor hominis ullius ascendisse? Nónne hoc nobis dicere visum est; Mentis aciem, quantam potestis, intendite, animumque indefessi ad illas delicias metiendas exercete; nunquam tamen, quoad vivitis, cò vos evadetis, ut ad ejus gaudii magnitudinem cogitando sitis perventuri. Et quantum est tamen id gaudium, quod animo subinde cogitationeque versamus? Quas Hesperii nemoris delicias, quas Pæstanae amœnitatis illecebras, quæ hortorum spectacula, quæ regum palatia non cogitatis? Occurrunt animo theatra veterum, & ludicra scenarum, & pompa triumphantium, Veniunt in men-

tem naturæ miracula , venit artificum solertia , veniunt opum ingentium cimelia. Quæ ipsa quidem, ac mille talia, ut animo subjiciatis, fabularum commenta procuditis, omnes ingenii sinus excutitis, magnisque centonibus velum sarcitis, in quo falsæ felicitatis imaginem expingatis. Et eo tandem labore quid universi proficitis? nempe in unâ cæli regiâ plus voluptatum intelligitis esse reservatum, quàm aut sensu possitis deprehendere , aut animo excogitare.

II QVÆ si ita sunt, Sodales , ut re verâ sunt, felices certè nos erimus, si partas nobis has regni opes constanter appetimus; fatui, si non agnoscimus; miseri, si etiam vili pendimus. Nam quantâ eas contentione multi veterum Heroum expetiere? quàm anxie requirere, quàm prodigè licitari mercarique studuerunt? Consulite testes, non jam eos, qui aut falli emendo, aut fallere alios ementiendo potuerunt: percontamini, quantum ei regno pretium statuisse se fateantur. Multos illicò reperies, qui cum uberrimis lacrimis, cum diuturnis vigiliis, cum assiduis vitæ ærūnis, illud libenter avideque permutarint: multos, qui amplissima patrimonia contemptim

temptim abjecerint, censu Principum
fundosque exhauserint; regnis hilares im-
periisque se abdicarint: multos, qui spes
resque omnes dimiserint, qui gratias, qui
glorias mortales contempserint, ut in pos-
sessionem ejus felicitatis vocarentur. Et
quorsum alioqui tam multi circumiissent
in melotis, in pellibus caprinis, egentes, angu-
stiati, afflicti, in solitudinibus errantes, in mon-
tibus, & speluncis, & in cavernis terra; si
dignum illud regnum non judicarunt,
quod unum omnibus exiliis, periculis,
ærumnisque emeretur?

12 Quid? quod innumerabiles alii, cum
auro illud atque opibus emere despera-
rent, vitam, sanguinem, animamque in id
liberaliter contulerunt? Agite enim verò
testes purpurati, clarissimi heroës, fortissi-
mi martyres; & paucis nobis, quantum
huic merci pretium dixeritis; indicatè.
Nunquid enim Bartholomæe, etiam tu
tibi illam comparasti? Ego verò illam pelle
mihi totâ, per lacerati laniati que corporis
artus abstractâ; &, si mille adhuc mihi cor-
pora supersint, mille corporum exuvias ta-
les impiger impendam. Alius, Ego lentis,
inquit, ignibus amburi, ego candentibus
prunis torrerì, ego in ahenâ sartagine cu-

pii affari, dum de pretio quisque pacifceremur. Alii prompti, quicquid posceretur, exsolvere. Hic caput & cervices præbuit, hic ferro cædendos poplites dedit: iste, cum linguam mercator dentesque exegisset, etiam jugulum impendit: ille hianti vulnere per patulum pectus animam efflavit, alius præcipitio elusus crepuit, alius laqueo peremptus, viam in iis etiam angustis invenit; alius in crucem iit, alius in æquor & undas defiliit; alii aliâ clade vitam animamque profudere, & venali sanguine cælum emere. Et requiritis vos, quid etiamnum sentiamus? Nostrum adhuc neminem pœnituit emisse.

13 DICTURI hæc utique sunt testes mei, si citati in medium producantur. Nos interea, ne quondam ab iis ignaviæ dedecorisque arguamur, si, quod illi tanto sibi censuerunt comparandum, nos unâ lacrimulâ, brevi que suspirio dignum non æstimemus; hodie saltem, quod semper factum oportuerat, incipiamus alacres & regni hujus pretium amare, & regnum ipsum, quando tam liberaliter donatur, grati ac memores, omnibus aliorum donis anteferre.

I I.

S.FRANCISCVS cælesti fidicine sese
oblectat.

*Ex S. Bonaventurâ in Vitâ S. Francisci c. 5. &
inde Laurentius Surius tom. 5.
ad 4. Octob.*

14 **S**OLENT hominum plerique omnes,
Squi sagaciori ingenio, acriq̃ue judi-
cio habentur, ex modico vestigio totam
rei cujusque magnitudinem haud ægrè
conjicere. Quâ quidem solertiâ & Pytha-
goras ex modo spatîoque plantæ, justam
Herculis proceritatem; & alius nonnemo
ex pollicis mensurâ, vastitatem Cyclo-
pis; ac denique, nescio quis, totum ex ungue
leonem dexterè indagarunt. Sunt sua quæ-
dam etiam cælo vestigia, quorum indício
sapientes quondam, non sanè ad compre-
hendendam, certè autem ad æstimandam
mirandamq̃ue Cælitum voluptatem, feli-
cissimè penetrarunt.

15 **I**N horum acie, Sodales, primum (nisi
animi fallor) visus est pilum ducere FRAN-
CISCVS; vir, quod ipsi meministis, cælo

cum primis jam clarus; magnum, non Umbriæ solùm, sed Europæ Ecclesiæque ornamentum. Hunc olim accepimus, affecto corpore, & malè à morbis Medicisque habito, graviter ægrum in paupere cubiculo jacuisse. Ubi quamquam omnium egens, præter straguli centonem, rudemque tabulam (hæc namque mollis culcitæ, ac ferici pulvini vicem ei fuerant) subsidii solatiique nil haberet, animo tamen omnibus & morbi injuriis, & penuriæ incommodis stetisse superiorem. Quæ enim corpori calamitas tam infesta posset accidere, quæ in FRANCISCO vim animi roburque eneraret? Sed ipse tamen, etiam talis, humanum esse credidit, ut si quid dolori paullulum leniendo sese offerret, non id omne ex disciplinâ Stoicâ repudiaret.

16 Igitur dum in humili grabato FRANCISCUS ægrum corpus aliquandiu volvit & versat, nullâque in parte dolorem neque mora nec medicina mitigat; videt socium, ex iis, qui plures tum aderant, unum; cui ipse *Pacifico* nomen (nec indoles moresque abludebant,) volens indiderat. Hunc æger vultu amabili, per familiariter juxtâ ac suaviter obsecrat, artem sibi suam operamque tantisper ut accommodet,

modet, dum victa doloris infania aliquantulum remittat. Ceterum ars erat ea, quam quondam is adolescens domi suæ fidibus canere, non illepidè, nec inveniustè consueverat. Quis hîc FRANCISCI preces, tam honestâ in re, faciliè laturas repulsam vereatur? Quis *Pacificum* ultrò, vel hominis causâ, ad chelyn suam artemque properaturum, non putet? Debit enim hanc operam FRANCISCO, debuit ægro; sed ipse utrique inexorabilis, ne obsecranti quidem commodavit. Ita, quod ægri nutu debuerat impetrari, etiam precibus est negatum. Nam insolentiâ voti perturbatus, ut ei morem ne gereret, ita secum *Pacificus* disputabat: Quid cogitaturos alios, si vel *Pacificum* audirent in chely ludere, quam ipse pridem ut profanam ejurasset? vel canenti ludentiq̃ue attendere viderent FRANCISCUM, qui ludos ejusmodi extreme odisse omnes putaretur? Rem utique nec præsentibus ad spectaculum gratam, neque posteris ad exemplum profuturam. Premeret igitur inconsultæ voluptatis cupidinem FRANCISCUS, remque intempestivam volens libensque omitteret; quæ etiam concessa, nihil admodum adversus dolores esset remedii allatura.

17 Hic ego quid adeò dicam, Sodales, vix invenio : nisi, quòd putem, plerosque nostrum, si perinde ægros spes rei tam cupitæ fefellisset, fidem hominum Cælitumque fuisse imploratu-
 ros, & operam inhumanè denegatam, sociis exprobratu-
 ros. Nempe, senio nos tædioque etiam familiaribus atque amicis esse, nec ulla humanitatis officia vivere, plorabundi quereremur. Fuisse quondam tempora, cum validi sua agris obsequia certatim & ultrò ingererent : quæ modò ne flagitantibus quidem exhiberentur. Denique, ô tempora, ô mores, cum temporum morumque convitio, clamitaremus. Hæc, inquam, aut horum similia, si nobis fortassè per probrum dedecusque exciderent, quantum, Deus bone ! à FRANCISCI modestiâ patientiâque discederemus ? Iste enim cum æger hanc insperatò, quam diximus, repulsam tulisset; nihilo magis, quàm si voti potitus, omnia impetrasset, cuiquam homini succensuit : interpretatus rectè ordineque fecisse, qui, quam operam inconsultò postulasset, eam sibi præstare, vel rogati, detrectassent. O vocem FRANCISCO (à quo nihil nisi magnum expectabatur) dignam ! vocem, patientiæ singularis,
 man-

mansuetæque indolis testem ! vocem, cui etiam recusanti, testudines ultrò chelesq; omnes suam operam gratificentur !

18 CETERVM quas ægri preces aspernata est tellus, non perinde etiam sidera contempserunt: quæ adjecto plerumque fœnore, quicquid à mortalibus prætermisum est, compensant. Et agnoscite, quæso, quàm fœnus id liberale, & quantò melius ipsâ etiam sorte fuerit. Nam ei vix etiamdum chelyn suam *Pacificus*, velut aut desidem jam, aut omnino desitam, negarat; cùm, ecce tibi ! effusi cælo fidicines (sed ô quantò nostris ii Cantoribus meliores !) turmatim irruere, certare studiis, & ægroti lectulum ambire; ut, quam homo homini voluptatem conciliare rogatus noluerat, eam Cælites uberius compensarent. Cælites, inquam. An enim dubitatis, quin etiam isti vel ita comes fuerint & officiosi, ut vellent; vel ita solertes & periti, ut aliquam FRANCISCO muscam, humanæ æmulam, excitare possent ? Meminimus in fabulis legere nos, tam liberale scitumque ingenium ipsis etiam cicadis fuisse, ut, cùm quendam *Eunomum*, in scenâ fortè canentem, rupta testudinis chorda inopportunè destituisset; earum una promptior officio-

officiosiorque, occupavit è vicino arbusco
 provolare, superque testudinem insidens,
 modulato stridore, tinnitum, quem defe-
 cta ruptaque chorda debuerat; argute
 scienterque assimulare. Vicit hanc Eunomi
 fabulam historia FRANCISCI; cessitque li-
 bens ingenium cicadæ, officiosæ huic Cæ-
 litum musicæ.

19 QVAM autem qualemque nos hanc
 fuisse musicam dicemus? Etenim si fidici-
 nes illi Cælestes omnem suam, quâ pol-
 lent, artem exserere, nervosque universos
 intendere tunc seridè voluissent; equidem
 confiterer, nec aures animosque FRAN-
 CISCO suffecturos fuisse: nec ingenium
 mihi suppetere nunc posse, ad minimam
 ejus voluptatis partem comprehendendam.
 Quandoquidem verò non omnem è cælo
 musicam evocarunt, & nihil ibi carminis
 illius, quo Numini ter sancto suavissimè
 applauditur, neque Virginum illud Epini-
 cium, quo laureatæ pompam Agni prose-
 quuntur, delibarent; sed vix minusculam
 obviamque chelyn amplexi, lectulum cir-
 cumsteterunt; ductoque per citharam
 plectro, ter quaterque canorum insonuere:
 ita quidem, ut cæli delicias nondum totis
 amphoris affundere, sed in heminæ unius
 promul-

promulside, gustum suavitatis suæ præbere viderentur: quando hac, inquam, moderatione suam illi musicam temperarunt, erit fortassis, ut in eâ auscultandâ, sensibus constare potuerit FRANCISCUS; nobisque, vel in parte quid audierit, narrare.

20 VERVM irriti nos, de nihilo hanc nobis spem concipimus. Jam enim, ut commodum hi Symphoniaci, per cubiculum diffusi, primo se marmure susurroque prodidere, cœperuntque veluti prolusuri,

Illinc tendere barbiton, leviq̃ue

Septenas digito movere chordas,

Illinc pectine tinnulo sonoros

Per testudinis ambulare nervos;

enimverò tum animus, sui nostrique immemor, exsilire, & corpus ægritudinis dolorisque oblitum, ubi esset, quid laboraret, quæ pateretur, ignorare; & FRANCISCUS felicitatis suæ nec initia capere, nec finem videre, nec modum habere; sed insperatâ carminis illecebrâ raptus, non sui se tugurii hospitem credere, sed cæli jam inquilinum civemque arbitrari. Quare neque nos ad eòduri crudelesque erimus, ut FRANCISCVM ab hoc cæli confinio ad nos odiosè retrahamus, & symphonix intentum, ad ravim nostram ac stridorem

atten-

attendere jubeamus. Quin potius nos ipsi ad auscultandos hos ejus choraulas accingimur, & quod è propinquo possumus, aliquid hujus suavissimi concentûs, nostris etiam auribus captamus.

21 SED neque hîc, Sodales, quod cupimus, evenire ex animi sententiâ videmus. Ecce enim, dum segnes hîc molimur, & æquo diutius cessamus, ipsi quoq; FRANCISCO sua se musica, cùm vix etiam cœpisset, insperatò subduxit: animusque & sensus, ab illis aurium deliciis (ah quantillo temporis momento gustatis!) ad sese non sine gemitu revertit. Quare, ut æger in lectulo cubantem se, & circumcircâ adstantem familiam respexit; mutoque silentio parietes mœrere, & nullas jam neque fides neque fidicines audiri persensit; erupit in vocem ipse; &, Miserum me! inquit; quis cælum in hunc mihi tugurii squallorem, Cælitesque in hominum ora, ipsamque amœnitatem in hanc repente solitudinem convertit? Quò mea se omnis suavitas? quò aurium animique voluptas migravit? Utinam ea vel paullò mihi diuturnior contigisset! utinam vel pauxillo! Quid enim? Nunc hiantem, ecce, præceps in ipsis experimentis defecit. O aures mortalium

talium infelices, quibus aut alia possunt carmina placere, aut hæc talia possunt displicere! Eunomi vos, siqui fuistis, omnes abite; tacete Orphei, filete Ariones, Amphiones valete; Unum hoc auribus votum est, eos cantores audire, qui vestram me Musicam doceant fastidire.

22 NON imus inficias, Sodales, quin magna nobis hæc planeque mira debeant videri, quæ de cæli sui deliciis FRANCISCVS hîc quasi cursim indicavit. Sed nondum tamen illuc ejus pervenit oratio, quod postremò debuit. Quare reliquum est, ut de toto voluptatis torrente, quò quondam irrigabimur, quid judicii sui sit, prolixius paullo declaret. Quanquam, quid ejus etiam vocem desideramus, cujus vita pridem moresque de totâ lite sententiam luculentè pronuntiarunt? Nam, quid eum, si loqui adeò vellet, dicturum hîc rursus aliud putamus: quàm, sese ex paucis parvisque lineamentis, ingentem corporis totius staturamprehendisse? &c., in unâ nectaris stillâ, labris primoribus exceptâ, facile præcepisse, quantam voluptatem experirentur illi, qui totos jam imbres torrentesque, pleno sinu exceptos, assidue perpotarent? Quod si breves hæc atque ex-tempo-

temporales cæli prolusiones, tanta possint rerum fluxarum in animis nostris fastidia procreare, ut sordere præ illis ac fœtere cetera videantur: profectò spem æternarum voluptatum debere apud unumquemque nostrum, omnem vitæ sensusque mortalis cupidinem extirpare.

23 **ATQVE** id ita profectò est, Sodales: semel hanc Cælitum concentionem audisse, est profana & humana simul omnia contempsisse. Etenim si brevis ejus usura **FRANCISCVM** ita pòtuit afficere, ut in alium orbem illatus, immensis quibusdam gaudiis interesse sibi videretur; quid futurum eo fuisse credimus, si horam integram illa suavitas tenuisset? si diem solidum illi citharœdi; si mensem, si annum denique, aut ætatem aliudere ii artifices perrexissent? **An non continuò FRANCISCVS**, multoque validius, exclamaret! Infilite morbi, ruite ægritudines, urite febres, sævite, ferite, carpите dolores: mei acroamatis gustulum cepisse, erit medicinam adversus omnes vestras injurias reperisse.

I I I .

A S C E T E S in aviculæ cantu con-
fenescit.

Ex Speculo veteri exemplorum, dist. 9.

cap. 61.

24 **S**I de immortalium gaudiorum uber-
tate suavitateque, sententiæ hîc in-
ter nos rogentur; nemo omnium erit, So-
dâles, quin sibi meritò eam in primis ma-
gnam, ac propemodum immensam, cen-
seat videri. Ceterùm, erit alibi fortasse,
quî non æquè dispicere se dicat, quo tan-
dem futurum pacto sit, ut suavitatis hujus,
quamvis immensæ, tamen perpetuæ, diu-
rurnitas nunquam in satietatem vertat;
neque loci, musica, totam æternitatem
duratura, ad sui tædium postremò indu-
cat. Nam & mella æquo sæpiùs gustata,
denique nauseamus; & rerum etiam cha-
rissimarum aliqua satietas est. Sed nolite,
Sodales, ut alia omnia timeatis, hac unâ in
re nolite periculum timere. Non possunt
nectar & ambrosia sumentibus fastidium
generare; mihi credite, non possunt. Cui
rei

rei confirmandæ testem vobis oculatum, probaëque fidei Asceten excitabo.

25 AUDIERAT iste, etiamdum adolescentior, legeratque, mirificam esse eorum vitam, planeque voluptariam, quos hîc emeritos, virtus, beneque facta cælo transcripssissent. Nam eos, quamvis inter affluentes delicias ævum æternitatemque exigerent, de nullâ tamen temporis longinquitate torqueri; sed gaudiis perfusos, totas annorum chiliadas, vix unius dieculæ moram arbitrari. Quæ quidē res, quàm erat creditu digna (quid enim testantibus oraculis non crederetur?) tam illi visa est captu cognituque ardua. Igitur homo sollicitus, quî rationem intelligendæ rei qualemcumque indagaret; cū diu nihil admodum profecisset, habuit denique propitium præsensque Numen; ut incogitans planè insciensque, in arcanæ rei cognitionem suavissimè traheretur. Quod quēmadmodum acciderit, nihil me pigebit memorare.

26 FORTE enim ut hisce curis impensius animum permiserat, sub auroræ diluculum, in suburbano vireto obambulans, audit, vocis teneræ liquidæque musicam personare; ea, quòd peregrinâ suavitate condie-

condiebatur, perpulit hominem, ut sublati oculis, delicati carminis auctorem requireret. Quærit. Videt nominis ignoti, parviq̃ue corporis, volucrem, haud procul in arbusculæ ramo confidentem. Et attornito similis, admiratur, unâ, eâq̃ue non magnâ aviculâ, omnes & cygni questus, & acanthidis cantus, & lusciniæ lusus superari: ibiq̃ue quicquid in citharâ tinnulum, aut testudine querulum, aut in barbitono sonorum est, simul omne audiri. Quid ageret, captus hac soni vocisq̃ue dulcedine Ascetes? Nimirum aliò, vî sibi allatâ, animum diverteret? aut aures (quod in Sirenum insidiis facimus) cerâ liquente cautus præstrueret? aut volucrem innoxiam terculis è loco abigeret? Apage hinc istud, inquit, homo nihili, tam iners consilium; ac potius, quâ mentem ego propius advertere, totusq̃ue fieri auris hîc possim, edoce; quò integrè pleneq̃ue ab hujus aviculæ cantu suspendar.

27 ITA dum obfirmato æquè animo ac vultu, in cantatriculam intentus, & sui juxtâ ac suorum oblitus, auscultat; cœpit paullatim volucris ad vicini nemoris umbram avolare, suoq̃ue simul & lento volatu, & melleo cantu, imprudentem Asce-

ten ad usque avia & invia silvarum, longius abducere; quàm unde retrahi ad suos homo commodè posset. Atque ibi, cum in arbore procerâ, velut pergulâ quadam, aut pulpiti scenâ, consedisset; perrexit auditori suo, quas semel inceperat, usque & usque delicias facere. Homo interim in miraculum usque durare, hiare, stupere. Manet interim arbiter immotus; neque pedes lassitudine diurnâ franguntur, nec aures obtunduntur, nec oculi hebetantur. Corporis totius votum est, ut auris fiat. In hoc acroamate auscultando, abeunt juveni horæ, nec sentit; labuntur dies, & nescit; fugiunt menses, redeuntque, & adhuc subsistit. Nec imbres eum statu dejiciunt: nec hiemes loco pellunt. Insuper non sitis tentat, non fames sollicitat: anni denique abeunt, nec dormit interim homo, nec nictat, sed neque etiam jentat unquam, nec cænat. Nusquam enim ulla ventrem vexat injuria, ubi hæc animum pascunt oblectantque condimenta. Quid pluribus ego vos traho? verbo rem omnem uno expedio: Stando, audiendoque, consenuit ignarus.

28 AT eo se cantu nondum Ascetes explerat, cum improvise, hiantem adhuc & appe-

appetentem, ales amabilis deferit : & prior
omnis suavitudo , jam muta in aërem au-
ramque evanescit. Inde, ut ex longo acroa-
mate Ascetes ad sese rediit, & volucrum
sibi nusquam, neque carmen & musicam
usquam esse ; sed circum omnia mæstum
in modum silere , ipsamque loci faciem
squallere undique & horrere (quod prius
non adverterat) persensit : velut somnio
confusus, institit se ipse circumspicere ; la-
crimanisque , naturæ invidiam accusare ;
quæ , quas alas ad avolandum volucris de-
derit, eas sibi, ne fugientem insequeretur,
denegasset. Certè autem vel hoc , inquit,
avicula fecisset, ut pauxillum morata, mo-
dulos inceptos aliquo prius épiphonema-
te clauderet , quàm præproprio silentio
imperfectoque exanimasset. Equidem ne
ipse quoque voti tam immodicus fuisset,
ut solidum mihi diem poscerem. Breviori
beneficio contentus , horulæ moram ex-
optassem. At illa vix cœpit delicatula, &
abrupit : nec delectare auditorem voluit,
sed irritare. Et quantulum tamen fuisset, si
unius etiam horæ morulam donasset, nunc
vel dimidiam , avara, invidit : & in primo
periculo defessa , citius propè obmutuit,
quàm canere incepit.

29 HÆC, atque hoc genus plura ne-
quicquam lamentatus, ubi volucrem sen-
sit è fugâ reduci nullis ne precibus qui-
dem suis posse; decrevit illuc, unde pedem
insciens extulerat, reverti. Sed simul atque
è silvâ, quò pedetentim pervenerat, in
viam rediit, nova rerum locorumque fa-
cies objecta, hominem mirificè affecit.
Videt quaquà versus hîc turrium edita-
rum fastigia; hîc urbis novæ portas &
mænia. Atque ubi solum prius incultum,
& vepribus horrentia tesqua meminerat;
jam sublimia tecta, domosque eminere, ibi
templa & palatia surgerẽ, ibi omnia cultu,
incolis, studiis fervere, miratur. Utique fe-
licem esse architectum debuisse, qui tot
opera molitione tam celeri construxerit:
aut fertilem terram, quæ unico nixu tot
repentè partus effuderit: aut denique se
extra Solis Lunæque metas evagatũ esse,
ubi jam in peregrino cælo nihil sui agno-
scat. Inter hæc, quaquà mirabundus ince-
dit, obviàm habet mortales omnis generis
multos, nec nomine quemquam, nec oris
habitu, nec cetero vestitu jam notos. Do-
micihum ipsum, unde se recessisse paullò
antè censuerat, veteri adhuc loco situm,
cetera præter solum omnia mutarat.

30 EA res tam improvīsa, quanquam oppidò perturbat, non deterruit tamen, quin ad Asceterium vetus accedere sibi, pristinamque stationem repetere, putaret licere. Igitur ingressus, dum per nota viæ diverticula ad suum conclave curriculò festinat: ecce familiā ubique alia, alii passim inquilini, & nemo veterum sociorum. Plerique licentiam advenæ, plus quàm familiarem, admirati, primùm silentio spectare; mox, quòd hominem errore circumagi crederent, palàm, quis & cujatis sit, quasque res domi alienæ actitet, quærere. Ille vicissim, quos imò ipsi, qualesque se ferrent; quid in asceterio tot repente hospites, an hostes; sibi vellent, rogare. Inde mutuo aspectu alterni hære, & utrinque alteri in alteris stupere; cùm iste se advenam negare, civemque atque adeò templi æditimum dicere: illi rursus ignotum, exterumque aut profectò ceritum credere perseverarent. Quā ex re, mirum aliquamdiu tenuit ludibrium; dum denique compertis indiciis, veritas nubem perrupit.

31 NAM Ascetes, quòd & obrui adversariorum numero, & ni melioribus argumentis pugnaret, actum agere sese in eā

lite videbat: juratus, quid sibi, quoque modo cum aviculâ acciderit, enarrat: simul, quæ tum familia, quis familiæ Pater Præsesque fuerit, cum indidem egressus aviculæ cantum persequeretur. Ex eâ personarum nomenclatione factum proinde est, ut, si ephemerides domûs consulerent, iis inspectis aliquid erui posse videretur. Ita ad acta familiæ decurritur: atque inibi litteris jam fugientibus, longaque vetustate evanidis, scriptum Præsidis nomen, sub quo asceticen homo fecerat, invenitur. Subjecta ibidem narratio, quæ loci æditi-
mum (atque is nimirum noster hic erat) omnibus ignaris, amissum: & sive fugâ elapsum, sive morte subductum, nusquam postea apparuisse, memorabat. Quid jam porro, Sodales? etiâne fidē habere familia pertinax abnueret? Audite rem omnibus annis annalibusque memorandam. Convicti liquidis argumentis universi, dum subductis calculis rationes putant; hominem vivum ac sentientem (obstupesco referens) annos comperiunt haud minùs trecentos ab asceterio abfuisse: cum ipse interea ab alitis auditi cantu blandissimè suspensus, id omne tempus, quamquam & diuturnum, & sæpè frigore, sæpe
pluviâ

pluviâ infestum, vix pauca horæ unius momenta credidisset.

32 Hic ego jam perfacilè quemque arbitror conjectare, quis homini in re tam novâ sensus, quis in circumstantium animis motus, quis in oculis vultuque stupor exstiterit. Videor enim ipsum adhuc Asceten audire exclamantem, seseque damnantem stultitiæ. Nempe hoc hæseras, imprudens, utrùm, quod apud hominem lusciniæ vocola potuit, id oceanus voluptatum æquè etiam apud Cælites posset? Trecentos jam annos, inter inculti nemoris squallorem, contemptis nivium imbriumque injuriis, in volucris unius garritu perdius & pernox hæsisti, stetisti, consenuisti; neque etiamnum eo te cantu fatiatum confiteris? at in illo Cælitum omnium concentu, in illâ mentium æternarum symphoniâ, ubi tu pedibus solem lunamque insistes, ubi omnium amœnitatum copiis circumflues, ubi felix campos Elysios, pluviae brumæque securus, incoles; ibi triduum durare, an sine fastidio posses, metuebas? O metus verè panicos & inanes! ô jucundam ibi quantamlibet moram! ô ipsam æternitatem, ut seipsam illa conduplicet, brevem! Age mors tandem, age quod agis,

& Nestorē hunc trisecclem manu aliquando emitte. Satis superque tuus me carcer habuit: cujus sensum tædiumque ut mihi demeres, adductā cantatriculā decepisti. Deprehendimus fraudē, & abimus. Dixit: magnoque æternitatis desiderio incensus, ut historiam testimonio gravi confirmaret, mortem ibi lætus oppetiit, cujus insidias trecentis jam annis fefellerat. Ei nos quamvis invidere nunc possemus, Sodales, tanquam derelicti; gratulari tamen malimus, tanquam propediem secuturi.

I V:

E Q V E S nobilis ad epulum cæleste invitatus.

*Ex Speculo Exemplorum veterum dist. 9.
cap. 64.*

33 **T**ANTA corpori cum animo, jam inde à primis ejus natalibus, contracta est necessitudo, ut bona adversaque ducant sibi ambo, veluti lege quadam, esse communia. Nam & corporis dolores animum trahunt plerumque in partes; & vicissim, animi quoque voluptates in corpus, pactā

pactâ societate, refunduntur. Quæ quidem duorum fœdera, ut inter superos quoque perennatura esse videatis, quæso vos obtestorque, Sodales, id, quod ex veteris Scriptoris fide ingredior narrare, faciles attentique auscultate.

34 INTER provinciales, viros nobiles, duo quidam erant, cum loco domicilioque vicini; tum, sicut opibus & generis splendore, sic vitâ moribusque ex æquo insignes. Horum alter altero diu perfamiliariter usi, in magnam amicitiae amorisque consuetudinem pervenere. Atque ut erat matura utriusque gravitas suavi modestiae sociata, amœbeis conviviiis, sed honestis iis & jucundis, sese alterni, ut cuique visum est, invitabant. Ubi veri mihi sit simile, crebra illos, cum de bonis quibusque studiis, tum de cælestibus præsertim gaudiis (quorum amore tangebantur) miscere colloquia solitasse. Nondum enim hæc ævi nostri dedecora invaserant, ut cõiri amicitia inter plures posse non putaretur, nisi cænas in luxu probisque exigeremus; alii que alios lacerare convitiis, vel contemptore supercilio despicere, vel in vino & ludo patrimonium ingeniumque decoquere, cum Apicio studeremus. Quin contrà, decorum sibi

sibi etiamtum nobiles credebant, si & facere palàm gloriosa, & fabulari inter se honesta, audirentur.

35 IN hac tali duorum consuetudine, cùm nescio quid solito majus uterque moliretur, convenerat fortè, ut statò quifque die luculentum, præ ut unquam aliàs fecerant, epulum domi suæ appararent; invitatis etiam aliis, quos vellent, communibus amicis. In hanc legem ubi hilares alter alteri condixere, jamque dies condictus suberat, ille alter (heu subitos rerum temporumque casus! quàm totus homuncio nil est!) ille, inquam, alter, qui venire ad invitantem prior debuerat, fatis præpropere concessit, sui que adventus spem convivatori omnem incidit. Elato tamen tanto amico, quid alter superstes egerit, expectatis? Utrique, Sodales, erat is, ad funeris luctum, quàm ad convivii luxum, ex hoc vicini excessu, paratior; ea que propter indictas epulas, si quà licuisset, facile omisurus. Verùm in vivis adhuc ceteri supererant, quos eodem jure meminerat esse à se vocatos. Et istorum, quod par erat, respectus tenuit, ut, tametsi conviva unus, isque præcipuus, numero deesset, illi tamen reliqui, in eodem sigmate, tantò laxiùs

laxius accubitori viderentur. Pergit igitur in incepto hospes, lauteque mensas & triclinia instruit. Ceteri, ut inter omnes convenerat, in tempore & loco adsunt.

36 OCCURRITVR à patrefamilias omnibus: fit salutatio: properantur officia: deducuntur hospites: aqua in manus sumitur; ordine locoque discumbitur. Atque hic ecce tibi! adest hospes etiam ille, quem nemo tum convivarum expectarat: quippe functum nuperrime, & quod constabat, publico funere jam elatum. Et adest, ut oportuit, vultu composito ad hilaritatem, quo nihil ferale aut mortale praeferret. Quis enim in illo alioqui sigmate latus accumbere, aut dapes, quamvis opiparas, carpere sustineret, si cum Manibus ad pollicitum novendiale venisse se cerneret? Ad hæc, ipsemet celo jam tum receptus (quod, puto, mox infra cognoscetis) nihil causæ habuit, cur indecorem sibi personamsumeret, & in ore lurido tristis potius, quam cum sereno placidoque, comis appareret. Quid multis excuso? Adfuit, quem diximus, cōviva, accubuit, cænavit; fidemque, quam invitatori dederat, præsens exsolvit. Reliquum erat, ut ex pacto mutuum faceret, epulumque & ipse jam pro socio in-

stauraret. Neque in hoc etiam fefellit. Mensis enim commodum remotis, amicum veterem è turbâ seductum, jubet memorem attentumque esse, ut ad sese proximè cœnatum & ipse veniat: diemque & modum veniendi edocet: simul, abrupto colloquio, desinit videri.

37 IGNARVS adhuc alter, quò defuncti hospitis invitatio: tam nova insolensque pertineret; & arbitratus tamen fide non carituram, apparat sese diligenter, diemque edictum avidus expectat. Neque enim homo, qui cetera tam probè semper tamque (ut ego mihi persuadeo) religiosè vixerat, per eos dies commiserit, quin viaticatus antè, vasa colligere, & si mors fortassis ingrueret, rationes cum Deo ponere maturaret. Certè non aliud nos ipsi consilium capturi nobis videmur, si cœnæ dictator nos talis invitet: idque ni solliciti cum primis faciamus, parum prospicienter de æternitate consultasse videbimur. Et profectò invitamur jam nunc, Sodales, invitamur! Nisi fortasse seria Christi mandata vos esse non putatis, cum pervigiles excubare omnes, esseque procinctos jubet, ne quà vocatos teneat mora. Ubi tamen deterior & hæc nostra est conditio, quam

quàm Equitis istius fuerat; eò, quòd sius huic dies perspicuè diserteque edictus, noster autem incompertus adhuc obscurusque habeatur. Quæ ipsa tempotis incerti obscuritas, quantum acuere studia nostra curasque debeat, otiosum arbitror, cum ipsi jam videatis, admonere.

38 QUAPROPTER, ut ad institutum revertatur narratio, dum Eques hic invitatus diem, quem suus illi dictator constituerat (is aliis à Sole indigitatur; nobis à Christi Anastasi Dominicus est) spem inter merumque opperitur: ecce tibi! ad ipsas ædium fores asturconem videt, candidum illum pulchreque stratum, & phaleris bullisque conspiciuum. Quò, uti præmonitus fuerat, inscenso, celerrimè ex suorum conspectu abripitur, brevi que tempore per immensum iter, ad regiam quandam peregrini splendoris, miræque venustatis, perfertur. Quam ego regiam, quæque illa fuerit, Sodales, utinam aut veris lineamentis, aut veri saltem similibus, effingere jam possem! quid amæni vobis, pulchri que & pretiosi non monstrarem?

Tectum augustum, ingens, plus centum insigne columnis:

Nil ibi plebejum, nusquã Temesea videntur

*Æra ; sed induc̃to domus undique fulgurat
auro.*

*Sub pedē lucet onyx , plantasq̃ue veretur
ophites,*

*Effulgent camera ; variis fastigia gemmis
In species animosq̃ nitent. Vix ordine longo
Sufficiunt oculi. Quæ rerum turba ? Per
aulam*

*Fusus ubiq̃ dies : mille atria, culmina mille,
Mille lares, & certa lari sua cuiq̃ voluptas.*

Sed ea nimirum loci voluptas , quamdiu
oculos nostros aspernatur, ne calamis qui-
dem nostris verbisq̃ue dignatur adum-
brari.

39 IN hujus regiae vestibulo cū paul-
lū hospes constitisset , ab occurrente so-
cio benignè comiterq̃ue exceptus , per
ampla quædam atria, sanè quā officiosè
in aulam usque deducitur. Ibi frequentes
convivæ magno numero circumfident,
epulis colloquiisq̃ue intenti. Inter quos
Eques , quāvis advenerat tardiusculè,
tamen etiam tum , & , saltem de ultimo
missu , partem sibi suam capere jubetur.
Nam ad malajam usque, & secundæ men-
sæ bellaria convivium processerat. Ob-
temperat hospes non gravatè : cū eas
præsertim cibi potusq̃ue reliquias videret,
quæ

quæ etiam in saturo potoque famem possent movere. Omnia rore nectaris, omnia ambrosiæ sapore melleque condiebantur. Nugæ meræ, quicquid in Luculli Apolline vetustas est admirata: omnis Cleopatraræ sumptus paupertas; & ipse Apicii luxus potuit egestas ac jejunium vocari. Inter has dapum lautitias cum oculos hospes ad convivas etiam converterisset, illamque accumbentium modestiam, atque illam exuberantis lætitiæ consensionem, totamque loci majestatem conspexisset: cum denique attentior, hinc epheborum obsequia, hinc musicorum certamina, atque undique omnium studia officiaque considerasset; tum ille se demum

----- *mediis discumbere sensit in astris,
Et plus quàm Iliacâ porrectû sumere dextrâ
Immortale merû; superisq; tragemata mensis
Carpere, ab humano nunquam libata palato.*

40 AB eo deinde sensu, rerum mortaliū satur, id sibi reliquum sperabat, ut in illo felicitatis palatio ævum æternitatemque duraret. Nam quid, inquit, curis mortalibus indulgere posthac delectet? quid imò non pigeat, tædeatque? Perdidimus, quicquid huc usque viximus,

----- *steriles transmisimus annos;*

Hæc ævi mihi prima dies, hæc limina vitæ.

Jamque adeò pluribus terram convitiis petere, rebusque humanis repudiū remittere ingressus, tenere propositum non potuit. Adest enim à tergo monitor, creberque jam & ferius vellicat; parendum ei, nolit velit, abitum esse: ita temporis locique rationes postulare. Conscenderet proinde equum, & eodem, unde advenerat, postliminiò reverteretur. Hic homo queribundus (quis enim succenseat?) exilium deprecari, veteremque amicū obtestari, ne, quem tam comiter invitarat, lauteque acceperat, barbarā crudelitate immeritum exturbet. Vix etiamdum assedis-
 disse se, labrisque primoribus hæc ejus dapes degustasse, cum iterum exesse per ludibrium jubeatur. Daret hanc sibi veniam, & pro veteri necessitudine, in suo se tam beato domicilio contubernalem ne repudiaret: nolle se cuiquam odiosum & gravem esse, nec aliorum commodis intercedere; sed loco infimo contentum; omnibus parere. Cur autem tu, inquit, beatitudinis particulam hanc amico neges?

----- *celsâ jam Solis ab arce*

*Contemnis terras, humanæq; gaudia rides,
 Spemq; metûq; supra, & curâ sublimior omni,
 Exemplis*

*Exemptus fatis ; indignantemque refellis
Fortuna invidiam.*

Hac tantâ securitate dum felix tu beatus-
que gaudes, alios interim exclusos elimi-
natosque voles ? ut scilicet

----- *nos vilis turba caducis* -----

Affueti servire bonis -----

iterum humi vivere, id est iterum pericli-
tari, iterumque interire, & mori quotidie
compellamur ?

41 POTUIT hæc homo nobilis apud
veterem amicum prolixè invidioseque
expostulare : potuit preces lacrimasque (si
lacrimis in eâ regiâ locus est) interponere:
potuit denique, ut quidque voluit, ten-
tare; flectere tamen inducereque non po-
tuit, ut fieri loci consortem per id tempus
pateretur. Igitur spe omni dejectus Eques,
ne porro in hospite prensando actum age-
ret, ad equum denique rediit, eoque ægrè
conscenso, per avia loca in patriam pari
celeritate revehitur, oculis quidē nequic-
quam ad interdictum sibi palatium retor-
tis. Sed in patriâ, præ quàm cogitabat, mu-
tata mirificè omnia reperit. Ædēs ipsas,
quas paucis antè horis reliquisse se crede-
bat, jam in familiæ sacre cœnobium con-
versas ; amicorum verò superstitem planè
nemi-

neminem, ac ne nominis quidem sui generisq̃ue memorem quemquam apprehendit. Quapropter non de nihilo jam miratus, cæpit suspicari, id quod erat, domo se diutiùs abfuisse, quàm oculi sensusq̃ue decepti judicarant. Inde putatis diligenter temporibus, invenit annis adeò ducentis inter ejus epuli apophoreta se feliciter discubuisse : & nihilo minùs properatum abitum immerenti amico sic exprobrasse, ut à convivio non dimissum se, sed rejectum fuisse, per injuriam quereretur.

42 MVLTÀ hîc iterum mihi, Sodales, & æquè multa vobis, ut reor, in mentem sunt, quæ taciti omnes defixiq̃ue admiremur. Simul enim & raram Equitis hujus felicitatem gratulati suspicimus ; & suo quisque desiderio illuc ferimur, unde se iste opinione citiùs dimissum querebatur. Atque ô diem nobis exoptatum ! ô lucem gaudii exuberantis plenam, quâ nobis continget olim, ut ad epuli tam opimi ac lauti ambrosiam semel admissi, nunquam inde recedere, sed perennes dapum lautitias, nectarisq̃ue beati promulsides semper appetere, semper capere, semper instaurare, cum cælestibus convivis jubeamur ! Habebit ibi tunc animus ; habebit

(nulli

(nulli dubitate) unde non sibi solum suas delectationes abundè gratuletur, sed indidem in corpus quoque suum satis superque effundat: ut dum ipse cæli dapibus continenter reficitur, sensus quoque non senescere se unquam, sed perpetuam juventam agere experiatur.

V.

G A V D I A quorundam ex cognitâ sui ad gloriam electione.

*Ex Hieronymo Plato, 1. cap. 32. & Surio
13. Junii; & aliis.*

43 C V M perpauci mortalium suos oculos ad illam eternitatis felicitatem, atque ad illa mentium beatarum domicilia, constanter serioque advertant; nec tanti ea gaudia, quanti re verâ sunt, plerique faciant: eò nimirum fit, ut & illorum jacturam facere, minùs acerbum luctuosumque putent, & porrò minùs etiam laborent, quò perennitatis ac beatitatis hujus pignus aliquod antè capiant; id est, propioribus, quoad homini fas est, indiciis, utrùm in Cælitum albo descripti jam sint,

sint, prænoscant. Quem certè languorem nostrum, nullos hodie colores invenio; quibus ab inertiae aut etiam dementiae nostra excusem.

44 NAM quibus, Christe sancte, quantisque lætitiis cæci mortales maximam partem exultant, cum nuntius illis, quamvis ambiguus, affertur, aliquam spem affulgere aut auri argenti que potiundi, aut honoris adipiscendi, aut voluptatis, etiam per labores & pericula, reperiendæ? Aliquis amicum audit inter Principis clientes adscitum, & continuò gestit: alius patrem Senatoribus adlectum; & exsilit: alius fratri Magistratum fascesque obtigisse, & plaudit: avarus, hereditatem sibi venisse, & se ipse non capit. Miseros hos æquè ac illos, qui in tantilli gaudii simulacro triumphant! Nos autem longè his ipsis miserioribus, si, dum ad gloriæ sempiternæ coronam nos esse vocatos, nos inter cælestis imperii heredes adscriptos, nos ad præmii immortalis gaudia destinatos, cogitamus, torpore quodam ac veterano desides; non modò non exilimus confestim, sed ne lentè quidem languide que commovemur! Hæc enim gaudendi materies, homini aut una est, aut sine hac illi profectò alia nusquam ulla est.

45 DICERENT testimonium in hanc
rem Duodecemviri nostri, quos olim de
subactâ styge gloriantes, eaque propter
lætitiâ non absurdè gestientes, inhibuit
sapiientissimus Magister, iisque disertè no-
strum hoc argumentū, in quo uno trium-
pharent, suasque spes omnes & ambitio-
nes exfererent, opposuit; cū descriptum
in cælo suum cuique nomen monstraret.
Quâ syngraphâ tuti, nullas hominum in-
jurias tanti postea fecerunt, ut sibi lugen-
dum idcirco aut aliquid de conceptâ ani-
mi lætitiâ remittendum putarint: sed in-
ter verberū flagrorumque crepitus, plus-
quàm Spartanâ fortitudine erecti, interq;
pædorem carceris, & æumnas exilii, &
supplicii minas, interriti non multò aliter,
quàm epulis conquistissimis accepti, per-
durarint. Ut proinde non malis argumen-
tis ego persuasum habeam, suos latroni
quoque, tametsi acerbissimos, cruciatus,
graves esse molestosque desisse, simul at-
que audit, in cæli domicilio locum sibi
jam debitum reservari. Pendebat à stipite
lacer, clavisque trabalibus affixus, quò se
verteret, non habebat: pluebant sanguine
manus, rigeabant distenta brachia, hisce-
bant informi vulnere pedes. In hac tamen
corpo-

corporis lanienâ, cum cælum ei Christus promitteret, videor exclamantem audire; Debilem facite manu, debilem pede, coxâ; & si quid dirius his etiam ipsis est, id adhuc expromite: hoc tale solatium à cælo dum mihi superest, bene est. Bene profectò (quis dubitet?) & plus quàm bene fuit, cui animus in propinquâ felicitatis portum intentus, sensum omnem à furentis undæ fluctibus avocarât.

46 INVENIO in veterum Annalibus, historias referri duas, inter se ita confimiles, ut, si nomina quoque confundas, possint gemellæ videri. Altera VINCENTIVM, ANTONIVM altera celebrat; illum è *Dominici*, hunc *Francisci* collegio; utrumque & dicendi copiâ, & sanctimoniâ magnum. Hi tales divinum ostentum uterque accepere, de duobus, plebeiis quidem hominibus, sed quos eo tempore nulla adhuc neque morum honestas, neque animi studia conspicuos facerent, quosque vitiis plerique quàm virtuti judicarent propiores. Eos tamen isti didicere, jam tunc ambos cælesti æternoque decreto, ad immortalis vitæ gloriam esse destinatos. Ubi, si nostris calculis rem expendimus, erit fortasse, qui jactam hinc esse invidiæ semen-

sementem inter istos suspicetur; qualis inter nos haud dubia surgeret, si viri nobiles, obventurum homini sordido ignavoque regnum, praesentirent. Et fuit sanè quædam etiam apud hos invidia, sed fuit ea sancta, & sanctis non indigna. Denique qualis fuerit auscultate.

47 POST enim quàm VINCENTIVS ANTONIVSQUE sensere, hanc duorum, quanquam ignorantium, felicitatem esse; ceperunt uterque suam ipsorum conditionem miserari; ut qui, tametsi salutis apprimè satagentes, adhuc tamen dubii incerti que fluctuarent: cum interea alios viderent, æternorum incuriosos, sui que Dei que immemores, ad hanc securitatem, prius etiam, quàm optarent, pervenisse. Igitur ad eorum admirationem versi, continere se nequierunt, quin iis ubique applauderent, & utrumque summis honoribus, cultu que prope nimio prosequerentur: ita quidem, ut quaquà occurrissent, effusè gratulati, & ab eorū adspectu, velut à miraculo suspensi, fortunatos se crederent, quibus intueri tales contigisset. Accusarunt hoc VINCENTII & ANTONII studium non pauci, atque ipsi denique, qui tam ambitiosè colebantur, offensi, cum
stoma-

stomacho illos rejiciebant. Nihilo segnius illi in officio persistere, aliosque honores super alios ingerere : quod palam faterentur, committere nullo pacto se posse, quin eos jam tum ita venerarentur, quibus scirent decretam pactamque jam esse gloriæ perennitatem. Atque hinc VINCENTIVS tamen, & hinc ANTONIVS, alienâ tunc solum felicitate, nondum suâ gratulabantur. Superi boni ! quid cogitassent ii, quid sensissent, dixissent, fecissent, si allatum hunc de suâ ipsorum salute nuntium acceperissent ?

48 **E**QVIDEM aliud illos aut dicturos ego, aut facturos fuisse non puto, quàm quod, in fortunâ simili, & dixisse S. Franciscum, & fecisse, comperimus. Id autem cujuscumque fuerit, quæso vos, iterum observate. Franciscus, cum inter preces aliquando sic incaluisse, ut animo à sensibus alienato, nihil humanum aut caducum agitaret ; vidit perspicuè Cælitum sibi album (ô qualem, Sodales, & quâ elegantiam librum ?) exhiberi ; & in eo syllabo, cum aliis multis, suum quoque nomen litteris immortalibus descriptum haberi. Quo adspectu, suprâ quàm aliàs unquam, exhilaratus, quid apud se Franciscus statuerit, dicere

dicere non habeo: certè autem simul ad officiũ rediere sensus, in hanc ajunt odam continuò prorupisse, LAUDETUR DEVS MEVS, LAUDETUR DEVS. Nec brevis hæc ei aut interrupta per mōras exclamatio fuit. Nam, nisi me Historici fallunt, dies ille continuos octo nihil agere aliud, nihil dicere, nihil cogitare, præ gaudii hujus magnitudine, potuit; usque adeò, ut eas etiam preces, quas ex legum præscripto solvere quotidianas oportuisset, totas prorsus omittere, ob intercalarem hanc epistrophē, diebus octo compelleretur. O felix impedimentum! ô sanctè: pieque omissas, etiam optimas preces! Veniam sperate audacter, quiqui alii, paribus de causis, aut omisistis etiam vestras, aut estis adhuc omissuri.

49 VERVM hæc paullò sint fortasse remotiora, quàm ut exemplum indidem ad nos quoque moresque nostros traducamus. Dabo inspiciendum aliquid, si non temporis vicinitate, certè studiorum affinitate, juvenumque conditione, vobis propinquius; quod olim in oculis Hispaniæ gestum, fama celebris ad exteros, cum voluptatis eximiæ sensu, propagavit. Ex urbe quadam (nomen enim haud liquidò memi-

memini) adolescentuli exierant complures, bonæ mentis indolisque omnes: iiq̃ue omnes ad prædium suburbanum, ubi animos à litterarum studiis, pro more loci, remitterent, condixerant; invitati à nemoris amœnitate, quam ipsam & scenarum virentium opacitas, & prætexti lauro parietes, & multiplex viarum series, ad voluptatis invidiam commendabant. Eò loci cum pervenissent, continuò, quod cuique opportunum erat, id agere aggressi; variis in ludis jucundissimè se occuparunt. Quamquam in hac ipsâ ludicrorum varietate, mira quædam apud omnes honestas, & animorum alacritas consentiebat.

50 Ecce autem, dum ibi omnia, ut inter adolescentes, quàm maximè fervent, nuntiatur adesse venerandâ canitie Senex, homo sanctimonix & virtutis per omnem Hispaniam compertæ, & cui præcipua quædam crebraque cum Deo familiaritas intercedere, non vanis conjecturis credebatur. Ad hujus adventum conspectumque, utpote id loci ac temporis inexpectatum, omnes à ludicro quisque suo confestim divertere, ad unum venerabundi certatim accurrere, eumque circumstare frequentes & coronâ circumdare; ut qui felices sese,

vel

vel adspectu senis, vel alloquio putarent. Eorum aliqui, cum paulò antè secessum ab aliis captassent, ubi in umbrâ sermones de rebus honestis instituerent, opportunum rati, hominem sessum abducunt, inibi que ad symbolas amicè invitant. Symbolæ erant, ut de suo quisque, quod eximiè pulchrum legisset, audissètve, id expromeret; allatumque cum cæteris communicaret. Senior, quem diximus, insolitum renidens, eam ipsam ob rem ultrò venisse se non dissimulat, uti ad communes eorum symbolas mira quædam atque insperata, nec auditu magis jucunda, quàm certa etiam ipsis & confirmata, apportaret. Inde, ne quis verba, ceu temerè elapsa, in dubium traheret, fidem suam interponit apud adolescentes vir ille, cui injurato omnis Hispania omnia credidisset.

SI INSOLENS hæc novaque senis erat præfatio; quò magis erigebat universos, ut pro se singuli, quàm proximè quisque posset, accedere, & quæ memoraturus is orator esset, audire gestiret. Neque enim vulgare quidpiam, aut usitatum, eâ hominis frons, oculi, vultus emicans, & horum omnium ardor, promittebant. Igitur ille, conjectis prius in adstantes oculis, quasi

noscitabundus singulorum ora, & circumstantium numerum exploraret, gaudio per oculos ebulliente. Hac, inquit, nocte, quæ arcana mihi cælum, & quæ nova de vobis, adolescentes, patefecit? ea si vobis omnia dixero, symbolas hodiè lautiores à nemine alio expectate. Nam vos ego rescii omnes, quotquot me circumstatis, ad unum omnes, teque, adèd ipsum, teque nominatim, teque, & denique quotquot hic adestis omnes, certo Numinis decreto, ad gloriam cælestem feliciter esse jam electos. Ita Senior legatus. Simul & ipse conticescere, & alii exclamare, & alii lacrimis, & alii desideriiis, & alii suspiriis indulgere; alii sui immemores stupere, alii in genua effusi accidere: aliqui angulos in horto quærere, suamque felicitatē seorsim expendere: aliqui exilire, & invicem salutare, & gratulantes in complexum ruere: omnes aliquid agere, nemo seipse capere. Jam proinde ludicra quæ cæperant, omnia exesse & valere: gaudia, tametsi honesta, & alia quæq; squallere & sordere; demum in unum Senis oraculū intenti, ubi essent, ubi consisterent, quid agerent ignorare.

52 Hæc talia profectò, Sodales, hæc etiam in nobis desideria crescerent, iisdemque

demque gaudiis animus noster æstuarer, si, quod sæpè jam dixi, sæpèque dicam, attentiores aliquantò ad nostrâ felicitatem respiceremus: ad quam itidem electos jam esse nos confidimus, aut certè ut electi simus, quotidie laboramus. Neque enim cogitate, multò disparè esse vestram cujusque, & adolescentum istorum conditionem; eò quòd nemo dum vobis nuntium hunc attulerit, nemo fortassis ante mortem laturus sit. Potes imò ipse tu tibi nuntius esse; & dummodò velis, nuntiare tibi jam adeò nunc potes: nisi magni auctores, multique me fefellerunt; quos audio liberè clamitantes: *Vocare, Dei est; sed electum fieri, aut non electum, etiam est nostrum.* Planè nostrum, Sodales, & in nostrâ potestate situm. Quare si vocati possumus velle, possumus etiam, quotquot sumus, eligi. Nondum signata penitus est electio: expectat adhuc merita tua, expectat opera. Subscribant ista firmentque, & electum te videbis. Habemus enim, quod falsò sibi veteres arrogarunt, cum suæ quemque fortunæ artificem esse crediderunt; habemus, inquam, ut summam nobis fortunam, id est, æternam gloriæ electionem (si mihi fas ita loqui) ad nutum pænè arbitrium-

bitriumque nostrum fingere, dum ne pigeat inertes, felicissimè facillimeque possimus.

V. I.

LYDOVICVS Thuringius Decreto
divinæ electionis abusus.

*Ex Casario 1. cap. 27. Daurulcius cap. 2.
tit. 2.*

53 **E**ARVM rerum, quæ animum habere sollicitum præcipuè solent, quarumque rationes inire, & indagare principia, difficillimum; exitus verò ambiguos cogitare, cum primis formidolosum & anceps habetur; palmarium est, illud æternum horrificumque Senatusconsultum, quo jam inde, priusquam editi in lucem hanc fuëramus, non de fortunis honoribusque, sed de capite, vitâ saluteque nostrâ, in Supremi Numinis curiâ severè graviterque actum, disceptatum, judicatumque erat. Et tenetur illud quidem decretum, adhuc velut in vaginâ reconditum, iisque quorum maximè interest, maximè occultum; sed irrevocabili tamen syngraphâ jam tantò

tantò antè firmatum, ac propediem aliis aliisque, ut judici videbitur, promulgandum.

54 **ATQUE** utinam hîc quoque (quod aliis in malis solet) tantummodo metus ad omnes, periculum verò ipsum ad paucos pertineret ! Respirare fortassis in hac, quamvis ambigua fortunâ, posse videmur. Nunc eo loco sumus, ut pauci (proh dolor !) metuamus ; omnes autem hoc Senatusconsulto periclitemur. Agitur mea quæque res, & ignoramus. Agitur de exilio omnium nostrum, nec excitamur : agitur de supplicio universorum, nec perturbamur. De æternitate, inquam, agitur ; & quid (malum !) agitur ? Imò enim verò actum, constitutum, decretum jam est : & nos, velut in tranquillo securi soluti quæ, adhuc stertimus ; ludimus, lascivimus. Et quidem, si aliena solum percellere nos calamitas nequiret, ferenda utcunque & dissimulanda hæc foret inertia : nunc nostro præcipitio cum ipsi nihil commovemur, dicam audacius, non indolentiâ laborare, sed amentiam vexari existimamur.

55 **HANC** ego tantam generis humani vecordiam, cum apud animum meum aliquando impensius mirarer, cœpi ad ejus

fontes aliquos & scaturigines perquirendas incumbere; & reperi confestim, nullo propè negotio, vivendi negligentiam pleramque è malâ quorundam pravaque persuasione oriri; quâ putent, Senatus illud consultum non factum modò ratumque jam tum fuisse, prius quàm mortales nasceremur (id enim haud dubiis rationibus æquè omnes comprobamus) verùm etiam prius quàm Numen æternum, quid quisque rectè & laudabiliter facturi essemus, prævideret. Quâ quidem sententiâ nobis dudum per se suspectâ displicitaque, aliqui non contenti, sic ulterius abutuntur, ut in factiones impiè prorumpant, indidemque offucias fraudesque in sordidâ Calvinî incude procudere, ad suam aliorumque perniciem, laborent; dum etiam flammis perennibus eo decreto addictum unumquemque prius fuisse contendunt, quàm fuerit sceleris ullius aut facinoris suspectus. O impios, consilii cælestis interpretes! dignosque hoc suo iudicio, qui soli tam inclementer, & imò dementer, de optimi Numinis clementiâ sensere!

§ 6 QUÂNQUAM hîc nondum isti subsistunt, sed indidem huc porrò amentię progrediuntur, ut stolidè omnem sibi vitę licen-

licentiam permittant, dum de suâ aut salute aut clade decretum jam esse audiunt; & neque falli scita cœlestia norunt, neque mutari ea, aut refingi suo cujusque arbitrio posse credunt. Quare de nihilo se utique laboraturos vociferantur, si supervacuam salutis curam cogitationemve suscipiant, cum prius etiam, quam curent aut cogitent, dictam decisamque ad summi Judicis tribunal causam esse cognoscant. Atque hic, inquam, ille fons est, è quo ista multorum scaturit ignavia, ut nullâ nec promovendæ salutis curâ, nec damni ingruentis formidine tangi jam videantur. Cujus ut imaginem vivam in viro Principe inspiciatis, unaque remedium adversus hoc veternum habeatis, intuemini mecum paulisper **LVDOVICVM**, Thuringiæ nobilem Dynastam.

57 Hunc mihi Cæsarius tradit, virum cetera nec imprudentem, beneque, ut inter Principes, litteratum, hac unâ in re, graviter deam an turpiter, desipuisse, quod ab amicis admonitus, ne tam effra-nus & præceps per vitiorum prærupta ad interitum properaret, objecto futuri æternique metu; identidem non tam perplexo, quam impio dilemâte responderet: Se qui-

dem actum haud dubiè acturum , si ullà vel exitii vitandì, vel procurandæ salutis sollicitudine cruciaretur. Nam siue decretum mihi jam cælum est, nullo, inquit, facinore meo, quamvis atroci & fædo, efficiam , ut vita mihi salusque periclitentur ; cum norim, irrita, quæ DEVS jam decrêrit, fieri nunquam posse. Sive secus est, ut cælo me Numen excludere decrêrit, jam nullo conatu meo, quamvis pio sanctoque, fiet, ut equidem salute cæloque potiar. Quid ni liber igitur hoc metu me omni absolvo, animumque à futuris , quæ vanè perturbent, per voluptates abduco? Auditis, Sodales, hominem ex Epicuri grege philosophantem, aut pecudem verius in harâ Calvinii grunnientem. Et plaudit sibi tamen hoc suo tam absono cantu; nec aliter multò , quàm si porticum Zenonis, & lycæum Aristotelis expugnasset, triumphat.

§8 CVM hæc LVDOVICI vœsania irroboraſſet diu, inveteraſſetque; multos, quibus utebatur familiariùs, anxios in primis habuit hominis cauſſa ; quippe quem pro amicitia adjutum ſeriò , ſed nequicquam, cupiebant. Ex iſtis Medicus erat , homo quàm bonis artibus ſtudiisſque excultus, tam Chriſtianis virtutibus clarus. Is hanc
Princi-

Principis sui desperationem unus præter ceteros vehementer deplorabat, tentatisque frustra omnibus, cum aditum ad expugnandam pertinaciam diu non reperisset, cum denique Deus in tempore sic patrefecit. Ægritudine animi, morboque corporis acri & periculoso conflictari Dynasta cœperat. Ardebant intestinis ignibus viscera, tumebant sanguine venæ, & signis familiaribus Libitinam advocabant. Nuntiatur ægro periculum. Iste confestim, uti mos est, Medicum vocari, quæque alia tempus & necessitas volebant, apparari jubet. Festinatur, Medicus, quem dixi, apprime diligens, maturat ad ægrum accurrere, &, si quam prius animo medicinam afferreret, circumspicere. At æger aliorum impatiens, missis omnibus, hoc imò agere Medicum jubet, & quibus rationibus corpori quàm primùm medeatur, cogitare. Hic ille non intempestivum in arenâ consilium capit, & suis hominem telis prospicienter adoritur. Nam negat, suam ægro aut necessariam aut utilem posse operam esse. Sive enim decrevit Deus, prævidetque, re verâ futurum, ut ex hac, inquit, ægritudine tu moriaris; jam mea quidem consilia & medicamenta prodesse non po-

terunt. Quis enim decretis cælestibus tribunus intercedat? Sive, futurū jam videt, ut hoc morbi periculo levatus cōvalescas, tum verò tu sine ullâ & Medici & medicamenti ope integer resurges. Quin ergo (malum) faceßere abs te Podalirios omnes, Æsculapiosque tu jubes, & futuris te cruciare porrò omittis?

59 **EXCANDVIT** hoc Medici consilio æger, ut qui nondum intelligeret, quo telo suus sibi jugulus peteretur. Quare vultuosior, ad illum; Ecquid autem odiosè hoc tu agere, inquit, quod agendum est, cunctaris? cumque nescias, istud Superi an illud futurum prævideant, cur omne studium tuum non intendis, ut quoad potest, periculo me morboque eximere coneris? Quid si enim per hæc ipsa medicamenta, nec aliter, evasurum præviderunt? utere ingenio tu, omni que arte quâ polles: de DEI decreto cogitare Deum permitte. Arripuit vocem Medicus, velut rationibus suis peropportunam, leniterque Principi, Tu verò vitam, inquit, extendere te per artem posse confidis, neque huic spei obstare Numinis decretum putas: cur cælum exorari posse non itidem speras, ut benè factis obrineri se sinat? Aut enim neutræ spes

ſpes cum decreto æternitatis pugnant, aut ſi earum alterutra, certè ex æquo utraque pugnabit. Quid profeciſſe Medicum hac diſputatione exiſtimatis ? Profecit æger, & perpenſis cauſſæ momentis, rediit ad mentem; videns, (ut ingenio erat æuto) ridiculum fore, ſi reprehenderet confequentia, qui prima conceſſiſſet. Igitur excuſſo mentis delirio, non valere ſolùm, ſed ſapere etiam ſe, Medici ſui beneficio, eſt confeſſus.

60 UTINAM hodièque multi, non dicam ex olidâ Luciani mephiti, ſed è ceteris quoque mortalibus non pauci, quibus error hic aliquis illuſit, in tempore medicinam hanc fortirentur ! Evenire profectò & nos hodie videremus (quod vidiffè ſe ſcribit *Leonardus Leſſius*, teſtis locuples, cujus obitu nuper omnis Theologia congemuit) ut multi ab interitu ad ſpem frugemque reducerentur, quos ſiniſtra quædam, neſcio quæ perſuaſio, temerè aut correptos aut afflatos, de vitâ capiteq; deſperare propemodum ſubigebat. Nam quibus antehac ſola decreti huius memoria, aut nimio terrori formidiniq; fuerat, aut frenos ad quæque nefaria conſciſcenda laxarat; iis nunc ejuſdem venire in men-

tem non posset, quin conceptâ fiduciâ læti, impensius dehinc obsistere vitiis & operam virtutibus navare insisteret: certi, Senatus illud consultum neutram in partem ratum prius & obsignatū fuisse, quàm sua cujusque facinora, divinis oculis objecta, subscripsissent.

61 VERVM hoc ego pronuntiato patrocinari eorum causæ non volo, quos præsentibus occupari sic video, ut ad futura parum attenti, nec felicitatem perennem satis appetere, nec ab excidio perenni refugere sollicitè anxieque contendant. Nam ii, sicut seriis istis ac decretoriis cogitationibus nihil magnopere discruciantur, dum terminos ipsos & metas, ad quas universi tendimus, prænoscere non student; ita ne vias quidem semitasque eò ducentes cum curâ decurrere, aut solerter evitare condiscunt. Quis enim est, qui è frequentissimâ concione unus, terreri se aliquando ostendat; qui que in gemitus palam & lacrimas prorumpat, aut in quanto & quàm propinquo discrimine versetur expendat; quamvis atroces aliorum casus, eventusque tragicos, mille ibi documentis audiat inculcari?

62 SIMEONI cuidam, viro sanctissimo,

ut auctor est Baronius Annali decimo, post annum noningentesimum septuagesimo sexto, patefactum divinitus est, ex decem hominum millibus ægrè unum aliquando reperiri, qui ab immensâ inferorum voragine liber evadat. Quid? quòd Lingonum Antistiti Trithemius, inter annum millesimum centesimum sexagesimum, de cælo ostensum tradit, sub eandem horam, quâ Bernardus è vivis excesserat, Judicis supremi tribunal millia hominum triginta circumstitisse, & in dicendâ æternitatis causâ, duos omnino ex universo numero perorasse, qui absoluti, cælum rectâ petierint; tres ampliâtos, ad piacularē carcerem divertisse; ceteros ad unum omnes (horror est ingens referre) ad unum, inquam, omnes causâ cecidisse, obmutuisse, interiisse. Denique Bertorio quodam per terras Germanias concionanti (quod memorat B. Antoninus Volumine tertio, Titulo supra vigesimum quarto) compertum mirabili prodigio fuit, vitæ rationes à millibus hominum sexaginta exactas in eodem jure fuisse, neque de copiis tantis amplius unum steterisse; res, dum reliquum æris dissolverent, flammis purgari iustos; ceteros catervatim omnes

perperuū obæratos mansisse, inferisque mancupi factos, æternū exulasse.

63 O Forum & Tribunal! ô & Judicem, & judicii eventum! ô reos ibi miseros! ô omnia ibi formidanda! Et tamen quotus est quisque, qui hæc audiens expavescat? qui vitæ rationes tempestivius mutet? qui secum ipse seriò disquirat, ecquid etiam se futurum propediem sit, cum & ipse inter tot millia causam dicere aggredietur? Nimirum, quia plerique, quod dixi, nec illam calamitatis sempiternæ faciem, tetriq̃ue carceris horrorem, & lamentabilem exilii conditionem sibi perspectam satis aut vivis coloribus depictam habemus: idcirco neque proscriptionem Judicis formidamus, neque edictum; quo ad æumnas illas ablegabimur, serium esse decretoriumq̃ue cogitamus. Itaque fit, ut æquè in communi omnium, ac in singulari cujusque nostrū periculo, tantò longius, proh dolor! absumus à metu, quantò propius ab excidio exitioq̃ue sempiterno distamus.

VII.

MARSILII & MERCATI de Æternitate colloquium.

Ex Casare Baronio Annali 5. anno 411.

64 **Q**UOD in bello legimus, canente classico, lituos tubasque facere; id apud familiares videmus amica sæpe colloquia præstare. Nam utrisque, mirum est, quam facilè excitemur, ita, ut inflammati, illis quidem ad stringendum ferrum, pugnamque capeffendam; istis autem ad ea, de quibus differimus, appetenda, vehementer plerumque rapiamur. Si enim potuit imber Aureus, quamquam in mutâ tabulâ spectatus, adolescentem ad simile facinus hortari; quantò validius, animatæ auditæque Sirenium voces animum everberabunt? Sensere mortales jam olim, & sentiunt hodieque, proh dolor, cladem hanc multi; ferisque lacrimis intempesta colloquia deplorant. Ceterum daturi colloquiis hoc nunquam sumus, ut iis ad prava nos instigari, non etiam ad honesta pulchraque excitari posse confiteamur.

Possu-

Possumus omnino, Sodales; & ne quid ambigatis, etiam solemus.

65 NAM reflectite, si vultis, paulisper huc oculos, & eorum aliquos observate, qui inter se de rerum cælestium pulchritudine collocuti, magnis continuò desideriis ad res easdem concupiscendas ferebantur. Augustinum hîc audietis (quem, Deus bone, qualemque virum?) ad Ostia Tiberina cum matre; audietis Benedictum cum sorore, sermocinantes: atque hinc Monicam vos confestim, inde Scholasticam, videbitis, velut igne concepto, magnarum cogitationum flammâ spirare; videbitis, terras illis, & quicquid humani uspiam est, vilescere, neque aliud menti, quàm Deum, Dei que fruendi desiderium, inesse. Ut mirum proinde mihi non sit, cùm lego, earum alteri noctes totas in eâ suavitate exactas sine fastidio fuisse; & porrò, ne tenebras dulces fuga fratris arumperet, cæli ruentis imbres forori suppetias venisse. O pluvias tempestivas! quæ, tanquam & ipsæ colloquio gauderent, discedendi copiam, intercessione plusquam Tribunitiâ, sustulerunt. Neque moræ fratrem suæ pœnituit. Nam commodum digressus, sororem, quam non æquè febris æstu,

æstu, ac æternitatis desiderio ardentem reliquerat, vidit columbæ ritu, libratis alis, per aëra nubesque ad cæli confinia tendere, eamque patriam volatu petere, de cujus amænissimo situ, opulentaque & securâ voluptate, noctu sermonem uterque contulerant.

66 His nihilo minora legetis & alteri, quam dixi, usu venisse; cujus ego sensa quando verbis meis æquare nequeo, pretereaque melius ab ipso vobis Augustino recenserî jubebo. Evenerat, inquit, ut ego materque soli ad quandam fenestram incumbere-mus, ex quâ hortus prospectabatur: ubi remoti à turbis, dulciter colloquebamur, & præterita obliti, querebamus inter nos, qualis futura esset vita Sanctorum, quam nec oculus vidit, nec auris audivit, nec in cor hominis ascendit. Cumque ad eum finem sermo produceretur, ut sensuum delectatio quantalibet, præ illius vita jucunditate, non comparatione, sed ne commemoratione quidem digna videretur: erecti ardentiore affectu, perambulavimus ipsum cælum, unde sol & luna & stellæ lucent; & adhuc ascendebamus cogitando & loquendo, ut attingeremus regionem ubertatis. Et dum loquimur, & inhiamus illi, attingimus eam modicè toto ictu cordis, & suspiravimus, & reliquimus ibi religatas

religatas primitias spiritûs. Ac ne cetera Augustini omnia prosequamur, accipite sermonis instituti coronidem, & quo epiphonemate colloquium terminarint, audite. Dicebamus, inquit, talia, etsi non isto modo, & his verbis; tamen illo die cùm talia loqueremur, mundus iste nobis inter verba cum omnibus delectationibus suis vilescibat: id quæ ita quidem, ut ultrò in vocem hanc generosam eruperit mater: Nullâ re jam delector in hac vitâ: quid hîc facio?

67 Et ego, Sodales, hîc itidem quid faciam, ignoro. Silentione animum hunc fæminæ talem admirer, an verbis laudare aggrediar hanc in eâ rerum mortalium despicientiam? hoc tædium vivendi? hanc abeundi obeundi quæ cupidinem? hoc votum ac desiderium æternitatis? Nempe colloquio hæc suo in acceptis jubet omnia referri. Inde spiritus isti, inde hoc fæminæ robur. Monstrate suos aliqui liberos illi, reditum ad amicos suadete, & soli natalis dulcedinem, & familiæ gaudia, & vitæ solatia memorate; ad hæc omnia responsum audietis: Nullâ re tali jam delector; quid hîc facio? cur ad opes veras voluptates quæ non propero? & cùm ad regni possessionem inviter, cur ullas in hoc exilio moras traho? cur carceris

linginqui

longinqui arumnâ , cum gloriâ triumphî non denique commuto ? Commutasti enim verò tu dudum , votisque feliciter damnata , cælum omne , quâ lubet , perambulas : sed vides , cheu ! vides humi nos interim occupatos , fluxa quædam adhuc & mentita gaudia sectari , cæloque neglecto , tantum a desiderii tui similitudine recedere , quantum in colloquiis nostris à tui imitatione degeneramus.

68 SED ne antiqua solùm , magnamque partem apud nos pervulgata repetamus ; aliud , non æquè omnibus auditum , accipite , cujus celebris fama haud multò supra nostram memoriam invaluit , & apud Cæsarem Baronium litteris habetur illustribus consignata. Inter MICHAELEM MERCATVM , gente Hetruscum , & MARSILIVM FICINVm , acri ingenio viros , magna , ob vitæ studiique similitudinem , necessitudo erat. Utrique Philosophia , sed in primis Academia placebat , sic , ut unus iis instar omnium esset Plato. Hunc lectitare uterque , hunc commentari , in hoc uno omne suum studium contere. Evenerat inter hos fortè , ut , lecto Platone , in mentionem æternitatis delaberentur : argumentum , si quod aliud , Philosopho dignum , & vel maximè

maximè Christiano. Quod quidem à Platone, suprà quàm ab extero Scriptore sperares, ita tractatum luculenter est, ut ajant, repertos fuisse, qui olim, cùm ejus commenta quædam de vitâ beatâ lectitassent, capti admiratione, & loci desiderio incensi, sponte suâ præcipites ierint, mortemque sibi manu consciverint, quò viâ compendiariâ in ejus possessionē venirent.

69 Igitur Marsilivs, quem dixi, & Mercatvs in hoc argumentum opportunè delapsi, ultrò citroque compluria disputabant. Neque iis contenti quæ in Platone jam legerant, ad intima cæli ultimaque penetrare, & si quâ possent, omnem Rei illius publicæ statum cognoscere nitebantur. Audierant enim sæpe, quàm *gloriosa de Civitate Dei* prædicarentur: audierant, quæ civium ibi tranquillitas, quæ pax; quæ loci majestas, & quàm exuberans omnium lætitia esset. Inde exorsi, placidè disquirebant, quis præcipuè pictor, & quo penicillo, & quibus coloribus, aliquod ejus urbis simulacrum adumbrasset. Venitque in mentē ejus unius tabellæ, quam Joannes velut apographon monstratæ sibi civitatis reliquit. In eam imaginē intenti, ducta quædam urbis lineamenta exami-
nant.

nant. Hîc pavimentum & plateas, hîc ædificia & palatia, ex auro omnia, cunctamq; civitatem æquè omnem ex auro. Ibi mænium structuram, quàm latè quidem tenditur, ex jaspide merâ: ibi fundamenta undique omnia & undique, gemmas: in portis ipsis uniones meros & margaritas. Inde ad mentis oblectamenta, atque inde ex aliis ad alia traducti, cùm in singulis attoniti stuperent; Quid, inquiunt, res ipsa, quos motus apud nos excitaret, si ab umbrâ rei tanta nobis exoritur voluptas?

70 IN hujusmodi sermone cùm longiusculè fuissent progressi, alterque alterum, æquè ac seipsum, quisque ad capiendam ejus felicitatis usuram inflammassent; neque tamen explere animos sensusque in præsentia possent; ad ejusmodi postremo consilium descendunt, quod olim inisse Canium quendam Romanum Seneca prodit; quanquam eventu abnuente. Istum tyrannus cùm duci jussisset, & amici virum magnum tristes dimitterent, Quid mœsti, inquit, estis? vos quæritis, an immortales animæ sint; at ego jam sciam. promisitque, si quid explorasset, circumiturum amicos, & indicaturum, quis esset. animarum status. Sed frustra tamen, ut dixi, Canius hic fuit:

fuit ; non item fuere nostri , quippe & causâ & conditione meliores : qui, non ut immortalitatem animæ, de quâ nunquam dubitarant ; sed ut quædam alia beatitudinis admiranda confirmarent, sic inter se, datâ redditaque fide, sunt pacti, ut uter duorum prior è vitæ statione emigrasset, is de vitæ alterius statu (quâ fas esset) superstitem edoceret. Conventum in hæc verba ; juratum : & mox dirempto colloquio, amicè discessum.

71 AB eo digressu, multis pòst, nescio quot diebus, MICHAËLEM MERCATVM, domi suæ studiis litterarum, ut assiduè solebat, operantem, benè manè, citati equitis cursus advertit ; jamque adeò præter ædium fores, ferventium ungularum sonitus, & fragor ferebatur ; cùm ecce tibi, non expectata vox à foribus audiri, quæ MICHAËLEM exciret. Iste, quis hospes tam matutinus advenisset, quidque se id adeò dici vellet, mirari : eaque propter assurgere confestim, accurrere, & de musei sui fenestrâ, quâ licuit, prospectare. Videt insperatò, agnoscitque MARSILIVM suum, in equo candido prætervehentem, atq; elatâ voce, *O Michael*, iteratò, *ô Michael*, inclamantem ; *vera sunt omnia, vera sunt*. Simul
equus

equus illum à foribus, simul ex oculis & orbe abripuit. Nondum de funere amici, ac ne morbo quidem percrebuerat: cùm paullò pòst nuntiatur, MARSILIVM sub eandem horam, quâ eques ibi diverterat, Florentiæ, ex morbo decessisse.

72. NON vacat hîc immorari, Sodales, dum singillatim persequar dicendo, quis hoc tale spectaculum motus exceperit. Satis operæ fecisse me arbitrabor, si intelligere vos ego videam, nec MARSILIVM hunc sui colloquii, nec MICHAËLEM pænitere potuisse, cùjus ad utrumque tam optabiles fructus dimanarint. Nam & MICHAËLEM ajunt, quoad ab eo viso provixerit, ita semper vixisse, ut multò etiam, ac antè fecerat studiosius omnes, non modò Philosophi boni, sed & Christiani partes officiumque adimplerit. Ad quod exemplum (si votis agenda res est) utinam & ætas hæc, nostra respiceret, paribusque colloquiis pares colligere fructus adniteretur! Quanquam non idcirco lege nos eadem paciscemur, ut itidem huc nuntii tales ad nos afferantur. Ipsi potius, Sodales, ipsimet ibimus: ipsi, qualia quantaque sint ea quæ de hac Dei civitate inter nos leguntur, narrantur, audiuntur, inspicere coràm

coràm & oculis nostris intueri maturabimus : ubi, cùm omnia perviderimus, ne illud quidem expectaturi sumus , ut vera nos illa dictisq̃ue nostris esse congruentia audiamus, sed ultrò omnes ac palàm fatebimur , à vero nos nimium quantum aberrasse; dum quâliacumque tandē & quantacunque hîc dixerimus, sentiemus, rebus ipsis fuisse minora.

V I I I.

ADOLESCENS pius, salutis suæ
securus.

Ex Landolfo de Saxoniâ, Daurult. Specul.

c. 2. tit. 2.

73 **E**T SI magnum meritò & in primis arduum habetur, inter adversa infestaq̃ue nunquam, nec animo cadere, nec degeneri metu trepidare; idq̃ue multi jam sæpè, cùm de vitâ quidem fortunisq̃; ageretur, non instrenuè præstiterunt : eluxisse tamen, nescio quid fortius, in eo videtur Adolescente, quem ne æternitatis quidem adversæ nuntius potuit à recto bonoq̃ue transversum agere. Quod ego factum ejusmodi

modi duco, ut necesse putē, rem omnem, uti à majoribus accepi, cursim hîc reperere.

74 PRÆCLARI mores*, æquē ac splendidi natales, opesque honestæ Juvenem decorabant. Quæ tamen tot ornamenta, quàm illi facilè omnium amores colligebant, tam ægrè Sirenum insidias vitæque pericula defendebant. Nam ut oculos ipse, ne quâ caperetur, modestissimè clauderet, non perinde & alienos in potestate habebat. Quaquâ incederet, erant ubique multi, qui occurrere, qui insinuare se, qui alloqui laudatam indolem gestirent. Quo factum, ut cùm unus ab omnibus assiduè diriperetur, ferè nusquam esse quieto liceret. Ergone in hanc, inquit, fortunam geniti nos sumus, ut ubique periculis opportuni, quotidie cum novis hostibus velitemur! Infidiatur patria; quærenda per exilium est salus: illic rimula patebit, per quam elabar. Dixit, & quâ potuit solertiâ, deceptis custodibus, domo urbeque excessit: tum, ne quis etiam peregrè obturbaret, solitudinem quandam, à paucis Anachoretis habitatam, petere instituit.

75 MAGNI animi tuum hoc, magnæque indolis cœptum, Adolescens! Fatemur ul-

trò, & admiramur. Sed in eo tibi res vertitur, ut laudata consilia, quàm fortiter susceperis, tam constanter exequaris. Multos tui similes solitudo decepit, alios in primis rudimentis, cùm adhuc proluderent, alios longiusculè progressos, & aliquos propè emeritos, dejecit; blandior nomine, quàm aspectu. Potes horum aliquid etiam tu tibi timere; eaquæ propter seriò, ne inermis in arenam hæc venias, attende. Magistro opus est, nec imperito, qui multas jam ipse palmas reportarit, qui artes viresquæ adversarii norit, ejusquæ petitiones exire cum primis didicerit. Crederetis hæc Adolescentem omnia audisse, adeò nihil eorum, quæ diximus, prætermisit. Nactus præcipuè magistrum est, exercitæ militiæ senem: ad cujus præscriptũ, veluti legem, victitare, quidquæ omitti deberet, ediscere, & omnem vitæ rationem componere, paullatim assuescebat. Jam familiare erat, pervigiliis noctes continuare, somnoquæ bellum indicere: jam naturæ ruentis impetus frenare, jam cælo manus injicere, & lacrimis precibusquæ viam aperire; jam in ediam ferre, famemquæ & sitim vix inter seria belli ducere.

76 INTERIM senex, qui veteranum in
tirone

tirone suo videret, magnopere lætatus, non erubuit exempla virtutum à discipulo sumere, sibi que eum incitamento esse dicere. Quam ob causam libenter cum eo crebro que in colloquium veniebat; itaque ab illo identidem recedebat, ut lætitiæ animi, quam ex tironis profectu hauserat, oculis ore que toto copiosè proderet. Quæ ipsa magistri serenitas vicissim valuit ad studia discipuli acuenda. Sed hæc utriusque hilaritas cum diu tenuisset, postremò exortæ nubes, animum senis ita perturbaverunt, ut Adolescentem ab eo die nunquam sine gemitu aspiceret, sæpè etiam illacrimans à se dimitteret. Quod cum creberri-
mè fieri Adolefcens observasset, ratus est, nihil abs re facturum, si causam ejus mœstitiæ à magistro requireret. Abnu-
it pertinaciter senex; sed ne istud quidem, nisi lacrimans & ingemiscens. Movit ob-
stinatum silentium, ut tantò alter impen-
sius postularet: Istud, Pater, quicquid est, fac me ut sciam: ne retice, ne verere: crede, inquam mihi; aut consolando, quâ pos-
sum, aut aliâ ope te juvero.

77 PERSTAT nihilominus senex, ne-
gatque tristitiæ ullo levare solatio aut
arte posse. Magnis tamen machinis expu-

gnatus, istud demum consensit, ut eum ipsum Adolescentem deplorare se fateretur. Enimverò tum iste, quod adhuc modestissimè fecerat, violentis agere precibus insistit, ut reliquum abditì doloris eruat: simul sanctè pollicitus, quicquid sui vel moris vel facti displicuisset, id illicò, dum senex proderet, mutaturum; alioquin, In omni vitâ quid, inquit, mihi suave poterit videri, si fìccus ego, maderè te semper & flere compellam? Inde in lacrimas & ipse ruere, neque cessaturum priùs se dicere, quàm causâ, cur ab altero defleretur, rescisset. In hunc serè modum, par utrinque pertinacia diu multumque valuit, dum denique Adolescens assidue obtundendo pervicit, ut alter gemitus inter & lamenta, quanquam ægrè, sic tamen inciperet.

78 QVOD mihi per telicuit, fili, silentio decrevi rem omnem, quam quæris, involvere; & ne quâ ejus indicium erumperet, studui, donec tu mihi per lacrimas prodito, vim propè ultimam attulisti. Quod utinam parcius voluisses! nam vereor, ne postquam rescieris, optare incipias nescisse. Cum preces nuper solito prolixius extenderẽ, cæloque causam utriusque nostrum,

nostrum, ut meus mos est, commendarem; video scindere se nubem, indeque formam, humanam grandiore, existere: quæ vultu ad me converso, & voce tragicâ, parcere inanibus votis, precesque irritas jubebat omittere; nec enim fatalia decreta arbitrio humano mutari posse. Mihi frigidus horror omnia membra pervadere. Sed quia necdum planè, quò vergeret denuntiatio feralis, intelligebam, auxit terrorem vox altera, (miserum me atque infelicem! quæ illa & qualis vox!) nullum ferire me fulmen gravius potuisset. Illa te vox, fili, quicquid præclari nunc ageres, susque deque habito, pronuntiavit, æterno senatusconsulto proscriptum jam esse, & veluti futurum Dei hostem, flammis perennibus reservari. Hæc senior ægrè prolocutus, desit cum lacrimis, interque obluctantis animæ singultus obmutuit.

79 Ac ne Adolescens quidem, hæc audiens, causas habere se, cur magnopere triumpharet, sentiebat. Quare & ipse, dum vocem, quam res inopina strangulaverat, animo recepto colligeret, aliquamdiu cunctatus, meditari secum videbatur, in quos affectus prorumperet. Nec multò tamen post, sui victor, vultum induit animo

generoso congruentē, & lætus in speciem, Hoc totum fuerat, inquit, quod lacrimis te perennibus tu conficiebas? At ego post-hac, ne metue Pater, tantò cōtentiùs, quod agere institui, agere pergam. Quid enim? an quia me fieri miserum cras oportebit, sponte etiam hodierni diei felicitatem abdicabo? Et quoniam Deo servire me inferi quondam non sinent, ideò ne hîc quidem ut serviam studebo? Serviam hîc imò, serviam; & ne impium esse utrobique me superi videant, hîc certè fuisse me non videbunt. Neque fortiùs hæc dixit Adolescens, quàm postmodò fecit.

80 INIVRIVS ero, Sodales, si commiserò, ut hanc tironis constantiam vel in heroë suspiciendam, cursim attigisse potius, quàm laudasse, me videatis. Quam enim ego palæstram expectabo, in quâ animi fortitudo, & sincerus in Deū amor, experiri se, aliisq̃ue monstrare, luculentius possit? aut, quæ homini calamitas magis acerba denuntietur? Legimus aliquos, comperto amici infortunio; aliquos, audito patris exilio; aliquos, nuntiato rerum opumq̃ue naufragio, in rabiem versos, iratis manibus capillos, & pectora pugnis, & unguibus ora, muliebrem in modum lacerasse.

rasse. Scimus æquè alios, cum morbis, impatientiâ victi, cessissent, ferro sibi vim attulisse; alios, cum aut modici honoris jacturam fecissent, aut in præmiolo sperato repulsam tulissent, cælum cælitesque convitiis onerasse: quod quidem infortunium omne, si cum hoc nostro componatur, quantulum, Deus bone, & quàm ridiculum est! Et tamen constat animo noster, atque in incepto laudabili generosissimè durat. Eum astra rejiciunt, nec offensus queritur; tartara minantur, nec irascitur: abdicat Deus & exheredat, nec stomachatur: parvumque id putat, quod quendam audit exclamantem, *Si occiderit me, in eum sperabo*: Eum ego, inquit, etiamsi damnaverit me, amabo tamen, & laudabo.

81 O animum verè excelsum, neque hac fortunâ tam funestâ & lugubri dignû! Atque hæc tu ejus responsa cum audis, miserande senex, quid cogitas? quid sentis? non partes tu tibi Adolescentis hîc sumis? & quando conqueri de suis ærumnis ipse dissimulat, tu vicem ejus, expostulare cum cælo non festinas? Exere vires, & quod ausus es nunquam, hîc aude. Adorire Cælites, ad veniam cum per se faciles, tum maximè, si provocentur, non contumaces.

Agitur salutis vel servatæ vel profligatæ æternitas, quam tu hostibus quoque tuis cum obvenire prosperam exoptes, eam alumno huic tuo miseram esse adversamq; patieris? aggredere cælum, & pro clientulo depugna. Atqui senatus illud consultum, quod ais, obnuntiat. Moveret istud, si signatum id mihi, si subscriptum jam esse ratumque ostenderes. Nunc interea patientur Superi, ut has eorum fuisse minas potius, quam sententias, cogitemus. Ecquis autem deprecari pœnam, judicemque ultima minitantem, invitare ad mitiora prohibetur? Scio nos quædam, quamquam impetraturi non essemus, impunè tamen postulasse. Et Tyranni demum, non judicis est, veniam pacemque orantibus irasci.

82 CETERVM in hac perturbatione, quicquid egerit senex, ipsum certè Adolescentem constantia, quâ precibus concipiendis, Deoque cum laudando tum amando insisteret, nunquam defecit. Quare nec cælum porrò sustinuit, ut testata virtus æquo diutius cum experimento tam difficili luctaretur; sed errorem, qui duobus illuserat, in tempore patefecit: missoque ad senem cælesti nuntio, docuit, contrà,

trà, ac de Adolescente crediderat, statutum esse : priorem nuntium, stygis inquilinum fuisse, nec eum æterni consilii momenta, sed sua duntaxat ludibria & commenta apportasse. Deo longè aliter visum ; ut qui tantò jam antè, quid in eo discrimine præclarè facturus esset Adolescens, prænovèrit : eaquæ propter dignum censuerit, cui decretam ex æterno tempore coronam reservaret. Pergeret in incepto proin, mactèquæ virtute, nullis orci fallaciis circumveniri, aut à vitæ, quam instituerat, rationibus deterreri se sineret.

83 AUDITVM hoc insperanti seni oraculum, non absterisit lacrymas, sed mutavit ; ut quas antè dolor expresserat, has deinde gaudium continuaret : at quantò tamen has illis suaviores ? Igitur, qui tironi suo nuntium funestum priùs attulerat, æquum ratus, ut maturaret prospera quoque nuntiare, plenus gaudii ad eum recurrit, hominemquæ complexus, quid evenerit, & quæ rerum conversio, quàm inexpectatam salutem attulerit, docet. Pánicos fuisse terrores, eosquæ ex vano haustos, eòdem recidisse : neque aliam ob causam à Numinis providentiâ permisos, quàm ut exercendæ virtuti materiam

suppeditarent. Hac oratione Adolescens, quasi de offusâ somni caligine excitatus, oculos rursus attollere, cæloque, ad quod postliminium haberet, salutato, in genua accidere, & sublatis cum voce manibus, in Dei laudes effundi: neque in gratiis agendis aut modū habere, aut finem invenire. Et sanè decorum erat, ut hanc illi tantam felicitatem & nos officiosè gratularemur, Sodales: sed cum videtis ipsi, cum capere se ille non possit, ita lætitiis occupatum gestire, itaque cælo totum inhiare, ut hominum gratulationem nullam nec expectet modò; nec, si ultrò deferamus, advertat ullam, aut curet. Quare ne in eâ nobis operâ sumendâ operam perdamus, aliò versi, Deum etiam fulminantem diligere, & Adolescentis constantiam, quam laudare pro eo ac meretur nequimus, imitari certè taciti, pro virili contendemus.

I X.

ADOLESCENS à matre defunctâ
reprehensus.

*Dionysius Carthusianus de Quatuor novissimis
cap. 30.*

84 **S**OMNIUM hîc audituri, Sodales,
nihil minùs velim quàm ut somniũ
audisse vos existimetis; quando ne ipse
quidem, cujus infomnia vobis narrare in-
gredimur, in illo tragicæ noctis spectacu-
lo se credit somniasse; & nobis res ipsa
satis indicat, quicquid ostenti fuerit, certè
causam, quam vitæ mutatio tam seria sit
consecuta, vanam omnino ridiculamque
non fuisse. Rem porrò, ut ab Historico re-
lata est, auscultate.

85 **M**ATREM inter & filium adolescen-
tem, quem unum sibi, ad ultimæ senectutis
solatium, sustulerat, exorta quædam
non de nihilo jurgia pertinacius tenere,
quàm ut facilè posse componi viderentur.
Consilium erat adolescentulo à rebus hu-
manis divertere, & salutem, quam inter
æquoris procellas fluctuari sentiebat, in

portu quærere. Eam in rem intentus, clàm circumspiciebat, cui præcipuè littori spes resque suas tutò committeret. Et verò quin cælibem vitam reliquis vivendi institutis anteferreret, in eo non jam disputabat: ceterum in remotâ solitudine illam, an intra cœnobii septa conclusam vellet, id adhuc animi dubius pendebat. Cum utroque versum multa perinde traherent, peritos rerum arbitros legit, qui sibi, quid factu optimum esset, definirent. Ab his decisa lis est, ut consultius facturum adolescentem dicerent, si vitam solitariam, & ab omni hominum societate separatam, alteri, quâ inter plurium asceteria religiosè vivitur, longè posthaberet. Datum, acceptumque consilium.

86 SED in eo tamen exsequendo, moliri filius tam occultè non potuit, quin, ut suspiciosus est amor, parentem adverteret. Ea confestim adesse, & ne quid hujus fieret, omnibus viis obstare. Quid enim? huc meos ego labores? huc omnes videam spes meas recidere, ut elato pridem marito, etiam à filio nunc relinquer? & quæ Vidua solebam adhuc vocari, posthac (ne semel misera sim) etiam orba salutabor? Atqui biduum hoc saltem tu expectares, dum perage-

perageret officiū suum senectū: non segnis est illa, etiam injussa festinat. Tum ubi senile tu corpus sepulchro condideris, & ossibus his terræ paullillum injeceris, matrem tu diem prætereā unum ne morare. Quin ipsa te hortor, ut curriculo tum, quantum potest, evadere hinc atque effugere contendas: eò magis quidem, quò sanctiūs id facturus tunc es, quod nunc sine scelere in matrem facere vix potes.

87 Hæc iterum iterumque cum pertinax intonuiſſet anus, & filium lacrimis ad sui respectum inflectere laboraſſet; id ille telum (quo nullum matres habent potentius) hoc excepit clypeo semper & retudit, ut diceret; habendam suæ sibi salutis rationē esse: & velle se, periculi immunem, per arctæ viæ compendia cælum petere: ne quando cum turbâ laxioribus spatiis assuetâ cogeretur repulsam timere. Non insuper habendū illud Christi privilegium, quod sequacibus dederit, ut quisquis aut fortunas, aut amicos, aut parentes valere, suā quidem causā, jussisset; is in judicio fatali non tremere & palleret cum reis, sed inter judices receptus, sententiam in alios pronuntiaret. Nisi tu fortasse ducendum pro nihilo credis, eo tempore, quo ad

Christi tribunal tot populi & gentes, tot Principes & Reges, atque ipsi etiam sacrorum Antistites, metu exanimati, circumstabunt, & universi, quid de se statuatur, suspensi incerti que expectabunt; eo, inquam, temporis momento, sedere aliquem sui securum, & habere quod aliis miniretur, nihil autem videre quo ipse terreatur. Mihi certè, ad hanc immunitatē evadere, tanti est, ut ea propter humana calcare omnia, & quod Christi oracula jubent, etiam parentes decreverim abdicare. Quo in consilio si tu dissenties, mater, hoc me certè consolabor, quòd sciam non etiam Christum dissentire.

88 IN hac sententiā cū animum Adolefcens obfirmasset, & nihilo tamen molestius instare mater atque obtundere pergeret; eò res rediit denique, ut si morem gerere Christi imperio vellet, audaciā utendum sibi, & ex matris amplexu quaquā posset, violenter erumpendum judicaret. Nec mora, erupit: matri à tergo revocanti, hoc identidem unum recantans; daret abeunti filio veniam: velle suæ se salutis curam agere. Et cū deinde per litteras illi nuntiosque esse molesta perseveraret, idem ille per litteras nuntiosque semper respon-

respondebat, agere curam salutis suæ se velle. Quo uno tam pertinaci responso fractæ spes opesque feminæ, negotium facessere adolescenti desierunt.

89 At ille potitus demum quiete suâ, cum aliquandiu bonam operam in cœtu religiosæ familiæ navassèt, multisque sæpe documentis palàm fecisset, in primis curis suam sibi (ut instituerat) salutem esse; paulatim, ut homines sumus, de primis studiis cæpit remittere, & plurimum magis, quàm meliorum vestigiis intentus, eò discedere, ut sui non multò pòst dissimilis, longè alia, quàm olim apud animum suum decreverat, visus sit agitare. Intepuerant pristini desideriorum ignes, & neque precum ratio constabat, neque jam vigiliæ satis placebant, quasque opes & voluptates generosè nuper repudiarat, ad easdem nunc eminus anhelare, & tenaciùs quàm vitæ professio pateretur, adhærere sentiebatur. Postremò, ut omnia compendiò dicantur, exciderat & matris abdicatæ memoria, & propositæ salutis cura. Morbo adolescentis comperto, non defuerunt qui remedia tentarent. Nihil succedebat; non æqualium exempla, non senum monita, non majorũ imperia. Res aliis experienda medicis servabatur.

90 MATREM intereà senectus orbitas-
que luctu confecere. De cujus exsequiis
cum nuntium filius insperatò accepisset,
hactenus moveri se sensit, ut illapso in ani-
mum mœrore, ex omnium aspectu clam
secesserit; ubi, si se liberiùs dolor erumpe-
ret, arbitris querelæ carerent. In eo recessu,
consumptis ferè jam lacrimis, nox ap-
petit, & cum nocte sopor: quem ut divi-
nitus immissum sciret, somnia excepere,
quàm visu terrifica, tam salutaria eventu.
Etenim visus sibi est adolescens, in vastâ
quadam ignotaque regione consistere,
quæ, quòd omnis armato præsidio tene-
retur, nullum effugiendi locum præbebat.
Ibi sella fulgurans ab alto conspicua, ter-
ribili facie tribunal: vacuum id quidem
adhuc, sed à quo scires judicem expectari.
Aliæ circumcircuità minuscule sedes, & in-
gens judicii apparatus. Simul audiri tubæ:
quæ cum longè lateque personarent, undi-
que accurrere reos, & in jus ambulare,
etiam tiaras ac diademata, compellebant.
Simul immensâ mole liber proferri, atque
indidem à præcone alii super alios citari,
qui aut vitæ rationes venturo judici ap-
probarent, aut æternum proscribendi exu-
larent.

91 Hic promptum unicuique est, Sodales, arbitrari, quid animi in hoc tam lugubri foro retinuerit infelix adolescens, cum præsertim & se nominatim evocari, malè conscius, audiret. Videbat universos, ceu consilii ignaros, aut pectora plangere, aut ora cædere, aut crines evellere : audiebantur alii misericordiam orare, alii terrarum hiatus & montium ruinas implorare, alii suspiriis & gemitibus cælum comple-
re. Ipse unus quid potissimum ageret, dubius, cum omnibus omnia movebat. Sed in hac hominum turbâ, tristissimum fuit, & matrem intueri, nihil à ceterorum fortunâ diversam : quippe & ipsa formidinis plena, consilium amiserat ; eaque propter, quoties Prætoris tribunal, & iudicum reliquorû subsellia suspiciebat, filii memor, sapienter cum recteque fecisse affirmabat, qui olim, ne pavidus in reorum agmine trepidaret, ad iudicum ordines opportunè transierit, ubi adsidens Prætori, sententiam in alios aut pronuntiaret ipse, aut certè securus approbaret. Jamque adeò proditurum finge-
bat, ut locum sibi sellamque reservatam occuparet : cum ecce tibi

92 NOVA oculis, & improvisa calamitas objicitur. Dum plebem illa pallentem,
undique

undique & miserè opplorantem, enumerat, filium videt agnoscitque in turbâ medium, æquè ac alium neminè, pavitantem, & rebus suis fortunisque diffidentem. Quo aspectu velut attonita, cùm diu non reperisset quod loqueretur, eò demum erupit, ut media inter admirantem & exprobrantem requireret, hæccine fuisset illa salutis cura, quam crepantibus buccis toties jactasset? hæc vitæ, quam instituerit, privilegia? hæc sella curulis, & securitas, quâ inter judices confessorum se prædicasset? Ideò tu nempe spes omnes opesque mortales abjicere? ideò voluptates contemnere? & ideò patriam domum cum familiâ sacrâ commutare te velle gloriaberis, ut nobiscum hic hodie pallere posses & formidare? Impetrasse conditionē hanc minori compendio poteras, si cum istis & istis luxu diffluere, si gloriæ umbram sectari, si non tua relinquere, sed aliena diripere per injuriam studuisses. Atqui tu locum hunc ut olim effugeres, matrem fugisti. Ubi nunc magnificæ voces, quibus clamitaras, Procurandam animi tui salutem esse? Hóccine est procurasse?

93 ERVBVIT hoc matris convitio adolescens, parumque abfuit, quin periculi oblitus,

oblitus, hac unâ, quam exprobrarat, infamiâ cruciaretur. Igitur oculis humi demissis, (quòd ruborem suum, & matris conspectum non sustineret) dum orationem, quâ matri se purget, nullam invenit, sopore simul & somnio præter spem solvitur. Manabat undique sudore frigido, & omnibus adhuc membris etiam vigil tremiscebat: quanquam evigilasse vel idèd se non credebat, quia nesciebat somniasse: ita seriò res actæ, nihil somnii referebant. Ad cuius ego confirmationem alia vobis argumenta non adduco, quàm, ut adolescentem, ab eo sopore expergefactû, considerare vos diligenter, & cum illo, qui paullò priùs fuerat, jubeam comparare.

94 EVM certè simul alii quidam, hominis familiares ac necessarij, excitatum intuebantur, tantam in eo morum vitæque mutationem unde existeret tam repentè conjicerent, non reperiabant. Quem nuper dissolutum vagumque, & licentiùs, quàm loci disciplina ferret, errantem meminert, eum tunc, & quoad porrò proximit, cubiculo, quasi carcere perpetuo, inclusum reperere, ibi lacrimis perennibus madentem, ibi gemitus & suspiria alternantem, ibi assiduis viderunt precibus operan-

operantem. Nemo tunc illum silentii studio vincere, nemo in patiendi desiderio æquare. Nil eodem ad vigilias alacrius, nihil ad vini cibiq̃ue abſtinentiam promptius; ad voluntaria verò corporis tormenta, nil neque avidius uſquam, nec ſeuerius.

95 Igitur non magis admirari ſecum plerique, quàm ex adolescente ſciſcitari, ecquid malè de ſe meritus fuiſſet, quàmve metamorſe eos tam novæ cauſam haberet: adhortari etiam, ut parcius in inſonſalto rigore pergeret, mitiusq̃; paulò in te deſæviret. Quibus ille cùm diu, præter ſingultus & manantes lacrimas, nihil redidiſſet, noviffimè victus, quid per quietem viderit audieritq̃ue, breviter exponit: totamq̃ue narrationis ſeriem hoc denique epiphonemate concludit: Sinerent in ſquallore vitam exigere, ſinerent lacrimas & luctum duplicare, ut noxiis elutis, purior olim ſecuriorq̃ue ad tribunal revertetur. Nam quo vultu Judicem, inquit, ipſum, & iudicis irati fulmen ibi perferam, qui matrem ferre non potui exprobrantem? Et fingite ſanè, illum ego non audiam; ſatis fuerit, audiſſe matrem.

96 Ab hac adolescentis oratione, religio

git mihi est prius discedere, Sodales, quàm impetrasse me videro, uti ad vos ego brevissimè perorem. Nam etiam vos opinor, cùm è profanâ multorum societate elapsi, ad Marianas leges auctorari voluistis; ipsis intereà retrahere conantibus, aliud non respondebatis, quàm, quòd metu æternitatis perculsi, salutē in hoc asylo quæsituros vos diceretis. Et asylum vos certè reperistis quotquot ad legum istarū præscripta mores congruere vestros jubetis; Matremque hanc vestram, non ut suam ille deferere, sed observatā impensè colere, dignisque amoribus ac studiis prosequi pergitis; habituri certam in illo iudicio prælidem vobis & patronam. Erit è contrario, cur sibi caveant illi, qui propositi immemores, ita in Parthenone vivunt, ut præter Sodalis nomen, nullum insigne, Mariano cliente dignum, reservent; sed turbæ, cum quâ periclitari se nolle dixerant, simillimi degant. Hos enim illi, cùm olim ad summi Prætoris tribunal secum adstare pallidos trepidosque, nec in minori discrimine versari conspicient, quàm se ipsos; nōne insultabunt meritò, & suum illis Parthenonem, vel cum risu (si quem loci calamitas pateretur) exprobrabunt?

Quan-

Quaquam ut demus, aliquem fronte tam ferreâ esse, qui tali convitio moveri non velit; tamen erit nemo, mihi credite Sodales, qui tenere colorem in illo iudicio possit, cum exprobari talem sibi inertiam audiet à Matre.

X.

ADOLESCENS nobilis B. Catherinæ
patrocinio servatus.

Ex libro veteri, & Relatione Ioannis Salleri.

97 **A**NIMADVERTO, plerosque hîc omnes expectare, ut de magnæ Virginis matrisq; laudibus eximium quiddam, & cum narratu facile, tum auditu jucundum, pro loci temporisq; consuetudine afferatur. Ceterum ego nullius vestrum ingratis facturum me confido, si narrationem à virginum Reginâ ad virginem Catherinam divertero; dum quantum nobis præsidium non modò in augustissimâ virginum Imperatrice, quod neminem fugit, sed etiam in reliquo ejus Parthenone repositum sit, intelligamus.

98 **Q**VI Britannia majoris, ejusque
gentis

gentis res memorabiles commentati sunt, ii, cum alia præclare, tum istud non in postremis extare ad posteros documentum voluerunt, quo memorant, Juvenem extitisse, gente Britannum, ac genere quidem veterisque familiæ opibus insignem (quippe terræ non modicæ toparcham) virtute tamen atque animi decore insigniorem. Sed fulgebat in eo, longeque superabat, præcipuus quidã adversum Cælites amor, quos universos cultu assiduo piè sancteque, sed in iis Catherinam sensu quodam teneriori sic venerabatur, ut ei non modò studia sua, sed curas æquè omnes, & secunda adversaque cum primis commendaret. Quam in rem haud intermisit, ad ejus Virginis ædiculam, palatio prope contiguam, sæpenumero, atque adeò quotidie provi- sere; ubi pias illi preces castus adolescens clam ceteris conciperet, & in ejus tutelam acceptus, à vitiis, Orcique insidiis procul ætatem agitare. Neque nullũ hujus operæ pretium fecisse se, aliquantò post com- perit.

99 NAM fortè quadam evenerat, ut sub diei nascentis crepusculum, recepto more, ad Patronæ sacratũ solus inviseret, facturus inibi, quod quotidie consuêrat.

Tum

Tum ei cælum, quas etiam non consuêrat, insperato spectaculo delicias offerebat. Nondum is ad templi limen pervenerat, cùm è vestibulo tres videt Virgines procedere, gressuque modesto sibi rectà obviàm venire. Territus occursum non expectato, quid ageretur, ambigebat. Et vigilare tamẽ se certè, nec à somnio deceptum, ejusmodi nymphas intueri, cogitabat. Sumit animum proinde, fixisque oculis omnem earum vestem considerat: videt gemmeum & inenarrabile textum esse: manus adspicit, videt Parium marmor, & Libycum ebur esse: os oculosque spectat, credit tres è cælo lunas esse, aut æmulas astri majoris Heroïnas. Quare nihil jam mortale suspicatus, oculos, quos audentiùs modò sustulerat, humi rursus dejicere, & plenus formidinis, ostentum incipit, ne præstigiis luderetur, animo versare: dum Virgo demum, quæ trium proxima aberat, erigere sese juvenẽ, sibi que constare jubet; quippe ludibrii, quod vanè metueret, immunem. Neque enim, ut oculis tuis imponeremus, huc, inquit, venimus; sed precum tuarum votorumque officia è cælo nos devocant; ut quem absentes sæpè audivimus, ab eo conspici quoque & audiri nos aliquando velle demonstramus.

100 VOCEM elicere vel à muto potuisset tam liberalis invitatio : atqui adolescentem, è deserto nuper & eloquente hebetem propè reddidit & elinguem. Quid igitur (malum!) insciens hîc expavescis? non tu mortales oculos hoc cœlesti spectaculo pascere? non aures his adeò Suadelis aperire? nec mutua festinas huic Virginum choro verba reddere? Alibi nimirum Sirenas, & illices Veneris ministras extimesce : nam ubi suas cælum Nymphas ostentat, lenocinari forma & insidiari non potest. Addè, quòd inter has tua illa est Catherina, quam absentem toties tu vocare in vota solitarias : quid præsentē ergo nunc formidas? cur appellantem, & invitantem, ingrate, non resalutas? Jubet hæc, ecce, Gratiarum trias, unam te sibi, quam velis, deposcere : jubet unam, non expugnando pudori, sed conservandæ integritati, sponsam optare : & in optione tam liberali tu dubius adhuc & intricatus hæres? Attolle sis vultum, & immortalia non animo solum contemplare, sed oculis etiam sensibusque usurpa.

101 PARVIT, etsi timidè, modestus adolescens; & in certamen difficillimum ingressus, cum huc oculos, huc animum

diu intendisset, aque iterum illuc atque illuc reflexus, visum per omnia sollerti examine duxisset, sensit in ambigua lite nihil se demum proficere. Nam, etsi jam audierat, Charitum illarum unam esse Catherinam, quam præ aliis unam utrique cliens eligeret: ea tamen ipsa quæ nam potissimum in tribus esset, secum disputabat. Ideò dum anxie & nequicquam consultat; duæ sorores errantem denique & hæsitantem feliciter absolvunt, digitoque indice, quem in tertiam mediamque intenderant, quid sui iudicii sit ostendunt. Et erat ea sanè Catherina, ut loco media, sic dignitate formaque inter ceteras prima. Quare continuò & adolescens, jam bonus arbiter, in ejusce fidem concessurum sese dicere: & quamquam duas non repudiaret, tertiam tamen ceteris sic anteferre, ut alumnum ejus victurum se moriturumque palàm profiteretur.

102 CATHERINA nihilo erga clientem suum parcior, sertum ei quàm primum in caput imponit. Sed quale sertum, Deus bone? quâ illud florum gratiâ contextum? quâ colorum odorumque illecebrâ temperatum? quibus unionibus gemmisque distinctum? Sertum verè non ab Alcinoi

cantatis

cantatis rosariis, aut fabuloso Hesperidum nemore, neque ex Hybleis violariis peti- tum; sed inde feliciter lectum, ubi vere perpetuo cœlestia prata pubescere, violæ- que rosæque immortales à nullo sibi senio, nullâque hiemis pruinâ possunt timere. O campos opum verarum fertiles, & feraces deliciarum! qui talibus hyacinthis confiti, semper virescitis & vernatis! Campos, ubi candent lilia, rubescit crocus, sudat balsa- mum. Quis hodie nobis flosculû de areo- lis vestris odorandum promittat? Nam totum reticulum, rosæ vestratis plenum, nobis ne optare quidem hîc audemus: cum interim huic licuit adolescentulo to- tis indidem corollis caput redimire.

103 Igitur hoc cœlesti pignore obli- gatum adolescentem, jubet generosè per- gere Catherina, fidemque datam æternâ constantiâ colere, quæque pactus esset, meminisse. Simul ex oculis illa Charitum trias discedit. At juveni, jam talibus Hy- menæis initiato, mortalia confestim om- nia vilescere, sordere terra, cælum, præ- quàm aliàs, placere; illuc oculi, illuc gemitus & desideria unicè omnia spectare: ut ipse sibi ne posse quidem jam aliud, quàm odio æterno humana fastidire, dataque in

fide perseverare, videretur. Videretur, inquam. Ne enim re etiam ipsâ perseveraret, id, cheu ! paullò pòst, sive parentum imperia, sive propinquorum blanditiæ, sive rerum fallacium insidiæ perpulere. Quippe non diu est factum, ut adolescens & ferti accepti, & fidei pactæ oblitus, inciperet degener, & nescio quo Sirenum cantu deceptus, à Catherinâ suâ per infame repudium divertere, atque ad alios amores, infelix transfuga, abire. Virginem enim & genere sibi & opibus non imparem (erubesco dicere) deperiit, sponsam expetiit, nuptias fecit, domum deduxit.

104 ITANE verò ? tu nuptias has innuptas, adolescens temerarie, non cogitare solùm, sed etiam contrahere ? tu inauspicatos tibi thalamos parare ? tu funestum potes jubere Thalassionem cantari ? Hæc scilicet prima fidei tuæ constantiæque documenta statuis ? hæc fœderis jurati symbola relinquis ? Et quo dehinc ore Catherinam tu cominus appellare ? quibus illam, si quondam occurrat, oculis intueri ? quâ manu fertum illud tu audebis impudens contrectare ? Nimirum, quoties horum tibi quidque in mentem veniet, toties ipse te ingratum clientem, perfidum alumnum, puden-

pu-
dendum & abdicandum heredem, cum
ebulliente gemitu, clamitabis. Sed finge,
jam illam tibi Virginem, duabus iterum
fororibus comitatam, occurrere, non tu
illam, si colloqui tamen velit, hoc tibi di-
cturam arbitraris: Ego te, desertor ingrater,
jam inde à puero in tutelam meam, digna-
ta accepi; ego favore meo præsidioque,
dum licuit, semper adjuvi; ego te pignore
demum cælesti, ne quæ descisceres, mihi
devinxi; ac porrò, ne quid violentum me-
tueres, opem tibi omnem liberaliter pro-
misi: audes tu tamen (ô rerum & fortuna-
rum oblite tuarum) audes à me divortium
inconsultò facere? audes tuam cliens tu-
telam repudiare? teque mortalibus nuptiis
(ô dedecus!) immemor jungere? Hæc, in-
quam, si pauca tecum, sed offensa irataque
loqueretur, quid ageres deprehensus? quò
te abderes fugitivus, & occultares?

105 VERVM interea loci, vos cetera,
Sodales, quæ ad rem faciunt, cognoscite.
Nuptiis inter duos, jure quo placuit, cele-
bratis, aliquamdiu festa quædam, etiam in
eo statu, felicitas tenuit. Sed enim, quæ
fortuna sperabatur perpetua, ea repente ad
ingenium rediit; novosque conjuges ma-
lis erroribus miserè confudit. Siquidem

adolescens, in ipso etiam Catherinæ repudio, salutandæ ejus consuetudinem ita retinebat, ut quotidie, simul ac primo diluculo surrexerat, è palatio ad ejus ædiculam incomitatus decurreret, & officio, quod solebat, peracto, identidem in palatium regrederetur. Quæ hominis consuetudo paullatim conjugem impulit, ut maritum alienis amoribus operari, malè credula, cogitaret. Ex quo principio sensim omnia illorum fortuna in pejus ruere, retroque relapsa referri. Nam uxor malis usæ consiliis, sibi pessimi facinoris fit auctor, dum pedissequam clanculò subornat, inque inscium virum sic armat, ut dato negotio ex insidiis observet, quas nam illæ res quotidie agat, quo loci matutinus assidue erumpat; & ecqua cum alterâ (nam huc suspicio ferebat) occultè consuescat.

106 ANCILLVLA; in cladem familiæ præ ut debuerat officiosa, negotio accepto, dominum oculis excubantibus servat, ac velut è speculâ, cum eum, pro more, ad Catherinæ sacellum itare, precesque ibi prolixas concipere deprehendisset, idque iterum iterumque facere constanter vidisset; læta, quid ageretur, heræ suæ renuntiat: Maritum ad Catharinam, quæ in
viciniâ

viciniâ viseretur, excurrere, ibique diu & perfamiliariter hære: plura nesciri. Uxor, vel nominis errore decepta, vel, quòd mentem offusa nebula infuscabat, cœpit, cum nescio quâ Catherinâ rem ipsi esse credere, quam sibi utique suæque formæ anteferreret. Et quoniam

Nulla vis flamma, tumidiq; venti

Tanta, nec teli metuenda torti,

Quanta cum conjux viduata tædis

Ardet, & odit,

ideò furoris amentiaque plena, ad facinoris, quod putabat, ultionem temerè stolidæque decurrit: atque ut conjugis probum atrocissimè plectat, in se ipsam vindicare femina præceps constituit. Verùm hoc secum illâ moliente, adolescens, persolutis jam fortè precibus, redit; turbarum, quas uxor parturiret, planè ignarus. Illi, alia omnia cogitanti, occurrit in limine mulier ferox, & Catherinam illi suam, amarum renidens, exprobrat. Cui enim dubium esse, quin ea, sicut formâ sibi præstaret, ita amore deberet apud virum antecellere. Iret is proinde, seque ejus aspectu colloquioque clàm satiare; non intercessuram se, quò minus primæ partes illi tribuerentur; se, ne in secundis quidem aut